













# ନେହା-ସୁନ୍ଦରୀ ନେହା



ଦେ'ଜ ପାବଲିଶିଂ ॥ କଲିକାତା ୯

প্রকাশক :

শ্রীকৃষ্ণধাংশুশেখর দে

দে'জ পার্বলিংশিং

৩৯/১বি, মহাত্মা গান্ধী রোড

কলিকাতা-৯

প্রথম (দে'জ) সংস্করণ :

পদনবাব্দা, ১৩৬৭

প্রচ্ছদশিল্পী :

গৌতম রায়

মুদ্রাকর :

হরিপদ পাত্র

সত্যনারায়ণ প্রেস

১, রমাপ্রসাদ রায় লেন

কলিকাতা-৬

উৎসর্গ

যাঁঁব সাহিত্যপ্রীতির স্মৃতি আমাকে সদাসর্বদা  
অনুপ্রাণিত করেছে  
আমার সেই পরম পূজনীয়  
পিতৃদেব  
স্বর্গীয় ভদ্রদেবচন্দ্র বসু  
স্মৃতিতর্পণে



নেফাকে ভোলা সহজ নয়। ঘুমের ভেতর নেফা আমাকে হাতছানি দেয়। ডেকে বলে—“ওরে আয়। আমার কোলে ফিরে আয়।” নেফার প্রতি আমি এক প্রবল আকর্ষণ অনুভব করি। ইচ্ছে হয় নেফাতে আবার ফিরে যেতে। নর্থ ইস্ট ফ্রন্টিয়ার এজেন্সী। সংক্ষেপে নেফা। ভারতের উত্তর পূর্ব সীমান্তের এই ভূখণ্ড এক অদৃশ্য মায়াজালে আমাকে জড়িয়েছিলো। তাকে ভোলা আমার পক্ষে সম্ভব নয়। নেফার সিয়াং ডিভিসানে পাহাড়ের সান্নিধ্য সিয়াং নদীর ধারে সমতলভূমির ওপর দাঁড়িয়ে রয়েছে পাশিঘাট। ছোট্ট শহর। শহর না বলে গ্রাম বললেই বোধহয় ভালো। নেফার পাশিঘাট আর তার আশেপাশের অঞ্চলের বাসিন্দাগুলো, সবাই এসে মনের ছুয়ারে ভিড় জমায়। ওদের ভোলা সম্ভব নয়। ভোলা সম্ভব নয় বিশ্বনাথ নন্দীকে। চক্রবর্তী, ওমি ময়াং, নেনী ময়াং, দেওদার, লুটিং ময়াং, বালু, পোস্ট মাস্টার, পোস্ট মাস্টারের স্ত্রী, মিস্টার ভর্মা, সার্কেল অফিসার, কাগোলী জামু, ওনে ডাই, তরফদার, তালুক তামু, কারছ টাইপোদিয়া, ইবো, সহকিয়া, মিসেস্ চাকলাদার। কাউকে ভোলা সম্ভব নয়। ওরা আমার মনে স্থায়ী আসন পেতেছে। নেফার পাশিঘাটে বেশ কিছুদিন আমাকে থাকতে হয়েছে। সময় কেটেছে নেফার অরণ্যে আর পর্বতে। নেফা আর পাশিঘাটের সঙ্গে বড়ো জড়িয়ে পড়েছিলাম। পাশিঘাট অন্তরের একটা বেশ বড়ো অংশ জুড়ে নিজের স্থান করে নিয়েছিলো। পাশিঘাট ছেড়ে চলেও এসেছি আজ বেশ কয়েক বছর হলো। জানিনে আজ পাশিঘাটের কতোটা পরিবর্তন হয়েছে। নেফাই বা কতোটা বদলিয়েছে। কতোটা জঙ্গল সাফ হয়েছে তার খোঁজ রাখিনে। রাস্তাঘাট কতোটা বানানো হয়েছে সে খবর কেউ জানায়নি। সারা নেফাতে সার্কেল অফিসার ক’জন এলো আর ক’জন বদলি হল বা পলিটিক্যাল অফিসার আর অ্যাসিস্টেন্ট পলিটিক্যাল অফিসারদের বদলির খবরের জন্ত নেফা গেজেটের পাতা উলটিয়ে দেখিনি। সি পি

ডবলুডির ইঞ্জিনীয়ারদের নেফাতে চাকরির মেয়াদ দু বছর থেকে বাড়িয়ে তিন বছর করা হলো কিনা সে বিষয়ে আমি মাথা ঘামাইনি। কামেং-এর বমডিলা আর টোয়াং অঞ্চলে পর্বতশিখরে বরফ জমে। তাতে সূর্যের আলো পড়ে রঙ-বেরঙের সৃষ্টি করে। লোহিত আর টিরাপের অনেক স্থান এখনো বোধ করি জরিপ করা হয়নি। তিব্বত, ব্রহ্মদেশ আর চীনদেশের সীমান্ত এসে নেফার সঙ্গে মিশেছে। নেফার সীমান্ত অঞ্চলে গভীর অরণ্যে এখনো অনেক কিছু ঘটে যার খোঁজ কেউ রাখে না। টিরাপের গভীর অরণ্যে এখনো কি কাঁচা মাথার লোভে শানিত তলোয়ার সঙ্গে নিয়ে সিঙ্গফোরা ঘুরে বেড়ায়! লোহিতের জঙ্গলে মাথার ওপর টুপ্ টুপ্ করে জেঁক পড়ে। সুবনসিরির জঙ্গলে নিঃশব্দ চরণে দল বেঁধে ডোরাকাটা বাঘের দল ঘুরে বেড়ায়। কামেং ডিভিসনের উত্তর প্রান্তে বরফের ওপর মানুষের যে অতিকায় পায়ের ছাপ দেখা যায় সেগুলো কি আমাদের মতো সাধারণ মানুষের পায়ের ছাপ? বরফ গলে বৃহৎ আকার ধারণ করেছে, নাকি সেই অবিশ্বাস্য তুষারমানব? রহস্যময়ী নেফা। বিচিত্র আর অদ্ভুত। আমি ফিরে গিয়ে কি সেভাবে আর নেফাকে দেখতে পাবো? ফিরে পাবো নেফার সে জীবন? জানিনে।

পাশিঘাটের ইন্সপেক্টর বাংলোতে সে রাতটা এখনো মনের ভেতর বডো স্পষ্ট হয়ে রয়েছে। কাঁদে আর কাঁদে। ডুক্‌রিয়ে ডুক্‌রিয়ে কাঁদে। ফুঁপিয়ে ফুঁপিয়ে কাঁদে। সে কাঁদে এমন করে। আকাশটা থেকে ঝরছে আর ঝরছে। চারদিকে জমাট অন্ধকার। চাপ চাপ কালোর রাশি। আলোর চিহ্ন নেই কোনোদিকে। কালো আর কালো : এরই ভেতর সিয়াং নদী ফুঁসছে। গর্জাচ্ছে। উন্মত্ত একটা জানোয়ারের মতো আহড়াচ্ছে। দাপড়াচ্ছে। দূরে দূরে আকাশছোঁয়া পাহাড়শ্রেণী।

পাহাড়গুলো অন্ধকারের ভেতর যমদূতের মতো দাঁড়িয়ে আছে মাইলের পর মাইল। ওদের বুকজুড়ে ঘন অরণ্যানী গভীর, ভীষণ, ভয়ঙ্কর সব অরণ্য। এ নির্জন জনমানবহীন প্রান্তরে কে এমন করে কাঁদে। এ

কাল্লা যেন কতো যুগ পেরিয়ে, কতো শতাব্দীর অন্তরাল ভেদ করে ভেসে আসছে। উন্মত্ত হাওয়া গর্জনমুখর সিয়াং-এর বৃকের ওপর দিয়ে মাইলের পর মাইল বয়ে আসছে। অসহ্য এক গোড়ানিতে ভরিয়ে তুলেছে সিয়াং-এর বৃক। এ পাগলা ঝড়ো হাওয়া নিখিল আক্রোশে পাশিঘাটের ইন্সপেক্‌সন্ বাংলোর গায়ে মাথা কুটে মরছে। সারা বাংলা থরথর করে কাঁপছে। হাড়ে হাড়ে ঠোকাঠুকি লাগছে যেন। সিয়াং নদী মাটি খেয়ে খেয়ে ধীরে ইন্সপেক্‌সন্ বাংলোর দিকে এগিয়ে আসছে। অগ্রসর হচ্ছে একটা রক্তলোলুপ স্থাপদের মতো। সিয়াং নাকি গত পনেরো দিনে পাশিঘাটের অনেকটা মাটি উদরস্থ করেছে। এর আগে সিয়াং আধখানা পাশিঘাট খেয়ে নিয়েছে। এতো খেয়েও ওর ক্ষুধার নিবৃত্তি হয়নি। বাকী আধখানার ওপর লোভ রয়েছে। সম্পূর্ণ পাশিঘাট উদরস্থ না করে সিয়াং নদী শান্ত হবে না। ওর দয়া নেই, মায়া নেই। ও নির্মম, নির্ভুর ! আমি ছাড়া এ ভয়ঙ্কর রাতে, এ জনমানবহীন প্রান্তরে, এ নির্জন বাংলাতে আর কেউ নেই। ছু-চার মাইলের ভেতর কেউ আছে কিনা সন্দেহ। বাংলোর চৌকিদার পাঁচটা বাজার সঙ্গে সঙ্গে আমার খাবার ঢাকা দিয়ে রেখে চলে গেছে।

কোথায় গেছে কে জানে। আমাকে নির্মম এক নির্জনতা, তুরন্ত অশান্ত হাওয়া আর উন্মত্ত সিয়াং এর কাছে সাঁপে দিয়ে চলে গেছে। আমার জন্তে রেখে গেছে একঘেয়ে, বিরক্তিকর করুণ আর প্রাণ-কাঁপানো এক কাল্লা। হঠাৎ টক্ টক্ টক্ ! দরজায় করাঘাত হচ্ছে বলে মনে হচ্ছে। বোধ হয় হাওয়া। আবার শব্দ হয় টক্ টক্ টক্ ! না বেশ পরিষ্কার,—“কে ? কে ?” প্রশ্ন করি। কোনো সাড়া নেই। আবার টেঁচিয়ে বলি—“ওখানে কে ? কে ওখানে ?” কেউ সাড়া দেয় না। শব্দ বন্ধ হয়ে গেছে। আর কোনো সাড়াশব্দ নেই। শুধু উন্মত্ত হাওয়া মাইলের পর মাইল ছুটে এসে ধাক্কা দিচ্ছে ইন্সপেক্‌সন্ বাংলোর গায়ে। হ্যারিকেনটা একরাশ কালো ধোঁয়া উদ্গীরণ করছে। আবার। আবার সেই শব্দ। হ্যারিকেনটা নিয়ে এগিয়ে চলি। এগিয়ে যাই অনেক সাহস



সঞ্চয় করে। জানলার ছিটকিনি নীচে নামিয়ে জানলার একটা পাট খুলে দিই। মরচে পড়া লোহা আর পুরনো কাঠ ককিয়ে কেঁদে ওঠে। জানলার গরাদ নেই। হ্যারিকেনটা নীচে বারান্দায় নামিয়ে দিই। বড্ডো দুর্বল আলো। মুহূর্তে জমাট অন্ধকার এসে আলোটুকু গ্রাস করে নেয়। তবু ওই টিমটিমে আলোতে যতোটুকু দেখবার দেখে নিতে চেষ্টা করি। হ্যারিকেনটা উঁচু করে ধরি। না, কেউ নেই চারিদিকে। কাঁউকে দেখতে পাওয়া যায় না।—“কেউ আছে ওখানে?” হিন্দীতে বলি। কেউ সাড়া দেয় না। নিষ্ফল চেষ্টা। দমকা হাওয়া এসে আলোটা নিভিয়ে দিতে চায়, কিন্তু আমি যে স্পষ্ট দরজায় করাঘাত শুনেছি। হ্যারিকেনটা ভেতরে নিয়ে এসে জানলাটা বন্ধ করে দিই। বিছানায় এসে বসেছিলাম। আঁধার শুরু হয় সেই ডুকরিয়ে কান্না। এক্ষেপে বিরক্তিকর কান্না। খানিকক্ষণের জন্ত কান্না বন্ধ ছিলো। আবার শুরু হয়েছে। এ অন্ধকারে গিয়ে কান্নার উৎপত্তিস্থল আবিষ্কার করা আমার পক্ষে অসম্ভব। আমি মাত্র আজ ছপুরবেলা এসে পাশিঘাটে পৌঁচেছি। এখানকার সব কিছু আমার কাছে অজানা। কিন্তু ক্রমবর্ধমান হাওয়ার করুণ কাতরানি আর সিয়াং-এর গর্জন, কান্নাকেও ডুবিয়ে দিচ্ছে। মনে মনে ভাবি এ দমবন্ধ করা নির্জনতা, মিয়াং-এর গর্জন, আর মাছুষের চাপা কান্নার ভেতর কি কেউ ঘুমোতে পারে? এখানে রাত্রিবেলা অন্ধকারের সুযোগ নিয়ে দরজায় করাঘাত হয়। যে করাঘাত করে সে সাড়া দেয় না। ভাবি দূর ছাই, নেফাতে চাকরি না নিয়ে এলেই ভালো ছিলো। সিয়াং ডিভিসনের পাশিঘাটের স্কুল মাস্টারের এ চাকরির অফার গ্রহণ না করলেই ভালো ছিলো। দেশ ছেড়ে নেফার এতো অভ্যস্তরে না এলেই ভালো ছিলো। নেফার কামেং নয়। সুবনসিরি নয়। একেবারে সিয়াং ডিভিসনে। আমি ভাবি নেফার মায়ায় জড়ালাম কেন? মাইনেটা অবশ্য স্কুল মাস্টারের পক্ষে লোভনীয়। ইনার লাইন। পাস, পারমিট ছাড়া নেফাতে প্রবেশ নিষিদ্ধ। কিন্তু অনেক সুযোগ-সুবিধে। থারটিথ্রী গ্র্যাণ্ড ওয়ান থার্ড গ্র্যালাউয়েল। ফ্রি হাউস, ফ্রি মেডিক্যাল

টিউমেণ্ট। রান্না করবার লোক। তাকে আমার পকেট থেকে মাইনে দিতে হবে না। ট্যুরে গেলে ডবল ভাত। আরো অনেক রকম সুযোগ সুবিধে ছিলো। মনে মনে ভাবি এখানে আসা কি শুধু টাকা আর সুখের জন্ত! নেফার আকর্ষণ কি কিছুই ছিলো না! এ্যাডভেঞ্চার? নূতনকে জানবার আগ্রহ? এ সব কিছুই নয়? স্ত্রী নেই। পুত্র, কন্যা কিছুই নেই। আমার অসুবিধে কিসের। জীবনে একটা মস্ত সুযোগ। ভাবলাম ঘুরে আসি নেফা। কিন্তু এ ইন্সপেকসন্ বাংলাদেশে না উঠলেই বোধ করি ভালো ছিলো। আশেপাশে কারা যেন সব ফিস্ ফিস্ করে কথাবার্তা বলছে। কান পেতে শুনি। শোনার ভুল না তো! না সত্যি। ফিস্ ফিস্ করে কারা যেন সব কথাবার্তা বলছে। না। কেউ কথা কইছে না। এ হাওয়ার কারসাজি। হাওয়াতেই এসব করছে। দরজায় করাঘাত নয়। ইন্সপেক্-সন্ বাংলোর দরজা-জানলার সঙ্গে হাওয়ার এ এক গোপন বড়যন্ত্র।

\*

\*

বিশ্বনাথ নন্দী পাশিঘাট হাসপাতালের ডাক্তার। সদাহাস্তময়। প্রাণখোলা, দিলদরিয়া মানুষ এ বিশ্বনাথ নন্দী। মানুষকে আপন করে নিতে তার হৃদয় সময়ও লাগে না। ইন্সপেকসন্ বাংলাদেশে আমি রয়েছি জেনে সন্ধ্যাবেলা নন্দী চলে এসেছে আমার খোঁজখবর নিতে। এসেছে সন্ধ্যার একটু পরেই।—“এসে গেলুম স্ত্রীর আপনার সঙ্গে আলাপ পরিচয় করবার জন্তে।”

হাতের ছাতা আর রেইনকোট নামিয়ে রাখতে রাখতে বলে বিশ্বনাথ নন্দী।

—“বসুন। বসুন।” চেয়ারটা এগিয়ে দেবার ফাঁকে একঝলক লোকটাকে দেখে নিই। মাথায় বেঁটে। শক্ত আর জোয়ান লোকটা। চওড়া কপাল। প্রশস্ত বুক। হাতে বুক প্রচুর লোম নিয়ে লোমশ পুরুষ। ব্যাকব্রাশ করা চুল। কয়লা-কালো গায়ের রং। প্রকৃতি ভেজাল দেবার চেষ্টা করেনি। চলাফেরার ভেতর শরীরের ওজন

পরিস্ফুট।—“আমার পরিচয়টা জানতে চাইছেন তো?” কিছু বলবার আগেই সে বলে—“আমার নাম ডক্টর বিশ্বনাথ নন্দী। পাশিঘাট হাসপাতালের ডাক্তার। কারণ অকারণে রোগী মেরে ফেলি বলে আমাকে কেউ বদনাম দেবে না।” বলেই নন্দীমশায় হা হা করে হেসে ওঠে। হাসি নয় যেন সমস্ত ইন্সপেক্‌সন্ বাংলোটা কাঁপিয়ে ছাড়ে।—“সমস্ত পাশিঘাটের খোঁজখবর নেওয়া আমার কাজ। তাই আমাকে সবাই পাশিঘাটের গেজেট বলে। ডিভিসনাল ইন্সপেক্‌টোরের কাছে শুনেছিলাম আপনার পাশিঘাট স্থলে চাকরি হয়েছে। আর পাশিঘাটে আপনার উপস্থিতি ঘোষণা করেছে আমাদের চক্রবর্তী। পলিটিক্যাল অফিসের হেডক্লার্ক। আপনার এখানে পৌঁছুবার খবর পেয়ে ভাবলাম যতো তাড়াতাড়ি সম্ভব আপনার সঙ্গে আলাপ পরিচয়ের পূর্বটা সেরে আসি।” নেভানো চুরুটটা বিশ্বনাথ দাঁতে জোরে চেপে ধরে ফস্ করে কাঠিটা ধরিয়ে তাতে অগ্নিসংযোগ করে।

—“এসে খুব ভালো। কাজ করেছেন। তা জায়গাটা কেমন লাগছে?” প্রশ্ন করে বিশ্বনাথ নন্দী।

—“আজ ছপুরবেলা এখানে এসে পৌঁচেছি। এর ভেতর মস্তব্য পেশ করা উচিত নয়। তবে এখানে পৌঁছেই বুঝতে পারছি কি ভীষণ নির্জনতার মধ্যে এসে পড়েছি। এ নির্জন পরিবেশ বড়ো অস্বস্তিকর।”

—“পাশিঘাটকে নির্জন বলছেন! নেফার অভ্যন্তরে যাননি এখনো। গেলে বুঝতেন। যদি যেতেন কামেং ডিভিসনের টোয়াং অঞ্চলে, সুবনসিরির ডাপরাজিও সিয়াং-এর টুটিং অঞ্চল ছাড়িয়ে, আরো উত্তরে আর লোহিতে ওয়ালাং-এর পথে। টিরাপ আর ব্রহ্ম সীমান্তে গেলে বুঝতেন অরণ্য আর নির্জনতা কি ভীষণ বস্তু! নির্জনতা সম্বন্ধে ভেবেছেন কি মরেছেন। শ্রেফ চোখ, নাক, কান বুজে কাজকর্ম করে যাবেন। হবিটবি আছে নাকি কিছু?”

—“না, তেমন কিছু নেই।”

—“থাকলে ভালো ছিলো। সময় কাটতো।” বলে নন্দী।

—“আপনার কিছু হবি আছে নাকি ?” আমি জিজ্ঞাসা করি ।

—“আলবৎ আছে । নাটক মঞ্চস্থ করবার বড়ো শখ মশাই । পাশিঘাটে তেমন সুযোগ-সুবিধে কোথায় । তবে পাশিঘাটে বৎসরে একটা কি দুটো নাটকের ব্যবস্থা আমাকেই করতে হয় । সংসার পেতেছেন ?”

—“না ।”

—“ব্যাচেলার ! খুব ভালো । ঠিক আমার মতো । এখানে সঙ্গী, ক্লাব, আড্ডা এবং হবিটবি ছাড়া দিন কাটানো অসম্ভব । আর আমি ওসব নিয়েই বেঁচে আছি । সিনেমা নেই, থিয়েটার নেই । দোকান-পত্ৰ নেই । রাস্তাঘাটের অবস্থা খুব ভালো নয় । নেফার অভ্যন্তরে গেলে অরণ্যের ভেতর সরু সরু পায়েচলা পথ । পাশিঘাটে সন্ধ্যার পর পথেঘাটে লোকের দেখা মেলা ছুঁকর । অরণ্য আর অরণ্য । এপ্রিল মাস থেকে বর্ষা শুরু হয় । চলে সেই অক্টোবর মাস পর্যন্ত । একনাগাড়ে বিশ-বাইশ দিন পর্যন্ত বৃষ্টি পড়তে থাকে । সাধারণতঃ পাশিঘাটে প্লেন নামে সাতদিনে একদিন । বর্ষার সময় ছ’তিন সপ্তাহেও প্লেন নামতে পারে না । ও-সময়ে ব্রহ্মপুত্র পাড়ি দেওয়া অসম্ভব । ব্রহ্মপুত্র-তীরে ওইরামঘাট অনেক দূরের পথ । অরণ্যে ঢাকা পার্বত্য পথে পৌঁছতে অনেক কষ্ট । অনেক পরিশ্রম । নেফাতে বৃষ্টিপাতের পর সমস্ত জল নেমে যায় ব্রহ্মপুত্রের বুকে । তখন ব্রহ্মপুত্রের কি রূপ ! বাপ্ ! অসংখ্য গাছের গুঁড়ি ভেসে চলে তীব্রগতিতে । নৌকো সামনে পড়লে ছুঁক ক করে ছেড়ে দেয় ।”

—“এরকম ঝড়জল মাথায় করে জলকাদা ভেঙ্গে জঙ্গল রাস্তায় অন্ধকারের ভিতর চলে এলেন ! একটা টর্চও সঙ্গে দেখছিলেন । ভয় করলো না ?” প্রশ্ন করি আমি ।

—“অভোস হয়ে গেছে । ভয়টয় চলে গেছে । টর্চটা রেন্-কোটের পকেটে রয়েছে । বের করবার কথা মনে হয়নি । অন্ধকারে পা চালিয়ে দিয়েছি ।” বিশ্বনাথ নন্দীর চুরুটের আগুন নিভে গেছে ।

চুরটে আবার সে অগ্নিসংযোগ করবার চেষ্টা করছে। সিয়াং নদীর ওপর দিয়ে উন্নত হাওয়া বয়ে চলেছে। শব্দ হচ্ছে সোঁ সোঁ করে। বৃষ্টির ঝাপটা এসে লাগছে ইন্সপেক্‌সন্ বাংলোর গায়ে। সারা আকাশে মুহুমূহুঃ বিদ্যুৎ চমকাচ্ছে। মনে হয় সারা আকাশে জ্বলন্ত একঝাঁক সাপ ছুটোছুটি করে বেড়াচ্ছে।

—“এখানে থাকলে ভয় আপনারও চলে যাবে।” বলে বিশ্বনাথ নন্দী।

—“সাপটাপ কেমন?” প্রশ্ন করি।

—“প্রচুর। যারা আছে তাদের কামড়ে নাকি লোক ঘণ্টাখানেকও টেকে না।”

—“সর্বনাশ!”

—“এখানকার জেঁক সাংঘাতিক। বলতে পারেন বিশ্ববিখ্যাত। গাছের পাতা থেকে টুপটুপ করে মাথার ওপর জেঁক পড়ে। বর্ষার সময় সবাই বলে ঘাসের ডগা গোনা যায়। কিন্তু জেঁক গুনে শেষ করা যায় না। সংখ্যায় তারা অগণিত, অসংখ্য। মানুষের বা জন্তুজানোয়ারের গন্ধে ওরা পাগলের মত হয়ে যায়। কোমর পর্ষন্ত শরীরটা উঁচু করে তুলে ধরে শিকার দেখে নেয়। তারপর লাফিয়ে ছোট্টে রক্তের সন্ধানে।”

—“তা সত্ত্বেও জলকাদা ভেঙ্গে এরকমভাবে এলেন, টর্চটা জ্বালাতে পর্ষন্ত ভুলে গেলেন!”

—“ভালো কথা বলেছেন। সারকিট হাউসের পেছনে আর এডুকেশন্ কলোনির সামনের জংলা রাস্তাটা ধরে এসেছি। খানা-ডোবা ওখানে কম ছিলো না। দেখি কটা জেঁক ধরলো আমাকে।” বিশ্বনাথ নন্দী প্যাণ্টের কাপড় খানিকটা গুটিয়ে বিরাট মাস্‌ল-পুট্ট পাখানা চেয়ারের ওপর মেলে ধরে।

“পায়ের মাস্‌ল দেখছেন? গোলের সামনাসামনি পায়ে বল পড়লে গোলকীপার কাঁপতো?” পা ছুখানা আলোর সামনে ধরতেই

দেখা যায় বেশ কয়েকটা জোঁক পায়ের মাংস থেকে ঝুলছে। রক্ত  
খেয়ে দিব্যি পুষ্ট হয়ে উঠেছে।

আমি শিউরে উঠি।—“করেছেন কি মশাই! এতো রক্ত চুষে  
খেয়ে নিলো টের পেলেন না? টেনে ফেলে দিন একটা একটা করে!”  
আমার শরীরটা কেমন ঘিন্ ঘিন্ করতে থাকে। হাসে নন্দী।

—“ওর দাওয়াই রয়েছে সজে।” বিশ্বনাথ নন্দী ছু-পকেট থেকে  
ছুটো পুরিয়া বের করে।

—“একটাতে রয়েছে ছুন। আরেকটাতে তামাকপাতা। ছুটোই  
জোঁকের যম।” নন্দীমশাই ততক্ষণে ছুটো মোক্ষম অস্ত্র জোঁকদের  
বিরুদ্ধে প্রয়োগ করেছে। ওরা সজে সজে বাঁধন আলগা করে মাটির  
ওপর টুপটুপ করে পড়তে শুরু করেছে। ওদের শরীরের ওপর ছুন  
ঢালতে শুরু করেছে নন্দীমশাই। আর সজে সজে উপভোগ করছে  
ওদের শারীরিক যন্ত্রণা।

—“সব কিছু দেখতে হলে আপনাকে নেফার অভ্যন্তরে ঢুকতে  
হবে।”

—“আমাকে বোধ করি বছরখানেক বছর দেড়েকের জগ্রে পাশিঘাট  
ছেড়ে বেরুতে হবে না। মানে বদলি হবে না বলেই ভাবছি।”

—“সে কি মশাই! আপনার জগ্রে ধাপে ধাপে প্রমোশন্ সাজানো  
রয়েছে। অ্যাসিস্টেন্ট হেডমাস্টার। হেডমাস্টার। ডিভিসনাল্  
ইন্সপেক্টার। তারপর ডিভিসনাল্ ইন্সপেক্টার। অল্প বয়স।  
লেখাপড়া জানা ছেলে। সামনে আপনার উজ্জ্বল ভবিষ্যৎ।”

—“না না, অতোশতো ভাবিনে আমি।”

—“আপনাকে কিছু ভাবতে হবে না। নেফা সার্ভিসে প্রমোশন্  
বডো কুইক্। তবে সারাটা নেফা চষে বেড়াতে হবে। এ আপনার  
প্রভিন্সিয়াল সার্ভিস্ বা সেন্টারের চাকরি নয়। নেফার চাকরির জগ্রে  
বিজ্ঞাপন দিয়ে সহজে লোক পাওয়া যায় না। সেন্টার আর  
প্রভিন্সিয়াল সার্ভিসের লোক সহজে এখানে আসতে চায় না। এখানে

বদলির কথা শুনে লোক আঁতকে ওঠে। তাই এখানে মাইনে আর  
গ্যালাউয়েন্স নিয়ে অনেক টাকা। সুখসুবিধে অনেক।”

—“নেফাতে রোগ কিরকম রয়েছে?”

—“সব রোগই রয়েছে। কলেরা, পেটের নানারকম রোগ, বসন্ত,  
টাইফয়েড, ম্যালেরিয়া, আমাশা টি, বি আর গলগণ্ড।”

—“টি, বি কেন?”

—“পাহাড়ী পথে প্রচুর ওঠানামা করতে হয়। ভারী ভারী মাল  
মাথায় নিয়ে চলাফেরা করতে হয়। খাওয়াদাওয়া ঠিকমত হয় না।  
তাছাড়া পার্বত্য জাতিগুলো দুধ খাবে না।”

—“কেন?”

—“ওরা বলে ওটা গরুর পাস। তাই খায় না। তবে আজকাল  
যারা লেখাপড়া শিখছে, পাঁচটা জানছে শুনেছে, তারা খাচ্ছে।  
নিয়মকানুন ধীরে ধীরে বদলাচ্ছে।”

—“গলগণ্ড রোগও রয়েছে?” আমি প্রশ্ন করি।

—“পাশিঘাটে আর তার আশেপাশে ও রোগের খুব আধিক্য  
রয়েছে। জলে আয়োড়িনের অভাব। চৌকিদারকে ডাকুন না।  
এক কাপ চা না হলে গল্ল জমছে না।”

—“চৌকিদার খাবার ঢাকা দিয়ে অনেকক্ষণ হল চলে গেছে।  
আপনাকে চা না দিতে পেরে বড্ডো লজ্জিত বোধ করছি। বাড়িঘর  
হলে প্রত্যেক সন্ধ্যায় আপনাকে চা অফার করবো কথা বলে দিচ্ছি।”

—“গুড্। লজ্জিত হবার কিছু নেই। চৌকিদারের কে এক  
নিকটআত্মীয় হাসপাতালে রয়েছে। চৌকিদার তার কাছে গেছে।  
রাতের বেলা কাছে থাকবে। সীটের বন্দোবস্ত আমাকেই করতে  
হয়েছে। ওদের কি আর সহজে হাসপাতালে ভর্তি করা যায়!  
নিজেদের দাওয়াই খেয়ে ওরা নিশ্চিন্ত আর সঙ্গে সঙ্গে নানারকম  
পূজো-পার্বণ। ভূত, প্রেত, পাহাড়, জঙ্গল সবাইকে ওরা পূজো করে।  
মিথোন নামে মহিষের মতো দেখতে জানোয়ার মেরে দেবতা আর

অপদেবতার কাছে উৎসর্গ করে ।”

—“কতরকমের পূজো-পার্বণ এখানে রয়েছে ?”

—“এ অঞ্চলের কতগুলো পূজো-পার্বণের কথা বলছি । পুঁইমে বা সাপ পূজো । বছরের প্রথমে হয় । লোকেরা পূজোর দিন ঘরের বাইরে যায় না । পাছে সাপ কামড়ায় । তারপর রয়েছে টাপু পূজো । এ পূজো করলে মানুষের সংখ্যা নাকি বাড়ে ।

“বিভিন্ন ট্রাইবস্দের লোকসংখ্যা খুব কম । অনেক ট্রাইবস্-এর প্রায় লোপ পাবার অবস্থা । সুতরাং এ পূজোর ওপর তাদের খুব ঝোঁক । আর রয়েছে চলোং পূজো । জুলাই মাসে হয় । গরীবদের ধনী লোকেরা খেতে পরতে দেয় । মাঘ মাসে আরাণ পূজো । ওদের বিশ্বাস মৃত আত্মীয়স্বজনের আত্মা পূজোর আগের দিন ঘরে ঢুকে থাকে । তাদের উদ্দেশ্যে ঘরের চালে মদ মাংস টাঙিয়ে রাখা হয় ।”

—“আচ্ছা । এখানে অনেক ট্রাইবস্ রয়েছে, তাই না ?” আমি প্রশ্ন করি ।

—“অনেক । অনেক । মোটামুটি কয়েকটির কথা বলছি । কামেং ডিভিসানে মন্পাস্, আকাস্, সেরঙ্কুপেনস্ আর মিকিস্ । সুবনসিরি অঞ্চলে ডফ্‌লাস্ । আপাটানঙস্ । সিয়াং-এ পদমস্, পাশিস্, পাজিস্, মিনিয়ঙস্ আর গালঙস্ । লোহিতে খাম্‌টিস্ আর মিস্‌মীস্ । টিরাপে সিঙফোস্, নক্টেস্, ওয়াংচোস্ আর ট্যাংছাস্ ।

“মাত্র অল্প কয়েকটা ট্রাইবের কথা বললাম । এছাড়া আরো অনেক রয়েছে । ধীরে ধীরে সব জানতে পারবেন ।”

—“নেফা যে এতো বৃহৎ তা ধারণা ছিলো না !”

—“নেফার আয়তন ৩০,০০০ বর্গমাইল । এর পশ্চিমে ভুটান । উত্তর ও উত্তর-পূর্বে তিব্বত আর চীন । দক্ষিণ-পূর্বে ব্রহ্মদেশ । নেফার জঙ্গলে সেদিন পর্যন্ত চলেছে দাস-ব্যবসা । নরমুণ্ড অশ্বেষণ । এক ট্রাইব অতর্কিতে আক্রমণ করে অণু ট্রাইবকে নিশ্চিহ্ন করেছে । মানুষ চুরি, আফিং-এর চোরাকারবার চলেছে । তবে স্বাধীনতা পাবার পর



অবস্থার অনেক উন্নতি হয়েছে। রাতের বেলা আপনার ভয়টয় করবে না তো ?”

—“না না।” অনেক সাহস সঞ্চয় করে বলি।

—“সিয়াং-এর মতিগতি কিন্তু ভালো নয়। সিয়াং আধখানা পাশিঘাট খেয়েছে আর আধখানার ওপর ওর লোভ রয়েছে। ইন্সপেক্‌সন্ বাংলো যে-কোনো দিন ভাসিয়ে নিয়ে যেতে পারে।”

—“বলছেন কি ?”

—“হ্যাঁ। ঠিকই বলছি। তবে পলিটিক্যাল অফিসের লোকেরা চোখ নাক কান খোলা রেখেছে। সিয়াং-এর মতিগতি খারাপ দেখলেই সারা পাশিঘাটের লোকদের সতর্ক করে দেবে। আপনিও চোখ নাক কান খোলা রেখে ঘুমুবেন।” বলে বিশ্বনাথ নন্দী।

—“চোখ কান খোলা রেখে কি কেউ ঘুমুতে পারে ?”

—“খুব পারে। পারা যায় মশাই, পারা যায়। জানেন তো সিয়াং বড্ডো অবুঝ। আচ্ছা গুড নাইট।” নন্দীমশাই অন্ধকারের ভেতর অদৃশ্য হয়ে যায়। সে রাত্তিরে এসব ছাড়াও ডাক্তার নন্দী একটা ভূতুড়ে কাহিনী আমাকে শুনিয়েছিলো। ওই নির্জন বাংলোতে ওই পরিস্থিতির ভেতর ও কাহিনী না বললেই ভালো ছিলো। ডাক্তার নন্দী তখন প্রথম পাশিঘাটে এসেছে। একটু বেশী রাতে কল পেয়ে সে রোগী দেখতে গিয়েছিলো। ইন্সপেক্‌সন্ বাংলোর আশেপাশে তখন গভীর অরণ্য। দুর্ভেদ্য জঙ্গল সাফ করে মাঝে মাঝে পদমদের ঘর। পাশিঘাটের ক্রাফট সেন্টারকে ডানহাতে রেখে। ইন্সপেক্‌সন্ বাংলোর দিকে না গিয়ে ডাক্তার গ্রাম উন্নয়ন কেন্দ্রের পথে এগিয়ে-ছিলো। বালি ময়াং নাকি খুব অসুস্থ। বাঁচবার আশা নেই। তাকে দেখতে যাবার জন্তে বালি ময়াং-এর ঘর থেকে ডাক্তারের কাছে লোক এসেছিলো। বালি ময়াং ও অঞ্চলে নামজাদা ডাকসাইটে লোক। না গেলে নয়। ডাক্তার লোকটাকে বিদায় দিয়েছিলো। ওর সাহায্য ছাড়াই ডাক্তার নন্দী এদিকে এসেছিলো। কিন্তু কিছুদূর এগিয়ে সে

বৃহতে পারলো যে জংলা রাস্তায় সে পথ হারিয়েছে। ডাক্তার নন্দী ছোটবেলা থেকেই ডানপিটে। ভয়ডর বলে তার কিছু জানাই ছিলো না। সাহসে ভর করে সে এগিয়েছে। কোমরে তার বিরাট ছুরি। হাতে টর্চ। ভয়টা কিসের? হঠাৎ জঙ্গল থেকে একটা মেয়ে বেরিয়ে আসে। আশেপাশে বাড়িঘরের চিহ্ন বা আলোর চিহ্ন নেই। মেয়েটা অন্ধকারের ভেতর এসময়ে কোথা থেকে বেরিয়ে এলো? ভাবে ডাক্তার নন্দী। আশেপাশে ঘরদোর বা আলোর চিহ্নটুকু দেখতে পাচ্ছে না ডাক্তার নন্দী। মেয়েটি কথাবার্তা বলে না। তার পিছু পিছু যাবার জন্তে সে ডাক্তারকে ইঙ্গিত করে। ডাক্তার এগোয় না।—“বালি ময়াং-এর ঘর চেনে?” জিজ্ঞেস করে ডাক্তার। মেয়েটা উত্তর দেয় না। ডাক্তার আবার তাকে বালি ময়াং-এর ঘর-এর কথা জিজ্ঞেস করে। মেয়েটা উত্তর দেয় না। হাতের আঙুল তুলে ওর পিছু পিছু এগোবার জন্তে ডাক্তারকে ইঙ্গিত করে। উপায় নেই। পথঘাট সম্পূর্ণ অচেনা। চারদিকে ঘুটঘুটে অন্ধকার। টর্চের আলোতে যেটুকু দেখা যায়।

ডাক্তার বাধ্য হয়ে ওকে অনুসরণ করে। ওর পিছু পিছু চলতে চলতে শেষ পর্যন্ত যে ঘরে ডাক্তার পৌঁচেছিলো সেটা বালি ময়াং-এর ঘর নয়। তবে অগ্নি এক রোগিনীর চিকিৎসে ডাক্তারকে করতে হয়। নাড়ী টিপতে গিয়ে ডাক্তার চমকে ওঠে। এতো ঠাণ্ডা হাত! রোগিনীর মুখ দেখার উপায় নেই। ডাক্তার নাড়ী টিপে প্রেসক্রিপশান্ লিখে চলে এসেছে। মেয়েটা সারাটা রাস্তা পথ দেখিয়ে এনেছে। ক্রাফ্ট সেন্টারের কাছাকাছি এসে মেয়েটি অদৃশ্য হয়ে যায়। যেমন নিঃশব্দে সে এসেছিলো। তেমনি নিঃশব্দে সে মিলিয়ে যায়। চারধারে টর্চের আলো ফেলে ডাক্তার তার কোনো হৃদিস করতে পারে না। এ পর্যন্ত সব ঠিক ছিলো। ডাক্তার পথ হারিয়ে ছিলো। এক রোগীর বদলে অগ্নি এক রোগিনী দেখে এসেছে। তাতেও বলবার কিছু ছিলো না। কিন্তু মুন্সিল হল তখনুনি যখন দিন দুয়েক পরে নেহাৎ কৌতূহল মেটাবার উদ্দেশ্যে ডাক্তার দিনের বেলা রোগিনীর খোঁজ করতে গিয়েছিলো।

ডাক্তারের সঙ্গে ছুজন পদম ছিলো। ডাক্তার আপ্রাণ চেষ্টা করেও রোগিনীর ঘরের সন্ধান করতে পারেনি। রোগিনীর পাস্তা মেলেনি। ও অঞ্চলে কেউ অসুস্থ হয়েছে এ খবরটুকু পর্যন্ত পদম ছুজনের জানা ছিলো না। ডাক্তার আন্দাজ করে তাদের যে জায়গায় নিয়ে এসেছিলো সেখানে কোনোদিনই কোনো বসতি ছিলো না। সেখানে ছিলো গভীর অরণ্য। ডাক্তার যখন ওদের সঙ্গে তর্ক-বিতর্কের ঝড় তুলেছে, যুক্তিজালের কঠিন বাঁধনে ওদের বাঁধবার চেষ্টা করেছে ঠিক তখনি একটা গাছের নীচে ডাক্তারের লেখা প্রেসক্রিপশান্টা পাওয়া যায়। প্রেসক্রিপশান্ রয়েছে অথচ রোগিনী নিখোঁজ! ঘরবাড়ির চিহ্ন পর্যন্ত নেই। ডাক্তার নন্দী ইন্সপেক্‌সন্ বাংলা চলে যাবার আগে বলেছিলো—“সে পথ যে দেখিয়ে নিয়ে গিয়েছিলো নিশ্চয়ই নেনী ময়াং।” নেনী ময়াং সম্বন্ধে সে মুহূর্তে কিছু জানবার আগেই ডাক্তার অদৃশ্য হয়েছে। পরে অবশিষ্ট অনেক কিছু জেনেছিলাম।

## ॥ দুই ॥

এই মুহূর্তে যার কথা বার বার মনে হচ্ছে সে হল লুটিং ময়াং। লুটিং ময়াংকে ভোলা সম্ভব নয়। ভোলা সম্ভব নয় বোলেং-এর সেই রাতটা। বোলেং-এর বাঁশের ঘরে সন্ধ্যাটা কেমন যেন থমথমে। পাশিঘাট থেকে রেজিন। রেজিন থেকে রটুং, রটুং থেকে ইয়ামবুং, ইয়ামবুং থেকে পাজিন্, আর পাজিন্ থেকে বোলেং। অরণ্য আর অরণ্য, পাহাড়ের পর পাহাড়। পার্বত্য শ্রোতস্বিনীগুলোতে কি অসম্ভব শ্রোত। শিবকরণ, সিলে, সিরকি, লিঙ্গুরণ আর ছুরাকরণ—তাছাড়া আরো অসংখ্য নদী। নদীগুলোর ছধারে পাথর আর ছুড়িতে বোকাই। নদীগুলোর ওপরে ছলছে বাঁশ আর বেতের সব সেতু। ছলছে আর ছলছে। দু-তীরের বিরাট বিরাট গাছের সঙ্গে দড়ি আর বেত দিয়ে সেতুগুলোকে বাঁধা হয়েছে। দড়ির বাঁধন খুলে গেলে, বেত খুলে গেলে, মানুষস্বন্ধ সেতুগুলো নেমে যায় শ্রোতস্বিনীর বুকে। তারপর কোথায় মিলিয়ে

যায়, হারিয়ে যায়, কেউ জানে না। সন্ধ্যার অন্ধকার নামবার আগে লিখুকরণ আর ছরাকরণের জলে ডোরাকাটা বাঘের দল এসে মুখ ডোবায়। জল পান করে আর এদিক্ ওদিক্ লুক্ক দৃষ্টি ফেলে শিকার খোঁজে। ওদের পেছনে ফেউ ঘোরে। ওরা জঙ্গলের অগাছ প্রাণীদের সাবধান করে দেয়। এক-একটা হাতীর দল জঙ্গলের গাছ আর ডাল-পালা ভাঙতে ভাঙতে জলের সন্ধানে স্রোতস্থিনীর দিকে এগিয়ে আসে। তারা শুঁড় তুলে আকাশের দিকে ধুলো ছুঁড়ে চারদিক অন্ধকার করে ফেলে। বগা গাছগাছড়া, লতাপাতা আর শিকড় খায়। বিরাট মাথা আর সাংঘাতিক চওড়া কপালের ধাক্কা দিয়ে গাছগুলোকে মাটিতে শুইয়ে দেয়। শুঁড়ে জল নিয়ে ফোয়ারার সৃষ্টি করে। বিরাট বিরাট কানগুলো ঘন ঘন আন্দোলিত করে। তাদের হুঙ্কারে বনভূমি কেঁপে ওঠে। ছোটো ছোটো প্রাণীরা ভয়ে দিশাহারা হয়ে এদিক ওদিক ছুটে পালায়। হরিণের এক-একটা বিরাট দল কান খাড়া করে কি যেন শোনে তার পর উন্টোদিকে দৌড়োতে শুরু করে। বানর আর হনুমানগুলো এক গাছ থেকে অগা গাছে লাফঝাপ শুরু করে দেয়। কিচিরমিচির করে বিপদ ঘোষণা করে। সন্ধ্যার জমাট অন্ধকার নেমে আসে রেঙ্গিন, রতুং, ইয়ামবুং, পাঙ্গিন্ আর বোলোং-এর অরণ্যে। পাহাড়গুলোকে ঠিক যমদূতের মতো দেখায়। বাঁশের ঘরের ভেতর সি পি ডব্লুডির ইঞ্জিনিয়ার বালু গম্ভীর মুখ করে বসে আছে। টানছে একটার পর একটা সিগারেট। পাশে লুটিং ময়াং-এর মুখে চিস্তার ঘন কালো ছায়া। একটা টিলার ওপর বাঁশের ঘরটা। বাঁশ আর বেতের তৈরী ঘরের ভেতর অসংখ্য হিজ্র-পথে প্রচুর হাওয়া বয়ে এসে হ্যারিকেনের আলোটা নিভিয়ে দিতে চায়। বাঁশের তৈরী ঘরগুলোকে ওখানে “বাসা” বলে। বালু ওই বাঁশের ঘরে একলা থাকে। এ অরণ্যে বালু রাস্তা বানাচ্ছে। প্রথমে পায়ে চলার রাস্তা। তারপর জীপ চলার রাস্তা। ধীরে ধীরে রাস্তা চওড়া করতে হবে। চওড়া করতে হবে ট্রাক্ আর বড়ো বড়ো গাড়ী চলাচলের জন্ত। বড়ো পরিশ্রম। কঠিন মেহনত। ডিনামাইট দিয়ে পাহাড় ওড়াতে ওড়াতে

বেতের খাপের ভেতর ঝকঝকে দা ঝুলছে। সে মাথায় ভালুকের চামড়ার তৈরী টুপী পরেছে। বোলেং-এর অরণ্যে বিরাট ভালুকটার সঙ্গে একলা ঘণ্টাখানেক যুদ্ধ করবার পর সে ওটাকে মেরেছিলো। ভালুকটা লুটিং-এর একটা চোখ নখ দিয়ে উপড়ে নিয়েছিলো। লুটিং-এর তাই সম্বল মাত্র একটা চোখ। সে চোখটা আবার রক্তবর্ণ। প্রচুর আপঙু (স্থানীয় মদ) পান করার ফলে এ অবস্থা। তার কানে বিরাট বিরাট ছটো গর্ত। আর সে গর্তে জীবজন্তুর হাড়ের তৈরী গয়না গোঁজা রয়েছে। দাড়ি-গোঁফে আচ্ছাদিত দৈত্যের মতো দেখতে লুটিংকে দেখলে ভয়ে বুকটা কেঁপে ওঠে। বোলেং-এর অরণ্যে রাতের বেলা লুটিংকে দেখে ভয়ে আমি বার বার কেঁপে উঠেছিলাম।

ইয়াম্ বৃং থেকে তার পোষা মেয়ে হাতীটা পালিয়েছে। পালিয়েছে কয়েকটা জংলা মদা হাতীর সঙ্গে। তার পোষা শাস্ত হাতীটা একদল বহু হাতীর সঙ্গে চলে গেছে। লুটিং ময়াং-এর কতো আদরের ছিলো এ হাতীটা। এতোটুকুন একটা বাচ্চা থেকে ওকে সে এতো বড়ো করেছিলো। নিজের হাতে লুটিং ওকে খাওয়াতো। কলাগাছ, গাছের ডাল, আখ, বাঁশ আর বাঁশপাতা লুটিং-এর হাত থেকে খেতে খেতে হাতীটার চোখ আনন্দে বুজে আসতো। ইয়াম্ বৃং-এর জঙ্গলে বাচ্চা হাতীটা মা বাপ হারিয়ে কেঁদে কেঁদে বেড়াচ্ছিলো। লুটিং দেখতে পায় আর দেখতে পেয়ে ওকে নিয়ে এসেছিলো। তারপর কত আদর যত্নে ওকে লুটিং বড়ো করে তুলেছে। লুটিং-এর চারটে বউ। কমিং ময়াং, ওপেট্ ময়াং, লোলিং ময়াং আর ছোটো বউটার নাম ওনে ডাই। হাতীটাকে আদর-যত্ন করতে গিয়ে সে প্রচুর বাধা-বিপত্তির সম্মুখীন হয়েছে। চারটে বউ-এর কাছ থেকে সে অনেক বাধা পেয়েছে। হিংসেতে ওরা জ্বলে মরতো। বিশেষ করে ছোটো বউটা বড্ডো বিগড়াতো। রাগে, অভিমানে ছোটো বউটা মাঝে মাঝে খাওয়া পর্যন্ত বন্ধ করতো। লুটিং তাকে একটু আদর করতে চাইলে হাতের কনুই দিয়ে গুঁতো মেরে বউটা পালিয়ে যেতো। লুটিংকে হাতীটার

গলা জড়াতে দেখলে ওনে ডাই ঘরে গিয়ে খিল দিতো। জঙ্গলে হাতীটাকে নিয়ে রাত কাটালে ছোটো বউটা পালিয়েছে পর্যন্ত। চলে গেছে চৌখাম্ আর ডাম্বুক গ্রামে। ভাই আর মামার বাড়িতে। একবার মজা দেখবার জন্তে লুটিং একটা বিয়ের বন্দোবস্ত করলে। হাতীটার সঙ্গে তার বিয়ে। এমনি একটা স্মৃতি আর কি! খানিকটা মজা। পুরোহিত এনেছিলো লুটিং। প্রচুর ধূমধাম করেছিলো। মিথোন কেটেছিলো। অনেকগুলো শুয়ের কেটেছিলো। পানীয় হিসাবে প্রচুর আপঙ-এর ব্যবস্থা করেছিলো। হাতীটাকে ভালো করে স্নান করিয়েছিলো। ফুলের মালা পরিয়েছিলো। ডিমের সঙ্গে আদা গুলে তা আপঙ-এর সঙ্গে মিশিয়ে ঘরের চালে লটকিয়ে দিয়েছিলো। মৃত আত্মীয়স্বজনের আত্মারা এসে খাবে এবং খেয়ে তৃপ্ত হবে। ধূমধাম সে মন্দ করেনি। দূর দূর গ্রাম থেকে লোক এসেছিলো আনন্দ করতে। মজা দেখতে। এমন কি নিংকু আর মৈকারুইং গ্রাম থেকে পর্যন্ত লোক এসেছিলো। চার বউ-এর কি রাগ। লুটিং তাদের বোঝালে। বললে—“আরে এটা একটা মজা। খানিকটা হৈ-চৈ করা।” তা তারা কি শোনে! ওবা উৎসবে যোগ পর্যন্ত দিলে না।

ছোটো বউ-এর জন্তে লুটিং একটা ভালো খাবার পর্যন্ত বানিয়েছিলো। একটা কুকুরকে একমাস খাইয়েদাইয়ে পুষ্ট করে পরে তাকে মেরে তার পেটে চাল ভরে আগুনে বলসিয়ে লুটিং ছোটো বউ-এর জন্তে নিয়ে এসেছিলো। এনেছিলো অগ্নি বউদের না জানিয়ে। তা ছোটো বউ স্পর্শ পর্যন্ত করলে না। যাক্ গিয়ে। লুটিং পরোয়া করে না। বউদের আপত্তি লুটিং গায়ে মাখেনি। তাদের জন্তে সে কোনো দিনই মাখা ঘামায়নি। তার হাতীর পিঠে চড়ে সে কতো দুর্গম পথে পাড়ি জমিয়েছে। শীতের দিনে সে ওর পিঠে চড়ে অনায়াসে শিবকরণ আর লিম্বুকরণ পার হয়ে গেছে। পাশিঘাটের পথে পথে ওর পিঠে চড়ে লুটিং ঘুরে বেড়িয়েছে। দোকান থেকে পান সিগারেট কিনেছে। আর ওর পিঠে চড়ে ধোঁয়া ছাড়তে ছাড়তে সারা পাশিঘাট ঘুরে-ফিরে

বেড়িয়েছে। পাশিঘাটের পলিটিক্যাল অফিসে গিয়েছে ওর পিঠে চড়ে। সেখানে খাজনা জমা দিয়েছে। পলিটিক্যাল অফিসারকে হাতীটা শুঁড় তুলে অভিবাদন করেছে। পলিটিক্যাল অফিসার খুব খুশী। হাতীটা কতোরকম খেলাই না দেখাতে জানে! পলিটিক্যাল অফিসারের বাড়ির জানলা দিয়ে শুঁড় গলিয়ে মূলো বেগুন তুলে এনেছে। পলিটিক্যাল অফিসারের শুয়ে থাকা স্ত্রীর পায়ে শুঁড় দিয়ে স্নুড়স্নুড়ি পর্যন্ত দিয়েছে। তারা কতো খুশী! দু টাকা চার টাকা বকশিশ দিয়েছে। লুটিং জানে যে এ হাতীটার জন্তুই সাহেবরা তাকে এতো খাতিরযত্ন করে। শিবসাগর আর লখিমপুরের কমিশনার সাহেবরা এসেই লুটিং-এর হাতীটার খোঁজ করে। ওর পিঠে চড়ে শিকারে যায়। রাস্তার মাঝে নিজেরা চা, রুটি, কেক, ডিম খায়! লুটিংকেও ওসব খেতে দেয়। লুটিং-এর ছোটো ছোটো ছেলেমেয়েগুলোকে হাতীটা যখন শুঁড় দিয়ে পিঠের ওপর বসিয়ে দেয় তখন লুটিং-এর মনটা খুশীতে ভরে ওঠে। লুটিং-এর হাজার হাজার টাকার কাঠের কারবার। জঙ্গল থেকে সমস্ত কাঠ ঐ হাতীটাই বয়ে নিয়ে আসে। শেকলের এক প্রান্ত জড়ানো থাকে হাতীটার পায়ের সঙ্গে। অল্প প্রান্ত বাঁধা থাকে কাঠ আর গাছের গুঁড়ির সঙ্গে। ইদানীং হাতীটা তরুণী হয়ে উঠেছে। সারা অঙ্গে ওব যৌবন ঢলমল করছিলো। লুটিং লক্ষ্য করেছে হাতীটা ইদানীং কেমন যেন মনমরা হয়ে গেছে। কেমন একটা উতলা ভাব। কিরকম যেন অশ্রমনস্ক—“আমি কি ওকে একটা শক্ত-সামর্থ্য মন্দা হাতী যোগাড় করে দিতে পারতাম না! আমি কি জানিনে ওর বয়স হয়েছে! অঙ্গে যৌবনের ঢল নেমেছে! আর আমি কি জানিনে যৌবন এলে কি অবস্থা হয়?” লুটিং ময়াং বলে। ভাঙ্গা ভাঙ্গা হিন্দী আর অসমীয়া ভাষাতে লুটিং আমাকে বলে—“বয়সের কালে আমি কি না করেছি!”

মস্তুপ্ বা অবিবাহিতদের ঘরে রাত্রি জেগে পাহারা দেবার সময় লুকিয়ে মেয়ে নিয়ে এসেছি। জানেন তো গ্রামের অবিবাহিত

যুবকের দল সারারাত একটা ঘরে একসঙ্গে থেকে রাত্রি জেগে সারা গ্রাম পাহারা দেয় ! সেখানে মেয়ে নিয়ে আসা বিপজ্জনক । তাও আমি করেছি ।” লুটিং ময়াংকে দেখে কেমন ভয় ভয় করে । ওর চোখ আপড়-এর নেশায় লাল । লুটিং আবার বলতে শুরু করে —“কেবাং-এ ( গ্রাম বুড়োদের সভা ) বুক ফুলিয়ে বললাম রাতের ঘটনা । মেয়ে নিয়ে আসার জন্য আমি দায়ী । আমাকে গাছের ডালে ঝুলিয়ে বিশ ঘা বেত মারার হুকুম হল । কেবাং-এর বিচারে তাই ঠিক হল । আমাকে উলঙ্গ করে গাছের ডালের সঙ্গে বাঁধা হল । তারপর সপাসপ্ সপাসপ্ বেতের পর বেত ।” লুটিং বলতে বলতে মুখখানা এমন করছে যেন ওই মুহূর্তে বেতটা তার পিঠের উপর পড়ছে ।

—“শুনেছিলাম বেত মারার সময় হাতীটা ক্ষেপে গিয়েছিলো । আমি কয়েক ঘা বেত খাবার পরেই অজ্ঞান হয়ে গেছি । হাতীটাকে নাকি ওরা কিছুতেই বাগে আনতে পারছিলো না । ভাগ্যিস শেকলে বাঁধা ছিলো ! আমি জানি ছরস্তু যৌবনের কি জ্বালা । আমি ওকে একটা মদ্য হাতী এনে দিতে পারতাম । সম্ভান-সম্ভতিতেও ঘর ভরে উঠতো । আমি সব ব্যবস্থা করতাম ।” কিছুক্ষণ চুপচাপ । বালু একটার পর একটা সিগারেট টেনে যাচ্ছে ।—“আমার নিজের চারটে বউ । দু ছেলের দুটো করে বউ । আমি কি ওকে একটা মদ্য হাতী এনে দিতে পারতাম না ? আমাকে না বলে পালালো । আটেট বাড়কে বলে সমস্ত ঠিক করেছিলাম, আটেট হাতীর খোঁজ পেয়েছিল । দু-চার দিনের ভেতরই ব্যবস্থা হয়ে যেতো, তা বেটীর সহ্য হল না । নেমক্‌হারাম !” চিৎ করে খানিকটা থুতু লুটিং ছুঁড়ে দেয় । হতাশা, নৈরাশ্য, বেদনা আর অভিমানে সারা মুখ ভরে ওঠে ।

—“কি করে টের পেলে যে অশ্ব হাতী এসে ওকে নিয়ে গেছে ?” আমি জিজ্ঞেস করি ।

—“পায়ের ছাপ দেখে । যে খুঁটিটার সঙ্গে ওর পায়ের শেকল বাঁধা ছিলো সেই খুঁটিটা উপড়িয়ে শেকলস্বদ্ধ ওকে নিয়ে মদ্য হাতীগুলো



পালিয়েছে। প্রথমে ছোটো বউটাকে সন্দেহ করেছিলাম। রাগের চোটে বউটার গলা চেপে ধরেছিলাম। ওর নিশ্বাস-প্রশ্বাস প্রায় বন্ধ হয়ে গিয়েছিলো। মেয়েই ফেলতাম ওকে। ও মরে গেলে আমার আবার যথেষ্ট ক্ষতি হত। সাতটা শুয়োর, দুটো মিথোনের বদলে ওকে এনেছিলাম। নূতন করে মিথোন যোগাড় করা বড়ো কষ্টকর ব্যাপার।”

তবুও লুটিং পরোয়া করে না। কিন্তু বউটা শপথ খেলে।

—“হাতীর পায়ের ছাপ কোথায় দেখলে?”

—“খানিকটা দূরে একটা জলার ধারে। আমার হাতীর পায়ের ছাপ আমার জানা ছিলো। তবে সঙ্গে অনেকগুলো অপরিচিত পায়ের ছাপ। গোটাচারেক হাতী বলেই মনে হল।” লুটিং খানিকক্ষণ চুপ করে থাকে। তারপর বলে—“ছোটো বউটা আসার পর থেকেই হাতীটা কেমন হয়ে গেলো। কেমন মনমরা। কথাবার্তা শুনতে চায় না। কার্ঠের বোঝা টানতে চায় না। বাচ্চাদের পিঠে সহজে চড়াবে না।”

জিজ্ঞেস করি—“তোমার ছোটো বউ-এর ওপরেই যে চটে আছে তা বুঝলে কি করে?”

—“এ আর বোঝবার কি আছে! একদিন ছোট বউটার সাথে দাওয়ায় বসে খানিকটা ধেমালি করছিলাম। মানে খানিকটা ফণ্ডিন্টি। আপড়-এর মাত্রাটা বেশী হয়ে গিয়েছিলো। দাওয়ায় পাশ ফিরে শুয়েছি। বউটা গা ঘেঁষে বসেছে। হঠাৎ ওনে ডাই চীৎকার করে ওঠে। চেয়ে দেখি হাতীটার একটা পা ওনে ডাই-এর বুকের ওপর। ছোটো বউ ভয়ে নীল। পায়ের চাপে বোধ হয় সেদিন হাতীটা ওনে ডাইকে শেষই করে দিতো, আমি চীৎকার করতেই হাতীটা পা-টা সরিয়ে নিলো। পরে মাথা নীচু করে চলে গেলো। কি ফৌসফৌসানি! বাপ্,!”

—“এতো হিংসে?” বলি আমি।

—“ছোটো বউ-এরও হিংসে কম নাকি। এর কয়েক দিন পরেই হাতীটার খাবারের সঙ্গে কি সব বিষাক্ত জংলী লতাপাতা মিশিয়ে দিলে। হাতীটা চোখ বোজে আর কি। মুখ দিয়ে অনবরত ফেনা

গড়ালো। কাদাজলে ডোবাডুবি করলে ঘণ্টা দুয়েক। ছোটো বউটাকে ভালো মতো শাসন করেছিলাম। তা হাতীটা যে এমন ভাবে বেইমানি করবে।” —দাঁতে দাঁত ঘষে লুটিং।

—“হাতীটার কিছু খবর পোলে?” জিজ্ঞেস করে বালু।

—“রেঙ্গিন থেকে বোলে পর্যন্ত সমস্ত জঙ্গল খুঁজে দেখেছি। গতকাল ওকে দেখলাম। ইয়াম বুং-এর জঙ্গলে।”

—“কি দেখলে?”

—“ওই যা ভেবেছি। মরম আর সোহাগের জন্তে বেটা পাগল হয়ে গিয়েছিলো। চারটে মদা হাতী ওকে ঘিরে রয়েছে। আর শুঁড় দিয়ে সারা গায়ে আদর করছে। আনন্দের চোটে ও চোখ বুজে রয়েছে। রাগে গা-টা জ্বলে গেলো। মনে হল যেন নিজের বউটাকে চারটে মানুষ গুণ্ডাতে ধরে নিয়ে গেছে। বিষ্-মাখানো তীর ছুঁড়ে সব কটাকে শেষ করে দিতে চেয়েছিলাম। ধমুকে তীর লাগিয়েও ছিলাম। কিন্তু জানো, মনটা কেমন করে উঠলো। জঙ্গল থেকে এই এতোটুকুন অবস্থায় ওকে এনেছিলাম। খাইয়েদাইয়ে ওকে প্রকাণ্ড করে তুলেছিলাম। ও দশফুট উঁচু হয়ে উঠেছিলো। ওর ওজন ছিলো প্রায় পাঁচ হাজার পাউণ্ড। ও এই অরণ্যের প্রাণীদের ভেতর সব চেয়ে সেরা সুন্দরী ছিলো।” লুটিং অবশ্য হিসেবটিসেবগুলো ওদের প্রচলিত সংখ্যা এবং গণনার ওপর নির্ভর করেই বলেছিলো।

—“তারপর কি হল?” প্রশ্ন করি।

—মদা হাতীগুলো ওকে আদর করতে করতে হঠাৎ আকাশে শুঁড় উচিয়ে বাতাসের ভ্রাণ নিলো। বুঝতে পারলো শত্রু সামনে। ওকে নিয়ে দৌড় দিলে পাঙ্গিনের জঙ্গলে। কোমরে কিছু শুকনো ভাত আর বাঁশের চোঙ-এ আপঙ নিয়ে জঙ্গল থেকে জঙ্গলে একদিন ঘুরে বেড়িয়েছি। আমার বিবিকে পেলাম না। আমার বউটা আমার সঙ্গে বেইমানি করলো।” লুটিং-এর চোখটা কেমন হলহল করে।

—“ভেবেছি ওর এই বেইমানির শাস্তি দেবো।” এবার লুটিং-এর

চোখটা জ্বলতে থাকে। কোনো সন্দেহ নেই ওর চারটে বউ-এর চেয়ে লুটিং হাতীটাকেই বেশী ভালোবাসতো। আমরা তিনজনেই চুপ করে আছি। বোলেং-এর রাতটা কেমন ভয়ঙ্কর। একটা থমথমে ভাব চারদিকে। খুব কাছে একটা হরিণ শাবককে অজগরে গিলছে। হরিণ শিশুর আর্ত চীৎকার। বডেডা করুণ।

বাঁশের চোঙ থেকে বালু ঘন ঘন তরল আপড়্ গলায় ঢালছে। মুখটা বিকৃত করেছে ঘন ঘন।—“জানেন গলাটা আর ভেতরটা জ্বলে যাচ্ছে।” বলে বালু।

—“তবু যাচ্ছেন কেন?” প্রশ্ন করি।

—“কেন যাচ্ছি?” অকারুণ্যে হা হা করে বালু হেসে ওঠে।—“ভুলতে চাই এই অরণ্য, পাহাড়, নদী, চাকরি। নেফাকে ভুলতে চাই। আমার সামনে কিছু নেই। পেছনে কিছু নেই। মাঝে মাঝে এ অরণ্যে রাতের অন্ধকারে মনে হয় আমি যেন মানুষ নই। এক অশরীরী। বসে বসে শুধু শুনি ঝিঁঝির ডাক। আর কোনো আত্মহত্যা প্রাণীর মরণ চীৎকার। মাঝে মাঝে ট্রানজিস্টারটা খুলে দিই। এই দেখুন।” হাতে মৃদু চাপ দেয় বালু। চেয়ে দেখি সে তার পার্স থেকে একটা ফটো বের করেছে। একটি কচি কোমল মুখ, কতো বয়স হবে—বিশ নয়তো বাইশ।—মিসেস মালহোত্রা।

—“অন্তের স্ত্রীর ফটো আমার পকেটে। খুব অগ্নায় করেছি না?” কি বলবো, চুপ করে রয়েছি।

“ছোটবেলা থেকে ওকে জানতাম। ও আমাকে জানতো। কতো ভেবেছি ওর কথা, ও আমার কথা কতো ভেবেছে। ভেবেছিলাম ওকে নিয়ে ঘর পাতবো। কতো আশা ছিলো। কতো সাধ ছিলো। কতো আকাঙ্ক্ষা। নেফা সব কিছুর পথে বাধা হয়ে দাঁড়াল। আশা নিরাশার রূপ নিলো।” লুটিং ময়াং-এর গল্লের ঠিক পরেই এর জন্তে প্রস্তুত ছিলাম না। বোলেং-এর জঙ্গলে ছুটি অতৃপ্ত হৃদয়ের কাহিনী শোনার জন্তেই কি আমাকে নিয়ে আসা হয়েছে! কিছু

বলতে হবে, না হলে ভালো দেখায় না। তাই বলি.....

—“বিয়ে হল না আপনাদের?”

—“নেফার চাকরি শুনে ওর বাবা-মা আমার সঙ্গে বিয়ে দিতে রাজী হল না। তাদের মেয়ের স্থান নেফার জঙ্গলে নয়। বুঝিয়ে বললাম যে ছু-চার বছরের বেশী হয়তো নেফাতে থাকতে হবে না। তারা শুনলো না। আমার যুক্তি মানতে রাজী হল না। তারা মেয়ের জন্য অগুত্থানে পাত্র খুঁজতে শুরু করলো।” ভাবি কি সামান্য দেবো ওকে। চুপ করে ওর কথা শুনে যাই। চারিদিকে কতো সমস্যা। কি অদ্ভুত আর কি বিচিত্র এ জগৎ! কতো ক্ষত থেকে রক্ত ঝরছে তার খোঁজ কেউ রাখে না। বোলিং-এর জঙ্গলে দুটি অশান্ত হৃদয় মাথা কুটে মরছে। নেফার কর্তৃপক্ষ জানে না তারা কিভাবে হৃদয় ভেঙ্গে চুরমার করে দিয়েছে। তারা টেণ্ডার কল করেছে। ক্যালভার্ট আর ব্রীজের বস্ট্র নাটের হিসেব রেখেছে। নেফার চাকরির জগ্গে থারটিথ্রি এ্যাণ্ড ওয়ান-থার্ড এ্যালাউয়েন্স ঘোষণা করে আত্মপ্রসাদ লাভ করেছে। প্ল্যান আর প্রজেক্ট নিয়ে মাথা ঘামিয়েছে। কোন্ প্লানে কতো সড়ক বানিয়েছে, কতোটা শিক্ষা ছড়িয়েছে তার বিজয়বার্তা সদর্পে ঘোষণা করেছে। নেফার কর্মচারীদের অনেক কিছু সুখ-সুবিধার জগ্গে লড়াই করেছে। তারা কি বালুর মনের খোঁজ রেখেছে? তারা কি জানে নেফার চাকরির জগ্গে মেয়ের বাপ ছেলের হাতে মেয়ে দেয় না?

—“নেফার চাকরি ছেড়ে দিতাম। কিন্তু সংসারের অনটন আব অভাব চোখে দেখা যায় না। নেফার চাকরিতে ঢোকান জয়েনিং ডেট্‌টা মাসখানেক এগিয়ে দেবার জগ্গে অনুরোধ করেছিলাম। আশা ছিলো ও সময়ের ভেতর ওর বাপ-মাকে বুঝিয়ে রাজী করাতে পারবো। কিন্তু তা হল না।

“কর্তৃপক্ষ অপেক্ষা করতে রাজী হল না। আর কর্তৃপক্ষকে দোষ দিয়েই বা কি লাভ? সিয়াং-এর নদীতে ব্রীজ বানাতে হবে। সুবনসিরিতে

জঙ্গল সাফ করে রাস্তা বানাতে হবে। কামেং ডিভিসানে এরোপ্লেন নামবার রানওয়ে বানাতে হবে। অনেক কাজ। ওর অস্ত্রের সাথে বিয়ে হয়ে গেলো। পাশিঘাটে বসে ওর বিয়ের নিমন্ত্রণ চিঠি পেলাম। আমাকে বিয়ের উৎসবে যোগ দিতে অনুরোধ করেছে। সে রাতে মাতাল হয়ে পাশিঘাটের আশেপাশের অরণ্যে ঘুরে বেড়িয়েছি।”

বালু ঢক্‌ঢক্‌ করে গলায় আপঙ্ ঢালে। বাইরে বাঘ ডাকছে। লুটিং ময়াং কপালটা চেপে বসে আছে। ওর হাতীটা ওর সঙ্গে বেইমানি করলো। ও জানতো জানোয়ার বেইমানি করে না। বেইমানি করে না বলেই তারা এতো ভালো। তাদের লুটিং এতো ভালোবাসে। তার হাতীটাকে সে তার চার বউ-এর চাইতে অনেক বেশী ভালোবাসতো।

\* \* \* \*

গভীর রাত্রিতে ঘুমটা ভেঙ্গে যায়। ভেঙ্গে যায় ভীষণ শব্দ, হুঙ্কার আর গর্জনের ভেতর। মনে হয় বাঁশের ঘরের বাইরে প্রলয় কাণ্ড ঘটে যাচ্ছে! ক্রুদ্ধ বাঘের গর্জন। আর উন্মত্ত হাতীর ডাক। ভূমিকম্প হচ্ছে নাকি? ভীষণ জোর বাসাবাড়িটা ছলছে। মাটি থরথর করে কাঁপছে। অন্ধকার ঘরে কিছুই নজরে আসে না। তবে এটা বুঝতে পারি বেশ যে এরকম কিছুক্ষণ চললে টিলার ওপর থেকে এ বাসাবাড়ি আমাদের নিয়ে গড়িয়ে পড়বে।—“বালু! বালু!” আস্তে আস্তে ডাকি। এ গভীর অন্ধকারে দিকনির্ণয় করা মুশকিল।—“এই যে আমি!” বালু প্রায় মেঝের ওপর দিয়ে গড়াতে গড়াতে এসে আমার কাছে হাজির হয়।—“বাইরে কি হচ্ছে এসব? মনে হচ্ছে এ ঘর টিকবে না!” আমি বলি।

—“হাতী আর বাঘে লড়াই হচ্ছে।” বলে বালু।

—“আপনি এর আগে কখনো এরকম যুদ্ধ দেখেছেন?”

—“হ্যাঁ, এর আগেও এরকম অভিজ্ঞতা আমার হয়েছে।” ছোটো উন্মত্ত জানোয়ারের সে কি গর্জন! ফুঁসছে, গর্জাচ্ছে। ঘরের ভেতর থেকে বেশ বুঝতে পারি যে দুজন দুজনকে মরণ কামড় দিয়েছে।

—“লুটিং কোথায়?” প্রশ্ন করি।

—“সেটাই তো বলতে পারছেন। গড়াতে গড়াতে গিয়ে লুটিং-এর খোঁজ করেছিলাম, তার বিছানায় কেউ নেই।”

—“সে কি?” আমি বিস্মিত। বিমূঢ়।

—“লুটিংকে না দেখে বডো চিন্তিত হয়ে পড়েছি।”

—“গুলি চালাবেন নাকি?” প্রশ্ন করি।

—“না।” বলে বালু। বাঁশের তৈরী রান্নাঘরটার ওপর একটা ভারী বস্তু এসে পড়ে আর সঙ্গে সঙ্গে মড় মড় শব্দ তুলে গোটা রান্নাঘরটা মাটির ওপর নেমে আসে। হুঙ্কার আর গর্জনে সুমস্ত বনভূমি কাঁপছে। বালু রাইফেলে গুলি ভরে বলে—“চলুন পাশের ঘরের জানলা থেকে টর্চের আলো ফেলে ব্যাপারটা বুঝতে চেষ্টা করি। সেরকম দরকার হলে গুলি ছুঁড়বো। তবে ওরা নিজেদের ভেতর আপন মীমাংসা করতে চাইছে—বাইরের কারুর হস্তক্ষেপ পছন্দ করবে না। আর ওদের মীমাংসা ওরা করুক। তৃতীয় ব্যক্তির এর ভেতর আসা উচিত নয়। জঙ্গলের নিয়মই তাই।” বালুর অনেক অভিজ্ঞতা। এরকম অবস্থার ভেতর সে আগেও পড়েছে। টর্চের আলোতে যে দৃশ্য দেখেছিলাম তা কোনোদিন ভুলতে পারবো না। হাত পঞ্চাশেক দূরে একটা প্রকাণ্ড হাতী তার শুঁড় প্রবল বিক্রমে দোলাচ্ছে। এদিক থেকে ওদিকে। শুঁড়ে জড়িয়ে রয়েছে একটা বাঘ। হাতীটা প্রবল বিক্রমে এবং ক্ষিপ্ৰগতিতে শুঁড়টা ঘন ঘন নীচে নামিয়ে আনছে আর শুঁড়ের সঙ্গে মাটির সংঘর্ষে বাঘটা ঘনঘন পিষ্ট হচ্ছে। দুটো জন্তুই ভীষণভাবে জখম হয়েছে। দুজনের দেহ থেকে রক্তের ধারা বয়ে যাচ্ছে। বাঘটা হাতীর শুঁড়ে জড়িয়ে থেকে হাতীটাকে আঁচড়িয়ে, কামড়িয়ে ভীষণভাবে ক্ষতবিক্ষত করেছে। হাতীটার শুঁড় মাটিতে ঘন ঘন আছড়ানোর ফলে বাঘটার অবস্থা কাহিল হয়ে উঠেছে। বালুর টর্চের আলো পড়তেই দুজনে খানিকটা সময় থমকে দাঁড়িয়েছিলো। তারপর আবার লড়াই শুরু হয়েছিলো। বালু বলেছিলো—“অরণ্যের এ যুদ্ধে তৃতীয় ব্যক্তির হস্তক্ষেপ করা ঠিক হবে না। তবে নিজেদের জীবন বিপন্ন হলে তখন অন্য কথা।” টর্চের

আলো আর ফেলেনি। রাইফেল বাগিয়ে বালু দাঁড়িয়েছিলো। মিনিট পনেরো পরে যুদ্ধ শেষ। বনভূমি শান্ত। টর্চের আলো ফেলে দেখলাম হাতীটা বাঘটাকে শুঁড় থেকে মুক্ত করে মাটিতে ফেলে দিয়ে পেছনের পা দিয়ে দলে প্রায় কাদার তাল করে ফেলেছে। হাতীটার সারা দেহ ক্ষতবিক্ষত। হাতীটার গা থেকে রক্ত বরছে ঠিক ফোয়ারার মতো। হাতীটা মাতালের মতো টলছে। এর পর সে একটা প্রচণ্ড হুঙ্কার ছেড়ে গভীর জঙ্গলের ভেতর গিয়ে ঢুকলো। বোধ করি শেষবারের মতো বিজয় ঘোষণা করে গেলো।

এর কিছুক্ষণ পরেই লুটিং ময়্যাং-এর খোঁজ পেয়েছিলাম। আমাদের ঘরের হাত দশেক দূরে একটা নালায় ধারে সে অজ্ঞান হয়ে পড়েছিলো। তার পিঠে বাঘের থাবা পড়েছে। গায়ের জামাটা রক্তে চপ্‌চপ্‌ করছে। লুটিং প্রকৃতির ডাকে সুড়া দিতে বেরিয়েছিলো। আপঙ-এর মাত্রাটা বোধ হয় বেশী হয়ে গিয়েছিলো। খেয়ালই করেনি সে ঘরের বাইরে চলে যাচ্ছে। বাঘটা এসেছিলো নালায় পাশে ঝোপের ভেতর মৃত হরিণের বাসি মাংস খেতে। বাসি মাংস ছেড়ে সে টাটকা মাংসের দিকে ঝুঁকে ছিলো। লুটিংকে হয়তো প্রাণে বাঁচতে হত না যদি না হাতীটা সময় বুকে জঙ্গল থেকে বেরিয়ে আসতো। হাতীটা ওই সময়ে কেন এদিকে এসেছিলো বোঝা যায়নি। কিন্তু লুটিং-এর জ্ঞান হবার পর তার সে কি কান্না! পায়ের ছাপ দেখে সে বুঝেছে এ তার হারানো হাতী। একটা মানুষ যে একটা জন্তুর জন্তো এরকমভাবে কাঁদতে পারে এ ধারণা আমার আগে ছিলো না। হাতীটা বেইমানি করেনি। যাবার আগে লুটিংকে নতুন জন্ম দিয়ে গেলো। লুটিং-এর চার বোঁ যে ভালোবাসা দেখাতে পারেনি হাতীটা সেই ভালোবাসা দেখিয়ে গেলো। সমস্ত ঋণ পরিশোধ করে গেলো।

লুটিং হাসপাতালের খাটে শুয়ে আমাকে বলেছিলো—“মিগম্।” নেফা অরণ্যে কেউ বেইমানি করে না। “মিগম্” বলে আমাকে সপোধন করে লুটিং আমাকে যথেষ্ট সম্মান দেখিয়েছিলো।

## ॥ তিন ॥

পাশিঘাটের এয়ার ফিল্ডের গল্প শোনাই। এয়ারফিল্ড ছোটো। ছোটো প্লেনই ওখানে নামতে পারে। প্লেন নামার জায়গা ছাড়া বাকী অংশ ঘাস আর জঙ্গলে, আগাছা আর ঝোপঝাড়ে বোঝাই। প্লেন নামবার ওঠবার রানওয়ে আগাগোড়া লোহার পাত দিয়ে মোড়া। লোহার পাতে সূর্যের আলো পড়ে ঝকঝক করে। এই রানওয়ে ধরে রবারের চাকার ওপর ভর করে প্লেন দৌড়ায়। অনেকটা দূর দৌড়িয়ে ধীরে ধীরে ওপরে উঠে যায়। আকাশের বুকে ক্রমশঃ ছোট হতে হতে একটা বিন্দুতে পরিণত হয়। তারপর একসময় মেঘের আড়ালে অদৃশ্য হয়ে যায়। যতোকণ দেখা যায় ততোকণ এয়ারফিল্ডের লোকগুলো তাকিয়ে দেখে। প্লেনটা উড়ে যায় জিরো, আলং, টাবাসোরা, বুড়গাঁও আর ওয়ালাং-এর পথে। প্লেনের ভেতরে রয়েছে তেল, চাল, চিনি, আটা, আর ময়দা। গলা পর্যন্ত চটের খলি জড়ানো ভেড়াও রয়েছে। এয়ার ড্রপিং হবে। দুর্গম সব অঞ্চলে লোকগুলো হাঁ করে আকাশের দিকে তাকিয়ে থাকে। মার্চ এপ্রিল থেকে দুর্গম বর্ষা শুরু হয়। একনাগাড়ে বৃষ্টি পড়ে। বিশ দিন থেকে পঁচিশ দিন। বৃষ্টির বিরাম নেই। বিশ্রাম নেই। যোগাযোগ বিচ্ছিন্ন হয়ে যায়। পার্বত্য নদীগুলোর দিকে তাকাতে পর্যন্ত ভয় করে। রাস্তাঘাট জলে ভেসে যায়। নেফার অরণ্য আরো ভয়ঙ্কর। আরো ভীষণ হয়ে ওঠে। ঝড়, জল, কুয়াশার ভেতর এয়ার ড্রপিং। ভীষণ কষ্টকর। যে কোন মুহূর্তে পাহাড়-পর্বতের গায়ে লেগে প্লেন চুরমার হয়ে যেতে পারে। দুর্গম অঞ্চলে লোকগুলো খানিকটা আটা আর চালের জন্তে ধৈর্য ধরে অপেক্ষা করে। পাশিঘাট থেকে প্যাসেঞ্জার মোহন বাড়ী এরোড্রামে নিয়ে যাবার জন্তে সপ্তাহে একবার মাত্র প্লেন আসে। কোনো মাসে বর্ষার আধিক্যের জন্তে চৌদ্দ থেকে বিশ দিনের ভেতর প্লেন নামতে পারে না। পাশিঘাটের আশেপাশে চকর দিতে দিতে প্লেন একসময় ক্লান্ত হয়ে ফিরে যায়। লোকগুলো



মালপত্তর গুটিয়ে এয়ারফিল্ড থেকে ঘরে ফিরে যায়। দিনের পর দিন অপেক্ষা করার পর তারা ক্লান্ত হয়ে পড়ে। এয়ারফিল্ডের অফিস ছোট্টো একটা বাড়িতে। সিমেন্ট আর চুন-সুরকির তৈরী। পাশিঘাটের অগ্রাগ্র বাড়িগুলো কাঠ বা বাঁশের তৈরী। এয়ার অফিসের বারান্দায় গোটাচারেক বেতের চেয়ার। হাতল নেই। বেত খুলে গেছে। কেউ বসতে চেষ্টা করে না। বারান্দার পাশে একফালি উঠোন। সন্ধ্যামালতী লতা থেকে টুপ্‌টুপ্‌ করে জল ঝরে পড়ে। লাইন করে জবাফুলের গাছ। একরাশ লাল ফুল নিয়ে তারা দাঁড়িয়ে আছে। পাশিঘাটের এয়ার অফিসের এ বারান্দার ইতিহাস রয়েছে। প্লেন এয়ারফিল্ডে নামবার দিন এ বারান্দাতে জনসমাগম হয়। সারা পাশিঘাট ভেঙ্গে পড়ে। পুরুষ আর নারী। কর্তা আর গিন্নী। অফিসের সি জি ওয়ান আর সি জি টু। ক্লাস টু আর ক্লাস ওয়ান অফিসারের দল এখানে ভিড় জমায়। কে আসছে আর কে যাচ্ছে তাদের জানতে হবে। পলিটিক্যাল, মেডিক্যাল, এডুকেশন, সি পি ডবলু ডি অফিসের সবাই এসে এখানে ভিড় করে।

এমনিতে পাশিঘাটে করবার কি আছে। বাঁশের ঘরে সিভিল ইঞ্জিনিয়ারের দল ছপূর বেলা বিমোয়। পলিটিক্যাল অফিসে পাড্ডা-পুলার আসেনি। পাখা কে টানবে। অতো গরমে ফাইলের লাল ফিতে খুলতে ইচ্ছে করে না। প্লেন কখনো শেডুল টাইমে পৌছয় না। পাশিঘাটে পৌছতে কোনোদিন একঘণ্টা, কোনোদিন দুঘণ্টা, কোনোদিন তিনঘণ্টা পর্যন্ত দেরি হয়। এয়ার অফিসে সমবেত লোকগুলির কিন্তু ধৈর্য-চ্যুতি ঘটে না। গল্পে আর আলাপে তারা মশগুল হয়ে ওঠে। আর প্লেন ফিল্ডে নামলেই বা কি। তাকে ধোয়া, পৌছা আদরযত্ন করে পরবর্তী ক্লাইটের জায় প্রস্তুত করতে অনেকটা সময় নেবে। প্লেনের তেল, মুন, চিনি সাক্ষ হবে। ঝাড়পোছ চলবে। প্যাসেঞ্জারদের জগ্গে সীট লাগানো হবে। আলাদা চেয়ার নিয়ে বসাতে হবে। প্লেনের দরজা কু দিয়ে আঁটতে হবে। এয়ার ড্রপিং-এর সময় দরজা খুলে নেওয়া হয়।

প্লেনটা যখন উড়ে আসে তখন বড়ো ভালো লাগে। আর যখন উড়ে চলে যায় তখন মনটা বিষাদে ভরে ওঠে। যাদের স্ত্রীরা রয়েছে গোঁহাটি আর তেজপুর, কলকাতা, মাদ্রাজ, কিংবা দিল্লীতে তাদের চোখ সজ্জা হয়। যাদের ছেলেমেয়েরা রাজস্থানের স্কুলে কলেজে অথবা দেরাহুন বা মাদ্রাজের স্কুলকলেজের হোস্টেলে যারা পড়াশুনো করে তাদের জন্তে এখানকার লোকগুলোর মন কেমন উদাস হয়ে ওঠে। প্রায় বছরখানেক হলো ওরা ছেলেমেয়েদের দেখেনি। কতো বড়ো হলো কে জানে। নেফার অরণ্যে ছেলেমেয়েকে আনা মুশকিল। লেখাপড়া হবে না। দস্ত চশমা খুলে রুমাল দিয়ে চোখ মোছে। বড়ুয়া জিজ্ঞাসা করে—“চোখে কি হলো?”—“না। না। চোখে কি যেন উড়ে এসে পড়েছে।” জবাব দেয় দস্ত। অতিকষ্টে সে চোখের জল গোপন করছে। সি পি ডবলু ডির ইঞ্জিনিয়ারের স্ত্রী দিল্লীর স্কুলে চাকরি করে। ছেলেমেয়েরা সেখানে স্কুলে পড়ে। স্ত্রীর মুখখানা ইঞ্জিনিয়ার স্বরূপের চোখে ভাসে। আজ কি একটা পরব রয়েছে। দিল্লীর সব স্কুল আজ বন্ধ। স্বরূপ স্পষ্ট দেখতে পাচ্ছে মার হাত ধরে ছেলেমেয়েরা কন্ট প্লেসের রাজপথে ঘুরে বেড়াচ্ছে। সি পি ডবলু ডির ইঞ্জিনিয়ারদের নেফাতে থাকার মেয়াদ প্রথমে ছিলো দু বছর। এখন বাড়িয়ে তিন বছর করা হয়েছে। স্বরূপের মাত্র এক বছর হলো। ভালো লাগে না। রেজিগনেশন্ লেটার লেখার জন্তে হাতটা নিশাপিশ করে। মিসেস সেনগুপ্ত কারফরমার স্ত্রীকে বলছে—“ডিক্রগড়ের বাজার থেকে টাটকা মুড়ি আনতে ভুলবেন না যেন দিদি।” কারফরমার স্ত্রী ভ্যানিটি ব্যাগ থেকে নোট-বই বের করে মুড়ির ব্যাপারটা নোট করে নিলো। অর্ডার কম নয়। কারো মুড়ি, কারো চিঁড়ে, শাড়ি, ব্লাউজ, ঔষধ, ঘি। মায় ফলফুলের শুকনো বীচি পর্যন্ত। এতো মনে রাখা মুশকিল। তাই নোট-বই সঙ্গে নিতে হয়। স্ন্যাক্সেনা প্রসাদের হাতে কয়েকখানা চিঠি গুঁজে দেয়। ডিক্রগড় থেকে চিঠি পোস্ট করলে দু'চার দিনের মধ্যে পেয়ে যাবে। নয়তো দেবী হবে। প্লেনের পাইলট তার বিশ্রামঘরে পৌঁছে পকেট থেকে রামের বোতল বের

করে। ছিপি খুলে খানিকটা গলায় ঢেলে সে বোতলটা মুখার্জীর হাতে তুলে দিয়েছে। মুখার্জীকে পাশিঘাট থেকে মেবোর রাস্তায় টুয়ে যেতে হবে! দুদিন জঙ্গলে আর পাহাড়ে কাটাতে হবে। বোতলের দরকার আছে। ইদানীং আপঙ মুখার্জীর সয় না। তাই রামের বন্দোবস্ত। মেবোর ইন্সপেক্‌সন্ বাংলোতে সন্ধ্যোটা জমবে ভালো।

ডিক্রগড়ে আমি প্লেনের পাইলটদের থাকবার মেসবাড়ীর কাছাকাছি কিছুদিন ছিলাম। প্লেন কোম্পানীর মালিকরা পাইলটদের জগ্‌থে সবরকম সুখ-সুবিধের বন্দোবস্ত করেছিলো। হাসিখুশী স্বাস্থ্য বলমল পনেরো ঘোলাটি তরুণ। বাড়ি সরগরম। খাওয়া-দাওয়া, হৈ-হুল্লোড়, চিকেন সুপের গন্ধে বাতাস ভরে ওঠে। তারপর একে একে নিভিছে দেউটি। ওদের সংখ্যা প্রতি সপ্তাহে কমতে শুরু করে। ঠিক হারাধনের দশটি ছেলের অবস্থা আর কি! দুর্গম পথে পাড়ি জমাতে গিয়ে পাহাড়-পর্বতের গায়ে ধাক্কা খেয়ে প্লেন হামেশাই চুরমার হতো! মেসে ঠাকুর চাকর ছিলো অনেকগুলো! দেখেছি তারা গালে হাত দিয়ে বসে ভাবছে। ছেলেগুলোর জগ্‌থে আমার কাছে দুঃখ করতো। কিন্তু ছেলেদের ভয় ডর বলে কিছু নেই। এক তরুণীকে তিনজন বগলদাবা করবার চেষ্টা করছে। এই একটু আগেই খবর এসেছে ক্যাপ্টেন ব্যানার্জী ডাপোরাজিওর পথে নিখোঁজ হয়েছে।

একটা দুপুর পাশিঘাটের এয়ার অফিসের বারান্দা আর ঘর সরগরম হয়ে ওঠে। বাকী ছ'দিন কোলাহলশূন্য। জনমানবহীন। আজকের দিনটাতে কতোরকম আলোচনা। কতো গল্প আর গুজব, মশকরা আর ঠাট্টা। পলিটিক্যাল অফিস বোলানের নূতন সড়কটা বানানোর অনুমতি এখনো দেয়নি। সি পি ডবলু ডির এক্সিকিউটিভ ইঞ্জিনীয়ার তাই মুখ গোমড়া করে রয়েছে। এ্যাসিস্টেন্ট পলিটিক্যাল অফিসারকে দেখেও যেন দেখলো না। একটা কথা না বলে পাশ ঘেঁষে এগিয়ে গেলো। মেবোর লাইটের বন্দোবস্ত শীগগীর হবে না বলে।

ইলেকট্রিক ইঞ্জিনীয়ার জানিয়েছে। অনেক অসুবিধে রয়েছে। শিলং

ডাইরেক্টরেট থেকে মেমো এসেছে। ছুদল গরম গরম নোট লিখছে। আর দেরি হলে নাকি ওয়ারনিং আসবে। এ পিও টু মানে এ্যাসিস্ট্যান্ট পলিটিক্যাল অফিসার ছ' নম্বর। পদমর্যাদায় যার স্থান এ পিও ওয়ানের ঠিক নীচে। এর ওপরে ডি সি মানে ডেপুটি কমিশনার। আজ রাতে পাওয়ার সাল্লাই আরো এক ঘণ্টা বেশী চালু রাখবার জন্তে ইলেকট্রিক ইঞ্জিনিয়ারের কাছে এ পিও টু অনুরোধ করেছে। এমনিতে পাশিঘাটের আলো আটটার পরে অফ্ হয়ে যায়। বিকেল পাঁচটা থেকে রাত আটটা পর্যন্ত আলো থাকে। আর কটা বাড়িতেই বা ইলেকট্রিক আলো রয়েছে! ইলেকট্রিক ইঞ্জিনিয়ার কোন প্রতিশ্রুতি দেয়নি। এ পিও টু ভাবে রাতের পার্টিটা কি তাহলে মাঠে মারা যাবে। সারা পাশিঘাটের দুখ নাকি হাসপাতালের রোগী মারফৎ ডাক্তারদের ঘরে চলে যাচ্ছে। পাশিঘাট স্কুলের হেড মাস্টারের স্ত্রী এতে মর্মান্বিত! এ বড্ডো অগ্নায়। তাই এর প্রতিকারের আশায় মিসেস্ থাডানি গতকাল সন্ধ্যায় একটা মিটিং ডেকেছিলো। মিটিং-এ মেয়েরা কেউ আসেনি। আসবে কেন! সারা সন্ধ্যা আর সারা রাত্রি তারা পার্টিতে মেতে উঠেছিলো। মিটিং এ্যাটেণ্ড করবার সময় কোথায়। তরল পানীয়ের সঙ্গে টুইস্ট। দুখ জমে দই হয়ে যাক। দই থেকে বার হোক ঘোল। দেখবার সময় কোথায়?

এ প্লেনে দত্তর স্ত্রী পাশিঘাটে এসে পৌঁছেছে। হাজারিকার স্ত্রীর তার কাছে রান্নার মশলা আনার আবেদন ছিলো। হাজারিকা আর তার স্ত্রী প্রথমে যাবে লোহিতের নামসাইতে। তারপর চোখাং আর তেজুতে। মশলা ছাড়া রান্না কি দিয়ে করবে! এয়ার অফিসের বারান্দায় মেয়ে-পুরুষের সম্পর্কটা নিবিড় হয়েছে। সমাদ্দার মজুমদারের হাতটা চেপে ধরে বলে—“মলমটা ভাই ডিক্রিগড় থেকে এনো। চুলকোতে চুলকোতে মরলাম। পোকাগুলো শূয়োরের গা থেকে নেমে এসে বড্ডো কামড়ায়। আর চুলকোতে চুলকোতে সারা শরীরে দগদগে ঘা হয়।” ওরাং বাটু আর জাওলাপ্রসাদের নৌকো

সিয়াং আর ব্রহ্মপুত্র পাড়ি দেয়। ছুঁগম, ছুঁগহ পথে ওইরাম ঘাটে পৌঁছনো এক কষ্টকর প্রচেষ্টা, তারও পর বর্ষাকালে ব্রহ্মপুত্র পাড়ি দেওয়া এক অসাধ্যসাধন গোছের কিছু। মোটর বশানো ছোট্টো এইটুকুন বোটের ওপর ভরসা করা যায় না। ব্রহ্মপুত্রের যে চেহারা। সুতরাং বর্ষার সময় ভরসা ওই ছোট্টো প্লেন। কালো কালো গগলসে চোখ ঢেকে ছুঁচারজন আধুনিক এদিক ওদিক ঘোরাঘুরি করছে। হাতকাটা ব্লাউজ। পেটে পিঠে কাপড় নেই। রোদ থাক বা নাই থাক। ওরা ঘরে থাক বা বাইরে থাক। মেঘ হোক কিংবা বৃষ্টি হোক। এদের চোখ থেকে গগলস্ কখনো নামবে না। তুমি তোমার দৃষ্টিকে লুকিয়ে অন্ধকে ভালো করে দেখে নাও। জানতে দিও না তুমি কাকে দেখছো। কখন দেখছো। কিভাবে দেখছো।

দস্তুর স্ত্রী সুনন্দ পাঞ্জাবী ছেলেটাকে আপাদমস্তক দেখে নিচ্ছে। প্লেনটা দৌড়ুবার আগে প্রচুর হাওয়ার সৃষ্টি করে। কি হাওয়া বাপ্পে বাপ্প। শাড়ি ধুতি সামলানো দায়। প্লেনের মেরামতি শেষ। কাড়পোঁছ হয়ে গেছে। প্লেন এখুনি ছাড়বে। একটি ছপুর মন্দ কাটলো না। সন্ধ্যার পর আবার সেই অন্ধকার। ভয়াবহ নির্জনতা। সাপ, জেঁক। পাশিঘাটের এ বারান্দায় অনেক খবর দেওয়া নেওয়া হলো। অনেক হৃদয়ের উষ্ণ পরশ মিললো। প্লেন আকাশে উড়বে। সঙ্গে সঙ্গে অনেকগুলো হৃদয় আকাশে উড়বে। অনেক আশা। অনেক আকাঙ্ক্ষা। ভট্টাচার্য প্লেন অফিসের কর্মচারী। প্লেনকে খুঁটিয়ে-নাটিয়ে দেখবার ভার তার ওপর। জিনিসপত্র, তোরঙ্গ, বিছানা, সব রকম মালপত্রের তদারক করা তার কাজ। ভট্টাচার্যের তদারক শেষ। সে প্রথমে পাইলটকে ডান হাতের বুড়ো আঙুল দেখাবে। পাইলট ইঞ্জিনে স্টার্ট দেবে। বাম হাতের বুড়ো আঙুল দেখালে প্লেন দৌড় শুরু করবে। দৌড়ুতে দৌড়ুতে প্লেন একসময় আকাশে উঠে যাবে। পাশিঘাটের এয়ার অফিসের বারান্দায় দাঁড়ানো লোকগুলো প্লেনটার দিকে তাকিয়ে থাকবে। যতোকণ দেখা যায় ততোকণ

দেখবে। প্লেন মোহনবাড়ী এরোডোমে প্যাসেঞ্জার নামিয়ে এয়ার-ড্রপিং-এ চলে যাবে। চলে যাবে বম্‌ডিলা, টুটিং আলং, ডাপোরাজো, মেচুকা, ওয়ালাং আর তেজুর পথে যেখানে লোকগুলো খাচুসামগ্রীর জগ্রে আকাশের দিকে হাঁ করে তাকিয়ে আছে। এয়ার স্ট্রীপে আদি অধিবাসীরা ভিড় জমিয়েছে। অনেকেরই কোমর থেকে একফালি ত্রাকড়া বুলছে। পাশে বেতের খাপে ঝকঝকে দা। দা-এর এককোপে প্রকাণ্ড অজগরকে ওরা ছুঁকরো করে ফেলে। বন্য বরাহ আর ভালুকের পেট ফাঁসিয়ে দেয়। চিতার চোখ উপড়িয়ে আনে। ওরা হাততালি দিচ্ছে। আর নেচে নেচে গান গাইছে। গানের ভেতর পাখীটার শুভযাত্রা কামনা করছে। শক্তি-সামর্থ্য নিয়ে সরল হাসিখুশী মানুষগুলো। যাত্রীরা মোহনবাড়ী এরোডোমে পৌঁছে বাস বা মোটরে করে যাবে ডিক্রগড়। ডিক্রগড় থেকে বেরিয়ে পড়বে অনেকই। কেউ যাবে মার্গেহাটা, কেউ বা ডিগবয়। জোড়হাট, শিবসাগর, লখীমপুর আর শিলং-এর পথে যাবে। যারা শুধু ডিক্রগড়ে থাকবার জগ্রে এসেছে তারা দৌড়ুবে ডিক্রগড়ের বাজারে! পেট পুরে এটা ওটা খাবে। চপ্-কাটলেট্ এবং অনেক কিছু। সারা পাশিঘাটে একটা রেস্টোরঁ নেই, নেই একটা হোটেল। দুদিন ডিক্রগড়ে থাকলে চারটে সিনেমা শো দেখবে। দুপুরের শো শেষ করে ছুটবে সন্ধ্যার শোতে। হিন্দী, বাংলা, অসমীয়া ছবি দেখবে। পাশিঘাটে সিনেমা নেই। বডেডা মুশকিল! বাইরের ছনিয়ার খবরই কেউ রাখতে পারে না। খবরের কাগজ পৌঁছয় বেশ কয়েক দিন পরে। যখন খবর বাসি হয়ে যায়। ডিক্রগড়ের দোকানগুলো ওরা ঘুরে ঘুরে দেখে। দাম যাচাই করে। পাশিঘাটে একটা কি ছোটো দোকান, মাড়োয়ারী দোকান। তাদের নৌকায় করে ব্রহ্মপুত্র থেকে মাল আনতে হয়। অনেক মেহনত। অনেক পরিশ্রম, অনেক ঝুঁকি নিতে হয়। তাই পাশিঘাটে মাল এনে ছ টাকার জিনিস দশ টাকায় না ছাড়লে চলে না। জিনিস এনেই বা কি করবে! কেনবার লোকের অভাব।

যাক গিয়ে। এবার এয়ারফিল্ডের অফিসঘরে ফিরে আসা যাক।  
এয়ারফিল্ডের অফিসে ললিতা ডাটকে দেখে আমি চমকে উঠি।

ললিতা এখানে? ললিতার সঙ্গে এক ভদ্রলোক। আন্দাজ করলাম  
চল্লিশের উর্ধ্ব বয়স। ললিতার স্বামী বলেই মনে হলো। তাহলে  
শেষ পর্যন্ত ললিতা বিয়ে করেছে! ওর স্বামী নিশ্চয়ই নেফাতে  
চাকরি করে। সমস্ত নেফা ঘুরে বেড়ায়। ললিতার ধবধবে সাদা রঙে  
খানিকটা মালিগা এসেছে। চুল বব্ করা। ঠিক আগের মতো।  
ঠোটে পুরু লিপস্টিক। মুখে রং-এর প্রলেপ। তিলটা কৃত্রিম। ঠিক  
জায়গামতোই বসিয়েছে। না কোথাও ক্রটি নেই। ললিতার চোখে  
মুখে ক্লাস্তির আভাস। আগেকার সেই সতেজ ভাব নেই। বেশ  
বুঝতে পারি ললিতা ঘন ঘন আমাকে দেখছে। চিনতে পেরেছে  
নিশ্চয়। চিন্তে না পারার কোন কারণ নেই। শিলং ছাড়বার পর  
অনেকগুলো বছরের সঁড়ি ডিঙ্গিয়েছি। ললিতা আর ওর স্বামী প্লেন  
ছাড়বার অপেক্ষায় রয়েছে। প্লেন এয়ারফিল্ডে নেমেছে। প্লেনের  
ঝাড়পোঁছ চলছে। বসবার সীট জুড়ছে। মালপত্রেরে জঠর ভর্তি করে  
ডিক্রগড়ের পথে পাড়ি জমাবে। আর কোনদিন হয়তো ললিতাদের  
সঙ্গে দেখা হবে না। ওদের সঙ্গে খানিকটা আলাপ করতে দ্বৈষ  
কি? গলাটা শুকিয়ে কাঠ হয়ে গিয়েছিলো।

ঘরের কোণে রাখা মাটির কলসী থেকে এক গ্লাস জল ঢেলে নিয়ে  
গলাটা ভিজিয়ে নেবো বলে এগিয়ে গিয়েছিলাম। আমি যে ঘরে রয়েছি  
তারই পাশের ঘরে রয়েছে ললিতা আর তার স্বামী। মাঝখানে একটা  
পাতলা কাঠের পার্টিশান্। গ্লাসে জল ঢালছিলাম হঠাৎ কয়েকটি কথা  
কানে ভেসে আসে। ললিতার কণ্ঠস্বর।—“ওই লোকটাকে লক্ষ্য  
করেছো!” তারপর স্বামীকে নিরন্তর দেখে—“ওই যে গো যার গায়ে  
সাদা শার্ট আর পরনে নীল রঙের ট্রাউজারস্।”

“দেখেছো বোধ হয়। লোকটা আমার দিকে কেমন প্যাটপ্যাট  
করে তাকাচ্ছিলো। মনে হয় জন্মবয়সে মেয়েছেলে দেখেনি।” বুঝতে

পারলাম আমাকে নিয়ে কথা হচ্ছে। কলসীর জল কলসীতে রইলো। আমার হাতে গ্লাসটা ধরা রয়েছে। তৃষ্ণার কথা ভুললাম। কাঠের পার্টিশানের সঙ্গে কান লাগিয়ে বাকী কথাগুলো শুনতে চেষ্টা করলাম। স্বামী বলেছে—“হয়তো তোমার মত সুন্দরী ওর জন্মবয়সে ও দেখেনি।” “—ধেং! তাই বলে কেউ ওরকমভাবে তাকায় নাকি! অসভ্য পুরুষ। মেয়েছেলের দিকে কিরকমভাবে তাকাতে হয় তা পর্যন্ত শেখেনি। মনে হয় ও শুধু দৃষ্টি নয়। দৃষ্টি দিয়ে লেহন করছে।” ভদ্রলোক হো হো করে হেসে ওঠে। আমার কিন্তু সব শুনে রাগ হয় না। ললিতা ডাট বদলায়নি। ঠিক আগের মতো রয়েছে। যেদিন ওর কুকুরটাকে শিলং-এর ওয়ার্ড লেকের জল থেকে উঠিয়েছিলাম সেদিনও ললিতা এরকম কথাবার্তা বলেছিলো। কুকুরটা অসুস্থ ছিলো। নোটিশ না দিয়ে নৌকো থেকে জলে পড়ে গিয়েছিলো। ললিতা কুকুর নিয়ে জল-বিহারে বেরিয়েছিলো, আদম্-ওয়ার্ড লেকের ধারে বাগানে পায়চারি করছিলাম।

জলে ঝাঁপিয়ে পড়ে সাঁতার কেটে এগিয়ে কুকুরটাকে জল থেকে তুলে নৌকোতে নিয়ে তুলেছিলাম। ললিতা ধন্যবাদ দিতে ভুলে গিয়ে কুকুর নিয়ে মেতে উঠেছিলো। কুকুরের আদর যত্নে ব্যস্ত হয়ে উঠেছিলো। নগণ্য মানুষটার কথা মনে হয়নি। আমাকে একসময় বলেছিলো—“আপনি এখন ওকে আদর করতে পারেন। তা আপনার হাত পরিষ্কার আছে তো? ওর গায়ে একটা ক্ষত রয়েছে। ভয় হয় সেপটিক্ না হয়ে যায় ” জবাব দিতে ইচ্ছে হয়নি।

এর পরে শিলং-এ ওর সঙ্গে আলাপ হয়েছে। সব চেয়ে আশ্চর্যের বিষয় আলাপ থেকে পরিচয়। পরিচয় শেষ পর্যন্ত ঘনিষ্ঠতায় দাঁড়িয়েছে। আমি গরীব সম্ভ্রান্ত। ললিতা ছিলো ধনীরা কন্যা। শিলং ক্লাবের রিসেপসনিষ্ট্। ওর বব করা চুল। মোমের মতো সাদা দেহ। অদ্ভুত রূপসী! ললিতা পার্টিতে যায়। ডান্সে যোগ দেয়। মেজর আর কর্নেলকে করুণা বিতরণ করে। টি গার্ডেনের সাহেবসুবো, ম্যানেজার



আর ডাইরেক্টরের দল ওর জন্তে পাগল হয়। ও বাবাকে ডাডি বলে। মাকে মামী বলে। সুইট, হাউ নাইস্ আর ওয়াশারফুল ওর মুখে লেগেই আছে। ও প্ল্যাকস্ পরে বিয়ারে চুমুক দেয়। আমার সঙ্গে ওর ঘনিষ্ঠতা নিবিড় হবার কোন সঙ্গত কারণ আমি খুঁজে বের করতে পারিনি। “স্বর্গভূমির” ম্যানেজার মানে আমার হোটেলের ম্যানেজার পূর্ব-পাকিস্তানের লোক। সে বলে—“তুমি জানতি পারোনি তুমি সুপুরুষ! মাইয়ালোকের তোমারে দেখলে বুক ধড়ফড়ানি শুরু হইয়া যায়। এইটা স্বাভাবিক। ওই কারণে ব্যাবাক্ ফ্যালাইয়া তোমার কাছে দৌড়াইয়া আসে।” হাউ নাইস্! হাউ সুইট্! লাভলি! ওসবের পর এ কথাগুলো বড্ডো রুচ শোনায়। তবে “স্বর্গভূমি” হোটেলের ম্যানেজার লোকটা ভালো। ওর গায়ের রং ভীষণ কালো। ঘাড়ে গর্দানে পুষ্ট মানুষ। শরীরে একরাশ থলথলে মাংস। আমার ওপর তার অপক্লিমীম স্নেহ।

রাস্তাটা ওয়ার্ড লেকের ঠিক পাশ দিয়ে, শিলং ক্লাবের গা ঘেঁষে, রাজভবনকে বাঁ ধারে রেখে নীচে নেমে গেছে। পাহাড় কেটে ধাপে ধাপে সিঁড়ি বানানো হয়েছে। সিঁড়ি বেয়ে নেমে গেলে খানিকটা সমতল জমি। তারপর আবার পাহাড়ের গা বেয়ে ওপরে উঠে যেতে হয়। রাজভবনের পাশের রাস্তার নাম ছিলো “ক্যামেলস্ ব্যাক্”। ললিতার অনুরোধে ও রাস্তার ওপর পাইনগাছের নীচে অপেক্ষা করতে হয়। ঘূর্ণি হাওয়াতে একরাশ ধূলাবালির সঙ্গে পাইনের শুকনো পাতাগুলো ঘুরপাক খায়। আমার মনের চিন্তাভাবনাগুলো ঠিক যেমন মনের ভেতর ঘুরপাক খায়। মুক্তোর মতো সাদা ধবধবে দাঁত বের করে ললিতা হাসে। গালে ওর রক্তিম আভা। প্লাম্, পিচ্, কমলালেবুর স্বাক্ষর। পাইন উড্ হোটলে বিয়ারের গ্লাস ও আমার হাতে তুলে দেয়। গ্লাসে ঠোকাঠুকি আঙ্গুলে আঙ্গুলে হোঁয়াছুয়ি হয়। ও আমাকে সব কিছু শেখাচ্ছে। অফিসের কেরানী আমি। প্রথম দিন ভেতরের সংস্কারগুলো ধাক্কা দিয়ে তরল পানীয়কে

ওপরে ঠেলে দিয়েছিলো। শার্ট প্যান্ট ভিজে গিয়েছিলো। কাশতে কাশতে অস্থির। নাকমুখ দিয়ে একরাশ জল। সে এক বিশ্রী ব্যাপার। পাইন উডের সে ঠাণ্ডা পরিবেশ যেন এক লহমায় ভেঙ্গে খান্ খান্ হয়ে গেলো। ফ্রেন্স লেডী কেমন বিস্ময়ের দৃষ্টি নিয়ে আমার দিকে তাকায়। আমেরিকান মেয়েটির মুখে মৃদু হাসি। লজ্জায় মরে যাই। একসময় পিসিমা নিমপাতা আর চিরতার জল খাওয়াতো। তখন কিন্তু এরকমটি হয়নি।

মরেলো হোটেলে ললিতা আমাকে জোর করে নাচের আসরে নামিয়েছিলো। তার আগে ললিতা আমাকে কয়েকদিন নাচ প্র্যাকটিস করিয়েছে। সমস্ত রকম কলাকৌশল শিখিয়েছে। ও হরি, নির্দিষ্ট সময়ে 'দেখি পায়ের গাঁটগুলো কে যেন বস্টু দিয়ে এঁটে দিয়েছে! এক পা নড়বার শক্তি নেই। কঠিন টাইফয়েড রোগে আক্রান্ত হয়ে মার বুকে একাদন যেমন আশ্রয় আর নির্ভর খুঁজেছিলাম, সেদিন ঠিক তেমনি ললিতার হাতের মুঠোয় নিজেকে সঁপে দিয়ে পাঁচ বছরের শিশু বনে গিয়েছিলাম। জোড়ায় জোড়ায় চোখ আমাকে যেন গিলে খাচ্ছে। কিন্তু নাচের পর আমার কি সম্মান। কর্ণেল সাহেব ঘন ঘন আমাকে সিগারেট দেয়। তেল কোম্পানীর ম্যানেজার আমার জন্তে স্ট্রাম্পেন অর্ডার করেছে। স্টীল কোম্পানীর মালিক আমাকে গাড়িতে লিফট দিতে চায়। বৃষতে পারি ওদের উদ্দেশ্য আমার মাধ্যমে ললিতার নিকটে পৌঁছানো। ওরা ললিতার মনের নাগাল পেতে চায়। ওটা যে কোথায় লুকোনো রয়েছে সে খোঁজ তারা রাখে না। তবে এ জানে যে এ ছোকরা বাজীমাত্ করেছে! আমার ওপর ললিতার এ কৃপাদৃষ্টির অর্থ ওরা খুঁজে পায় না। আমি নিজেই বুঝে উঠতে পারিনে। “স্বর্গভূমি” হোটেলের ম্যানেজার বলে—“ললিতা তোমারে সোহাগ কইরা সুখশান্তি পায়। আর তোমারে খাতির কইরা বাকী সকলে সুখশান্তি পায়। একটা কাম্ করো দিকিন। অগো মাথায় হাত বুলাইয়া একটা ভালো কাম-কর্ম যোগাড় কইরা লও দিকিন্।

ললিতা চিরদিন থাকবো না। শিলং তোমার একসময় ছাড়তি হইতে পারে। চাকরিটা থাইকা যাইবো।” ম্যানেজারের কথাবার্তা যেন কেমনতরো। এখন বুঝি ম্যানেজার খাঁটি মানুষ ছিলো। ঠিকই বুঝতে পেরেছিলো।

“স্বর্গভূমি” হোটেলের আমার থাকবার ঘরটা বড়ো ছোটো। পঁয়ষট্টি টাকায় থাকা-খাওয়া। এ টাকায় এর চেয়ে বেশী আশা করা অশ্রায়। ঘরে সূর্যের আলো ঢোকে না। চেষ্টা করে ঢোকবার পথ পায় না। কাজেই ঘরে অন্ধকারের রাজত্ব। কেমন একটা স্তাঁৎসেঁতে ভাব। ইদুর আর আরশোলার উপদ্রব খুবই বেশী। মাহের কড়াতে ঝোল বলে যে বস্ত্রটি পরিচিতি লাভ করেছে তার চার ভাগের তিন ভাগই ছিলো খাঁটি কলের জল। একটুকরো মাহের খোঁজে গামছা পরিধান করে নেমে যাবার মতো অবস্থা। ললিতাদের প্রকাণ্ড বাড়ি। ওদের একখানা ঘরে গোটা মেসবাড়িটা পুরে রাখা যায়। ললিতার ওষ্ঠের মূছ পরশে শাকচচ্চড়ী-পুষ্ঠ দেহটা থর থর করে কাঁপে। ক্ষণকালের জন্তে ভুলে যাই আমি “স্বর্গভূমির” বাসিন্দা। আমি যে সামান্য কেরানী, থাকা-খাওয়া বাবদ আমার যে মাসে মাসে পঁয়ষট্টি টাকা দিতে হয় সে সমস্ত বেমালুম ভুলে বসে থাকি। ওদিকে ললিতা যাদের সঙ্গে ঘুরছে, যাদের আদর-আপ্যায়ন করছে, যাদের সঙ্গে ডিনার ডান্সে যাচ্ছে তাদের অনেকে দশ-বিশ লাখের মালিক। কেউ মেজর নয় তো কর্নেল। কেউ আবার বিরাট ফার্মের ম্যানেজিং ডাইরেক্টর। তখনকার দিনে শিলং ক্লাবে সমস্ত কিছুই এক ইলাহী ব্যাপার। টেনিস্ গল্ফ্ আর সুইমিং কম্পিটিশানে ভাগ নিতে আন্তর্জাতিক খ্যাতিসম্পন্ন ব্যক্তির ওখানে ভিড় জমায়। শিলং ক্লাবের রিসেপসনিস্টরা বেশীর ভাগই মেয়ে। মেয়ের দল ব্যস্ত হয়ে ওঠে। তাদের স্নান করার আর খাবার সময় থাকে না। ললিতা ওদের একজন। সে মুক্তহস্তে অনুগ্রহ আর করুণা বিলোয়। অনুগ্রহ আর করুণার ভাগ বাঁটোয়ারার ভেতর আমার মতো নিরীহ গোবেচারা গোছের একটা লোক কি করে যে জুটে গেলো তা ভেবেই পাইনে।

হোটেলের ম্যানেজার ঠোটকাটা লোক। সে বলে—“পোলাউ মাংস আর কাটলেট খাওনের পর শুকতানি চাইখা দেখে।” দূর দূর ম্যানেজারটা একেবারে জংলী। কি যা-তা সব বলে। ললিতা ডাট থাকতো নঙ্‌থুমাই। তখন শিলং একেবারে ফাঁকা। আজকের মতো তখন সেখানে জনসমাগম হয়নি। লাইটুমুখরার পরের পাড়া নঙ্‌থুমাই। যেখানে ইউকলিপটাসের পাতা গন্ধ ছড়ায়। পাইনের হাওয়া কাঁপন ধরায়। নাস্পাতি, পিচ্, আর প্লাম্‌রসে টুইটুপ্লুর হয়ে গাছ থেকে ঝোলে। হাজারো পাকা কমলালেবু গাছে গাছে আগুনের রং ছড়ায়।

ক্যামেলস্‌ ব্যাক্‌ রোডের ছধারে ঝোপঝাড়। সেখানে বর্ণালী ফুলের মেলা। কতো ফুল কতো লতাপাতা। গ্লাডিওলি, কস্মস্‌, ডালিয়া, গ্লোরি অব রোম। ফরগেট্‌ মী নট্‌, বুশেস্‌ অব ভারগো। ভায়োলা। আরো কতোরকমের ফুলের বাহার। পাহাড়ের গায়ে মাটি কেটে সিঁড়ি বানানো হয়েছে। সিঁড়ি বেয়ে ওপরে উঠে গেলে ডন্বস্কো। বাঁদিকে আপ্ল্যাণ্ডের দিকে এগিয়ে গেলে সেণ্ট মেরী স্কুল আর কলেজ।—“ওই যে নাস্পাতির গাছটা দেখছো ওই গাছের ডাল বেয়ে লুসি ওপরে উঠে নাস্পাতি নীচে ফেলতো। আমি গাছের নীচে দাঁড়িয়ে থেকে ফল কুড়োতাম। একদিন গাছ থেকে লুসি পড়ে গিয়ে পায়ের হাঁটু ভাঙল। লুসি তো হাসপাতালের বিছানায়। আমাকে স্কুলের কর্তৃপক্ষ ছুটির পর আটক করে রাখলে। খুব কঁদেছিলাম। কিছুতেই ছাড়লে না। সারা স্কুল জনমানবহীন। নির্জন ঘরটিতে যখন অন্ধকার নেমে এসেছিল তখন এমন ভয় পেয়েছিলাম।” ললিতা তার শৈশবে ফিরে গেছে। স্পষ্ট দেখতে পেলাম ফক পরা। ছুথের মতো সাদা গায়ের রং, সোনালী চুলের ছোট্টো ছুটি বেগী বুলিয়ে ছোট্টো মেয়েটি সেণ্ট মেরী স্কুলের প্রাঙ্গণে দৌড়ঝাঁপ করছে। ললিতা তার হাতের মুঠোর ভেতর আমার আঙুল চেপে ধরেছে। শিলং-এর হাওয়ায় কেমন একটা মাদকতা রয়েছে। শরীরে আর মনে এ কিসের চাঞ্চল্য! আমাদের পাশে একটা বড়ো মোটর এসে থামলো। শিলং ক্লাবের

হোমরাচোমরা কেউ হবে। ললিতাকে লিফট দিতে চায়।—“নো থাঙ্কস্।” ছেলেটি মোটর হাঁকিয়ে যায়। ললিতা আমার সঙ্গে বেশী পছন্দ করছে।

লাইটুমুখরার পথে আলো জ্বলে উঠেছে। ওয়েস্ট এণ্ডের দোকানে ক্রেতার ভিড়। শিলিং-এ সাহেবমেমদের ভিড়। সাহেবমেমরা কেনাকাটা করছে। ললিতার চালচলন অনেকটা মেমসাহেবের মতো। তা হবেই তো। মিশনারী স্কুলে পড়াশুনো করেছে। ভারতের বাইরে অনেক দেশ সে ইতিমধ্যে দেখে এসেছে। শিলিং ক্লাবে সাহেবমেমদের মধ্যে ললিতা বেশীর ভাগ সময় কাটায়।

পথ চলতে চলতে ললিতা বলে—“জানো, আল্লস্ থেকে হিমালয় শ্রেষ্ঠ। হিমালয়ের বিরাটত্বের কাছে সহজেই মাথা নত হয়। মনকে করে উদার আর উদাস। মনের প্রসারতা বাড়ে। রাইন থেকে অনেক ভালো আমাদের গঙ্গা। পুণ্যবতী স্রোতস্বিনী সমস্ত ময়লা ধুয়ে মুছে সাফ করে দেয়। লণ্ডন থেকে ভালো বারাণসী। সমস্ত কিছু ভোগের পর ওর আকর্ষণ উপেক্ষা করা অসম্ভব।” আমি উত্তর দিই না। মনে মনে ভাবি ভূতের মুখে রামনাম। লাইটুমুখরার পাঁউরুটি আর কেকের দোকানের মালিক সেই সাহেব বুড়োটা বসে পাইপ টানছে। ওর বয়স আশীর ওপরে। রিন্জা বড়বাজারের খাসী ব্যবসায়ী। পুরোনো জিনিস-পত্র অক্সানে সেল করছে। দোকানের সামনে ছোটখাটো এক জনতা। হাতুড়ীর তিন ঘা পড়বার সঙ্গে সঙ্গে দোকানের মাল খালাস হচ্ছে। কাকতির বাড়ির পরদা হাওয়ায় উড়ছে। লাইটুমুখরার বাজারে খাসী মেয়েরা মাছ বিক্রী করছে। তারা পাইন গাছের কাঠে মশাল জ্বালিয়েছে—“ওই যে খাসী মেয়েটি মাছ বিক্রী করছে, ও আমার সঙ্গে স্কুলে পড়তো, নাম রিমি রিন্জা। বি-এ আর বি-টি পাস। দিনের বেলা কোনো স্কুলে পড়ায়। সন্ধ্যাবেলা মাছ বিক্রী করতে বাজারে চলে আসে।” তাকিয়ে দেখলাম। মেয়েটি সত্যি সুন্দরী। শূড়োল মণিবন্ধে রিস্টওয়াচের কালো ব্যাণ্ড এমন সুন্দর মানিয়েছে। বুঝলাম ওরা

শ্রমের মর্যাদা দিতে জানে। নঙ্খুমাই যাবার পথে লুমোরী হিলের রাস্তায় সটকাট করি। ললিতা আরো ঘনিষ্ঠ হয়। যুগে যুগে অনেক প্রেমকাহিনী লেখা হয়েছে। রোমিও জুলিয়েট, মমতাজ শাহজাহান থেকে শুরু করে কলকাতার কালীঘাট পাড়ার খেঁদী আর পটলার সরস প্রেমকাহিনী পর্যন্ত অনেকের কাহিনী লিপিবদ্ধ হয়েছে। এর শেষ নেই। এ ভালো আমসত্ত্বের মতো। আমসত্ত্ব চুষে চুষে যেমন আমোদের শেষ নেই, প্রেমকাহিনীও তেমনি। যত শুনবে ততই মজা। শ্রোতা নেশায় বুদ্ধ হয়ে পড়ে থাকে। আমার প্রেমকাহিনীর সবটা শোনার মতো সময় আর ধৈর্য আমার নেই। আমি জানি পাঠকের র্যাশন্স আনতে হবে। ইনকাম ট্যাক্সের অফিসে ছুটতে হবে কর্মচারীদের সঙ্গে আলাপ জমাতে। মেয়েদের ছুটতে হবে শাড়ি ব্লাউজের দোকানে। টোয়েন্টি পার্সেন্ট রিডাক্সান্ সেল দিচ্ছে। দু-একখানা শাড়ি বগলদাবা করতে হবে। সবাইকারই সময়ের অভাব। তাই আমার গল্পের শেষ চ্যাপ্টারটাই শোনাবো। ঘোরতর ট্র্যাজেডি।

“স্বর্গভূমি” হোটেলের কামরায় রয়েছি আমি আর ললিতা। আমি নীল সাগরের অতল তলে ডুবতে থাকি। ডুবি আর ডুবি। হোক না আমার ঘর এতোটুকুন একটা খুপরি, দিনের বেলা একফোঁটা সূর্যের আলো যেখানে প্রবেশ করে না। তাতে ক্ষতি কি? কাঠের মেঝে ফাঁক হয়ে গেছে। আর তাই দিয়ে শীতের হাওয়া এসে হাড়ে কাঁপন ধরায়।

জানলার কাঁচ ভাঙা। সেখানে কাগজ গোঁজা হয়েছে। একটা ভাঙা নড়বড়ে সিঁড়ি বেয়ে চার ফুট মতন উঠে আমার ঘরে পৌঁছানো যায়। ভ্যাপসা গন্ধে দম আটকে আসে। এ মুহূর্তে আমি সেসব কিছুর জগ্গেই ভাবছি। ললিতা থাকে নঙ্খুমাই যেখানে ইউকলিপটাস্ গাছের পাতা গন্ধ ছড়ায়। পাইনের শুকনো পাতা পথ পিচ্ছিল করে। শিলং ক্লাবের ইন্ফেন্ট্রির মেজর যার ইয়া বড়ো গোঁফ। চক্ষু যার সর্বক্ষণ রক্তবর্ণ। আমাকে আর ললিতাকে সে এখন এখানে দেখলে

হুকুম ছাড়তো—“গ্ৰাটেন্সন্ ! কুইক্‌মার্চ ! ফায়ার !” মেজরের মুখে সৰ্বক্ষণ ওসব কথা লেগেই আছে। মুদ্রাদোষ হয়ে দাঁড়িয়েছে। মেজর হোটেলের এ ঘরে আমাদের তুজনকে দেখলে নির্ধাত রিভলবারটা আমার দিকে তাক করে ছুঁড়তো। শিলং ক্লাবে ললিতার পা মাটি হোঁয় না। এখানে আমার ঘরে ললিতা যেন নববধূ। মনে হয় গাঁয়ের শীতল পুষ্করিণীতে স্নান সেরে সারা অঙ্গে স্নিগ্ধতার প্রলেপ নিয়ে এখানে চলে এসেছে। ভুলতে পারিনে চেরাপুঞ্জীতে মেঘ আর ফগের মধ্যে আমাদের লুকোচুরি খেলা। মাফ্‌লং-এ উচু টুলের ওপর বসে রাম-ভর্তি গ্লাসে ঠোট হোঁয়ানো। ললিতা লেখাপড়া জানা মেয়ে। সে আমাকে জয়ন্তিয়া নীতিকথা শুনিয়েছে। একটি নীতিকথা আমার এখনো মনে আছে।—“মাটির ওপর ধান চাল রয়েছে। তা সত্ত্বেও মানুষ আকাশের দিকে তাকায়।” নঙ্ক্রেমে খাসীদের নাচে আমি আর ললিতা ভাগ নিয়েছি। লালতা শুনিয়েছে খাসীদের ইতিহাস। ওদের সঙ্গে অষ্টিক্ গোষ্ঠীর লোকদের সাদৃশ্য আছে। মালয় দ্বীপপুঞ্জের কতোগুলো জাতির ভাষার সঙ্গে খাসী আর ছোটনাগপুরের মুণ্ডা ভাষার মিল রয়েছে। ওরা বিরাট অষ্টিক্ গোষ্ঠীর অন্তর্ভুক্ত।

আমার ঘরের খাটটার পা নড়বড়ে। টেবিলটার বার্নিশ নেই। এখান থেকে গল্‌ফ্‌ ফিল্ড দেখা যায়। সাহেবমেমরা গল্‌ফ্‌ খেলছে। জয়ন্তিয়া ছেলেরা তীর ধনুক নিয়ে খেলা করছে। ঘাড়েগদানে পুষ্ট ম্যানেজার তার ঘরে বসে বাজারের হিসেব মিলোচ্ছে। তার একটা চোখ রান্নাঘরের দিকে। ইদানীং কাঠ আর কয়লা বড্ডো চুঁর হচ্ছে। ম্যানেজার ললিতার আগমনবার্তা টের পেয়েছে। সে ভারী খুশী। তার “স্বর্গভূমিতে” দেবীর আবির্ভাব হয়েছে। মেমসাহেব লক্ষ্মী তার হোটলে। এ কি তার কম সৌভাগ্য ! এখানকার বাসিন্দা বলতে ও ধরনের সব লোক যারা মনোহারী দোকান চালায়। নয়তো কেরানী। নয়তো মেডিক্যাল এজেন্ট। আমার কল্যাণে হোটেলের প্রেস্‌টিজ বেড়ে যাচ্ছে দিন দিন। ম্যানেজার বয় মারফৎ ইতিমধ্যে চা আর কেক

পাঠিয়েছে। এ হোটেলে কেক আমি এই প্রথম দেখলাম। ললিতা খেয়ে বলেছে—“হাউ নাইস্!” আমি জানি রাত্রে আমার পাতে একটুকরো মাছ বেশী পড়বে। খানিকটা মাংসের ঝোল পথ ভুল করে আমার প্লেটে চলে আসতে পারে। ম্যানেজার হোটেলের পাবলিসিটি চায়। ললিতা কেক আর চা খেয়েছিলো। হোটেলের যথেষ্ট প্রশংসাও করেছিলো। তারপর যে প্রস্তাব সে এনেছিলো তা শোনার পর আমার মুখে ভাষা যোগায়নি। আমি ফ্যাল্ ফ্যাল্ করে তাকিয়েছিলাম। কেমন হতভম্ব হয়ে বসে ছিলাম। কেক চা গলা দিয়ে বেরিয়ে আসতে চাইছিলো। ললিতা আমাকে বিয়ে করতে চেয়েছিলো। একটা কথা সে আমাকে সোজাসুজি বলেছিলো। তার পেটে নাকি সন্তান এসেছে। সেই সন্তানের দায়িত্ব আমাকে নিতে হবে। সন্তানের পিতা নাকি সম্প্রতি ভারতের বাইরে প্লেন দুর্ঘটনায় মারা গেছে। জানিনে কতোটা সত্যি। ললিতা সন্তান চায়। আমাকেও চায়। আমি ছুজনের দায়িত্ব নিতে রাজী কিনা সে সেটা জানতে চায়। আমি কিন্তু এ দায়িত্ব নিতে অস্বীকার করি। ললিতা যাবার সময় বলে—“ব্রুট্”। বুঝতে পারিনি দোষ আমার না যে মারা গেছে তার! এর পরে ললিতাকে আমি এড়িয়েই চলি। ওর সঙ্গে দেখাশুনো বন্ধ করি। মাস তিনেকের ছুটিতে শিলং ছেড়ে চলে এসেছিলাম এবং তারপর আর শিলং যাইনি। এর পর অনেক বছর পরে আবার ললিতাকে নেফায় পাশিঘাটের এয়ার-ফিল্ডে দেখলাম। খানিকক্ষণ অগ্রমনস্ক ছিলাম। হঠাৎ তাকিয়ে দেখি প্লেন উড়বার জগ্গে প্রস্তুত। ললিতা আর ওর স্বামী প্লেনে উঠছে। শিশু-সন্তানের কি হলো জানবার আগ্রহ আমার নেই। ললিতা ডাট আজকে হয়তো আর ডাট নেই। অগ্র পদবী নামের সঙ্গে যুক্ত হয়েছে।



## ॥ চার ॥

পলিটিক্যাল অফিসের চক্রবর্তী। সামনের কয়েকটা দাঁত নেই। মাথায় কাঁচা-পাকা চুল, পঞ্চাশের ঘরে বয়স। গায়ের রং কোনো এক সময় যে পরিষ্কার ছিলো তা এখনও বোঝা যায়। আমার পাশিঘাট পৌছবার পর দ্বিতীয় দিন সন্ধ্যার সময় চক্রবর্তী ইন্সপেক্টর্স বাংলোতে এসে উপস্থিত হয়। চক্রবর্তী নেফাতে কাজ করছে অনেকদিন। সেই ব্রিটিশ আমল থেকে। নেফা সম্বন্ধে তার অনেক অভিজ্ঞতা। নেফা সম্বন্ধে সে অনেক কথাই শুনিয়েছিলো, পুরানো দিনের গল্প। চক্রবর্তী টিরাপ সীমান্তের ট্যাংছা ট্রাইব সম্বন্ধে বলেছিলো। শত্রুর মুণ্ড কেটে আনার সঙ্গে নাকি শস্ত্রক্ষেত্রের শ্রীবুদ্ধি ঘনিষ্ঠ সম্বন্ধ রয়েছে। লোহিত ডিভিসানের মিসমী মেয়ে স্বামীর বিশ্বাস হারালে তার নাকি হাতের একটি আঙ্গুল সঙ্গে সঙ্গে বিসর্জন দিতে হয়। শুনিয়েছিলো টিরাপের সিংকোদের কথা। অনিচ্ছাকৃত সন্তানের দায়িত্ব বাপকে হাসিমুখে নিতে হয়। মেয়েকে বিয়ে করা বা না করা প্রেমিকের ইচ্ছার ওপর। শুনিয়েছিলো সুবনসিরির ডাক্‌লা আর টাগিনদের কথা। বাইরের লোককে সহজে ওরা বিশ্বাস করতে চায় না। ডাক্‌লা ছেলেমেয়ে যদি স্বপ্ন দেখে যে তার আঙ্গুল কেটেছে তবে সে তার আশেপাশের কোনো মানুষের মৃত্যুর জন্য প্রস্তুত হয়। কে মরবে তা ভাবতে বসে। সিয়াং ডিভিসানের উত্তর অঞ্চলে গালংদের বাস। সিয়াং ডিভিসানের দক্ষিণে পাশিঘাটের আশেপাশে আদিদের বাস। ডিভিসনাল্ হেড কোয়ার্টার্স আলং। গালংদের ভেতর পাঁচ ভাই-এর এক স্ত্রী হতে পারে। অথবা প্রত্যেক ভাই-এর স্ত্রীর ওপর অণ্ড ভাইদের যৌন অধিকার থাকে। কিন্তু সন্তানের জন্ম দায়ী থাকবে সেই ভাই যে মেয়েটিকে বিয়ে করে এনেছে। যাক। এবার চক্রবর্তী মশাই-এর কথা বলি। চক্রবর্তীর অনেক অভিজ্ঞতা। কতো পলিটিক্যাল অফিসার এলো আর কতো গেলো তা আঙ্গুল গুণে চক্রবর্তী বলে দিতে পারে। সাহেব, অসমীয়া, বাঙালী, লুসাই, নাগা।

সমস্ত অফিসারদের নাম চক্রবর্তীর কণ্ঠস্থ। চক্রবর্তী সেলাম ঠুকে আর সাহেবদের মন জুগিয়ে টিকে রইলো। নেফার পাঁচটি ডিভিসানের সব খবর চক্রবর্তীর নখের ডগায়। পাশিঘাটের অফিসার ক্লার্কদের বাড়ির বন্দোবস্ত চক্রবর্তীকে করতে হয়। অফিস আর বাড়ির ফার্নিচারের হিসেবনিকেশ রাখতে হয় চক্রবর্তীকে। পাশিঘাটে সপ্তাহে একবার প্লেন নামে।

প্লেনের সরকারী, বেসরকারী মালপত্তরের খবরদারি চক্রবর্তীকেই করতে হয়। পাশিঘাট থেকে প্লেন এয়ার-ড্রপিং-এ গেলে চক্রবর্তীরই সমস্ত রকম ব্যবস্থা করতে হয়। এ ছাড়া অফিসারদের গৃহে ডিনার আর পার্টির সমস্ত বন্দোবস্ত তাকেই করতে হয়। এর ওপর রয়েছে অফিসারদের বউদের ফরমাশ। তাদের মন জুগিয়ে চলতে হয়। তাদের খুশী রাখতে হয়। জিজ্ঞেস করি—“আমার বাড়ির কি হলো?”

একগাল হেসে চক্রবর্তী বলে—“হবে। বাড়ি হবে।” তারপর একটু থেমে বলে—“পাশিঘাটে আর ক’টা বাড়ি রয়েছে! কাঠের তৈরী বাড়ির সংখ্যা হাতে করে গোনা যায়। বাদবাকী সব বাঁশের তৈরী।”

—“বাঁশের বাড়ি!”

—“হ্যাঁ তাই। শীতকালে বাঁশের ফাঁক দিয়ে ঠাণ্ডা হাওয়া এসে হাড় কাঁপিয়ে ছাড়ে। বর্ষাকালে জল চুঁইয়ে পড়ে। মাটি থেকে জেঁক আর অগ্ন্যাগ্নি পোকামাকড় উঠে আসে। তবু ওই বাসাবাড়িরই জন্তে কতরকম অনুরোধ। টিরাপের চ্যাংলা আর খোন্সা। লোহিতের তেজু আর রোয়িং। সুবনসিরির জিরো। কামেং-এর বুড়ো গাঁও আর বম্‌ডিনা থেকে লোক পাশিঘাটে বদলি হয়ে এসে বাড়ির জন্তে এমন জ্বালাতন শুরু করে যে জীবন দুর্বিষহ করে তোলে। তা আপনার বাড়ির অভাব হবে না। ব্যবস্থা একটা ঠিক করে দেবো।”

প্রশ্ন করি—“আপনি কতোদিন ধরে নেফাতে রয়েছেন!”

—“সেই ব্রিটিশ আমল থেকে। পাশিঘাটে তখন জঙ্গল আর জঙ্গল। নেফা সহস্র লোকে আর কতোটুকুন জানতো। দেশ স্বাধীন হবার পর সরকারের নেফার ওপর নজর পড়েছে। পরিবর্তনও খুব দ্রুত হচ্ছে। নেফা ধীরে ধীরে উন্নতির পথে এগুচ্ছে।”

—“আমাকে এই নির্জন বাংলাতে কতোদিন এরকমভাবে থাকতে হবে বলতে পারেন?”

—“কেন ভয়টয় পেয়েছেন নাকি?”

—“নিশ্চিতি রাতে বাংলোর আশেপাশে ফুঁপিয়ে ফুঁপিয়ে কেউ কাঁদে। কে কাঁদে বলুন দেখি?”

—“ওমি ময়াং হবে।” নির্বিকার কণ্ঠে বলে চক্রবর্তী।

—“ওমি ময়াং! সে কে?”

—“আমাদের পুরোনো চৌকিদারের ভাগনে। ওর কান্নাই শুনেছেন বোধ হয়।”

—“ওরকম ভাবে কাঁদে কেন?”

—“ওমি ময়াং-এর বৌ নেনী ময়াং ওই সিয়াং নদীর জলে ডুবে মরেছে। তারপর থেকেই ওর মাথার গোলমাল। আর ওর মৃত্যুর পর ওমি ওরকমভাবে কান্নাকাটি করে। ও বলে নেনীর আত্মা না কি সিয়াং-এর আশেপাশে ঘুরে বেড়ায়। ইন্সপেক্টর বাঙলোর আশেপাশে নেনীকে ঘোরাফেরা করতে দেখেছে বলে কেউ কেউ বলে থাকে। ওমি ময়াং জোর গলায় তাই বলে।”

—“বিশ্বনাথ নন্দী তাহলে নেনী ময়াং-এর কথাই শুনিয়ে গেছে!”  
আমি বলি।

—“বিশ্বনাথ নন্দী তাহলে সব কিছু আপনাকে শুনিয়েছে? তবে ভয় পাবার কিছু নেই। নেনী কারো কিছু ক্ষতি করে না। শুনতে পাই নেনীর আত্মা এদিক ওদিক ঘুরে বেড়ায়। তবে আমি কখনো দেখিনি।” বলে চক্রবর্তী।

—“আপনারা বেশ লোক মশাই। একজন বলে গেলো রাতের

বেলা ঘুমুতে ঘুমুতে চোখ কান খোলা রাখতে। সিয়াং যে কোনো মুহূর্তে ইন্সপেকশন্ বাংলা গ্রাস করতে পারে। অনেক খেয়েও তার ক্ষুধা নাকি যায়নি। আর আপনি বলছেন এখানে রাতের বেলা অশান্ত আত্মা ঘুরে বেড়ায়। ব্যাপার খুব সুবিধের মনে হচ্ছে না আমার।”

চক্রবর্তী জিভটা দাঁতের ফাঁকে ঠেলে দিয়ে কেমন চুক্ চুক্ করে শব্দ করে আর হাসে, অদ্ভুত হাসি।

—“সিয়াং-এর জলোচ্ছ্বাস বন্ধ করবার জন্ত আর নেনী ময়াং-এর আত্মার সদগতির জন্তে ইন্সপেকশন্ বাংলাতে আমরা ক’জন মিলে নামকীর্তনের বন্দোবস্ত করেছিলাম। দেব-দেবীর ছ’চারখানা ফটো, ধূপ, ধূনো, ফুল-বেলপাতা, বাতাসা, মিষ্টি, ফল সব কিছুই বন্দোবস্ত হয়েছিলো। কীর্তন গাইবার জন্তে লোক এনেছিলাম তিনশুকিয়া থেকে। পুরোহিত আমি। এদিক ওদিক থেকে ছ’চারজন লোকও জড়ো করেছিলাম। সেদিন ছিলো অমাবস্যা। তার ওপর ঝড়-বাদলার রাত। সিয়াং নদী বড়ো বেশী পাগলামি করছিলো। পাশিঘাটের পথে কোনো আলোর বন্দোবস্ত নেই। এমনিতে পাশিঘাটে জেনারেটর বসিয়ে সাড়ে পাঁচটা থেকে পৌনে আটটা পর্যন্ত আলোর ব্যবস্থা করা হয়। সেদিন আবার জেনারেটর মোটেও চলেনি, ঘুটঘুটে অন্ধকার। নামকীর্তন হলো। বাইরে বেজায় ঠাণ্ডা। চাদর আর কব্বল মুড়ি দিয়ে ইন্সপেকশন্ বাংলার বারান্দায় সব বসেছে। বারান্দার ধারে বাংলোর সিঁড়ি ধাপে ধাপে নেমে গেছে। নেমে গেছে সিয়াং-এর ধার পর্যন্ত। সিঁড়ির ওপরের ধাপগুলোর ওপর লোকজন বসেছে। কীর্তন শেষ হলো। এবার প্রসাদ বিতরণের পালা। আমি অন্ধকারের ভেতর প্রসাদ বিতরণ করছি। সিঁড়ির কয়েক ধাপ নীচে চাদর জড়িয়ে একজন বসে আছে। তাকে বার বার প্রসাদ নিতে বলি, লোকটি কোনোরকম শব্দ করে না। হাতও বাড়িয়ে দেবে না। সিঁড়ি দিয়ে কয়েক ধাপ নেমে গেলে তবে তার কাছে পৌঁছানো যায়। সিঁড়ি দিয়ে খানিকটা নেমে গিয়ে লোকটিকে প্রসাদ নেবার জন্তে হাত বাড়াতে

বলি। হাত আর সে কিছুতেই এগিয়ে দেয় না। লোকটা কি ঘুমিয়ে পড়লো? অনেক রাত হলো, লোকটার কি একটুও কাণ্ডজ্ঞান নেই? এত মেহনত গেছে শরীরের ওপর দিয়ে, প্রসাদ নিয়ে এখন আমাকে মুক্তি দিক।” চক্রবর্তী পা তুলে বসেছে। আবহাওয়া গল্প বলার এবং শোনার সম্পূর্ণ উপযোগী। চক্রবর্তী আবার শুরু করে।—“আমার একটু বিশ্রামের দরকার। ততোক্ষণে আমার বেশ রাগ হয়েছে। ভাবলুম প্রসাদটা ওর মুখেই তুলে দেবো। হাতটা বাড়িয়েছিলাম। বিরাত একটা জিভ এসে গোটা হাতখানা চেটে দিলে। সমস্ত কিছু বুঝে ওঠবার আগেই অজ্ঞান হয়ে গিয়েছিলাম। অজ্ঞান হবার আগে খানিকটা নজরে এসেছিলো। ডোরাকাটা বিরাত এক বাঘ। অস্ত্রের মুখে শুনেছি যে আমি অজ্ঞান হয়ে যাবার পরই বাঘটা ধীরে-সুস্থে সিঁড়ি বেয়ে নেমে বাংলোর পাশ দিয়ে হেঁটে গিয়ে জঙ্গলের ভেতর অদৃশ্য হয়ে যায়। সিয়াং-এ ঢল নেমেছিলো। বাঘটা জলের তোড়ে ভেসে এসে ইন্সপেকশন্ বাংলোর আশেপাশে আশ্রয় খুঁজেছিলো।”

ঠাট্টা করে বলি—“আপনাদের কীর্তন বোধ হয় ওর খুব ভালো লেগেছিলো!”

জিভ দাঁতের ফাঁকে ঠেকিয়ে চুক্, চুক্, করে শব্দ করে হাসে চক্রবর্তী।—“তা হয়তো হবে। পরম ভক্তি নিয়েই ও কীর্তন শুনছিলো। কাউকে কিছু বলেনি।”

—“তা চক্রবর্তী মশাই, আজ সারাদিন চোকিদারের কোনো পান্তা নেই, গত কালও ওর পান্তা মেলেনি, কি করি বলুন দেখি?”

—“খাবারের বন্দোবস্ত হয়েছে?”

—“তা হয়েছে। বিশ্বনাথ নন্দী বিকেলবেলাই টিফিন করিয়ারে খাবার ভর্তি করে পাঠিয়েছে।”

—“চোকিদারটাকে নিয়ে খুবই মুশকিলে পড়েছি।”

—“কি রকম?” প্রশ্ন করি।

—“পাশিঘাটের ডি. সি. মানে ডেপুটি কমিশনার গেছেন শিলং।

তার বাড়ি পাহারা দেবার জন্ত রাতের বেলা চৌকিদারকে রেখেছিলাম। সব বুঝিয়ে বাংলাতে রেখে আমি চলে এসেছিলাম। ভোরবেলা গিয়ে দেখি সে এক বিশী ব্যাপার।”

—“কি দেখলেন?” প্রশ্ন করি।

—“ডি. সি-র বাংলোর ঘরে আর বাইরে একখানা কাঁচও অক্ষত নেই।”

—“সে কি মশাই!”

—“সত্যি বলছি মশাই। সমস্ত কাঁচ গুঁড়ো-গুঁড়ো, আর তার জন্তে দায়ী আমাদের চৌকিদার বাবাজী।”

—“কাঁচ ভাঙ্গার রহস্যটা খুলে বলুন দেখি!”

—“চৌকিদার প্রচুর মত্তপান করে বাংলা পাহারা দিচ্ছিলো। কাঁচের ভেতর যখন সে নিজের ছায়া দেখেছে তখন অগ্ন লোক বাংলাতে ঢুকেছে মনে করে তাকে পিটিয়ে বের করতে গেছে। আর তাতে গুঁই অবস্থা। একটি একটি করে সমস্ত কাঁচ গুঁড়ো করেছে। গুর ধারণা প্রতিপক্ষর সবাইকে মেরে সে শেষ করেছে। গুঁদের সাহস দেখে সে অবাক বনেছে। ডি. সি-র বাংলাতে প্রবেশপত্র ছাড়া চুকেছে। ডি. সি-র সমস্ত ঘরের চাবিগুলো গুঁকে দিয়ে এসেছিলাম। কথা ছিলো ঘরদোর পরিষ্কার করে রাখবে। এখন বলুন দেখি ডি. সি-র কাছে আমি কি করে মুখ দেখাই? গুর চাকরি থাকবে না। আর সঙ্গে সঙ্গে ডি. সি. আমার ওপর চটবে। হয়তো বদলি করে দেবে নেফার অভ্যন্তরে অগ্ন কোনো জায়গায়।” চক্রবর্তী কেমন যেন মুষড়ে পড়েছে। প্রবলেম গুরুতর সন্দেহ নেই।

—“না না, কিছু হবে না।” সাস্তুনা দিই আমি। খানিকক্ষণ চুপচাপ। তারপর একসময় আমি বলি।

—“আপনি এর আগে কোথায় ছিলেন?”

—“লোহিত ডিভিসানে।”

—“নেফাতে কতোদিন ধরে আছেন?”

—“তা বছর ত্রিশের ওপর তো হবেই। দেশ স্বাধীন হবার আগে সাহেবদের সময় থেকে রয়েছে।”

—“নেফা সম্বন্ধে আপনি অনেক কিছু জানেন?”

—“দেখুন নেফা সম্বন্ধে এখনো মানুষ কতোটুকুন আর জানে। কামেঙ্ ডিভিসানে বারো আর চৌদ্দ হাজারের ওপর সব পর্বত রয়েছে। তাদের চূড়া সব বরফে ঢাকা। সুবনসিরির ছর্ভেত অরণ্য। টিরাপ সীমান্ত যেখানে ব্রহ্ম সীমান্তে মিশেছে সেখানে ঢুকতে এখনো বুক টিপটিপ করে। স্বাধীনতার আগে সাহেবদের সঙ্গে নেফা অরণ্যে ঘুরে বেড়িয়েছি। তারা লোহিতের ওয়ালাং-এর পথে চীনের দিকে চলে যেতো। আর যেতো কামেঙ্-এর টোয়াং দিয়ে তিব্বতের দিকে। ছপ্তাপা গাছপালার সন্ধান করতো। অর্কিডের ওপর ছিলো ভয়ানক লোভ।”

—“আপনি কি করতেন?”

—“আরে মশাই ওরা এক্সপিডিসানে যাচ্ছে আর সঙ্গে সঙ্গে এ শর্মার খোঁজ পড়তো। পোর্টার চাই। তিব্বতী নয়তো খামতী। পাসপোর্ট যোগাড় করা। পোর্টারদের মজুরী নিয়ে দরকষাকষি করো। তাছাড়া ট্রাইবসদের সব উপহার দিতে হবে। কাঁচ আর পাথরের মালা। গ্রামোফোন, চা, চিনি, ছুন। এ ছাড়া রয়েছে এয়ার-ড্রপিং। কুয়াশায় ঢাকা সব পাহাড় আর পর্বত। তার ভেতর দিয়ে ভাঙ্গা সব প্লেন নিয়ে উড়ে গিয়ে ফুড আর নানারকম জিনিসপত্তর এয়ার ড্রপ করা।”

—“ভয় করতো না?”

—“করতো না আবার! প্লেনগুলো ছিলো ভাঙ্গাচোরা। মালপত্তর ফেলবার সুবিধের জগ্বে প্লেনে দরজার বন্দোবস্ত রাখা হয়নি। সেখান দিয়ে ছ-ছ করে হাওয়া আসতো। বাঁশ ধরে প্লেনের ভেতর দাঁড়াতে হতো। একবার তো মালপত্তর ফেলতে গিয়ে মালের সঙ্গে নিজেই চলে গিয়েছিলাম। ভাগিয়াস্ সঙ্গের একজন প্যান্টুলুনের

পায়ের দিকটা টেনে ধরে আমার গতিরোধ করেছিলো ! নইলে হয়ে গিয়েছিলো সেদিন। এ শর্মাকে আর আপনার জন্তে বাড়ি খুঁজতে হতো না। এয়ার-ড্রপিং-এর সময় প্লেনের ভেতর চট দিয়ে গলা পর্যন্ত ঢাকা শুয়োর আর ভেড়ার মধ্যে ঘণ্টার পর ঘণ্টা ঠায় বসে থাকতে হয়েছে।”

—“ভালো লাগে এ চাকরি আপনার ?”

—“প্রথমে লাগতো না। শেষে অভ্যেস হয়ে গিয়েছিলো। নেফার এ উদ্বেজনা কোথায় পাবো ? প্লেন্সের চাকরি কেমন যেন বিশ্বাদ আর জলো মনে হয়। ডালহৌসী স্কোয়ারে সেই দশটা-পাঁচটার চাকরি। টিফিনের সময় ছোলাভাজা আর বাদাম চিবানো, আর ভাঁড়ের চা। লোক আর লোক। মেপে মেপে খাওয়া। তারপর টক্ টেকুর। বড়বাবু, মেজবাবু, সেজবাবুর মুখখিঁচুনি। এখানে খুব একটা বড়ো চাকরি কিছু করিনে। কিন্তু ভাবুন দেখি পলিটিক্যাল অফিসার গায়ে হাত বুলিয়ে কাজ আদায় করে, সেণ্ট্রাল রিজার্ভ পুলিশের কমান্ডার বাসাবাড়ির জন্তে আমার হাতটা চেপে ধরে, বিহার মিলিটারী পুলিশের জমাদার তাদের কোয়াটার্সে আয়োজিত খানাপিনাতে আমাকে নিমন্ত্রণ করে। আসাম রাইফেলস্-এর মেজর ভালো মদ আমার গ্লাসে ঢেলে দিয়ে বলে—‘চক্রবর্তী, রাত্রে ডান্স আছে। চলে এসো।’ বলে আমার পিট চাপড়িয়ে দেয়। তাই বলছিলুম স্মার, নেফার এ উদ্বেজনা, এ আনন্দ কোথায় পাবো ? জানি সামনে বিপদ। পেছনে বিপদ। কিন্তু সম্মান আছে এখানে। এখানে বেঁচে আছি বলে মনে হয়। আপনাদের শহরগুলোতে লোকগুলো বেঁচে থাকে না। ঝিমোয়। ঝিমিয়ে ঝিমিয়ে এক সময় মরে যায়।”

—“লোহিত ডিভিসান সম্বন্ধে কিছু বলুন।”

—“ওই মিস্‌মী পাহাড় এলাকায় ছিলাম। আজকাল যাকে আপনারা লোহিত ব্রিটিয়ার ডিভিসান বলেন। গেছি সদিয়া থেকে ওয়ালাং।” লোহিতের গল্প শোনায় চক্রবর্তী, “লোহিতের অধিবাসী



মিস্‌মীরা তিব্বেতো-বার্মান বংশোদ্ভূত। মিস্‌মীদের ভেতর তিনটে ভাগ। টান, মারা এবং মিজা। শোনায় ইঁহু মিস্‌মী আর কামান মিস্‌মীদের কথা। দিগারু মিস্‌মী নেফার একমাত্র জ্ঞাত যারা হাতে মুখে অঙ্কনবিহার কৌশল দেখাবার আগ্রহ প্রকাশ করে না। আর পান খায় না। ইঁহু মিস্‌মী নাকি চমৎকার কাপড় বোনে। তাঁরাও অথবা দিগারু মিস্‌মীদের পুরুষদের চুল মাথার ওপর ঝুঁটি করে বাঁধা। ইঁহু মিস্‌মীরা নাকি ঝগড়াঝাঁটি আর যুদ্ধবিগ্রহের খুব ভক্ত ছিলো। কথায় কথায় বিবাক্ত তীর ছুঁড়তো।”

—“মিস্‌মীরাও নিশ্চয় আদিদের মতো অনেকরকম দেবদেবীর পূজা করে?” একসময় চক্রবর্তীকে প্রশ্ন করি।

—“মিস্‌মীদের প্রলয়ের দেবতা হলো মুজি ডাগ্রাহ। শিকারের দেবতা ডানি পাঁও। সম্পত্তি আর রোগের দেবতা টাব্লা।”

—“আপনি ওয়ালাং-এর পথে নিশ্চয় যাতায়াত করেছেন?”

—“তা তো করতেই হয়েছে। সদিয়া থেকে ওয়ালাং। কুণ্ডল নদী কি কষ্ট করে না পার হয়েছে। মিস্‌মী ছোকরার পাঁচটা বোঁ। যে যতোটা বিয়ে করবে তার ততো প্রতিপত্তি। ছোকরা সারাদিন তামাক টেনেছে। নিজে ভীষণ কুঁড়ে। পাঁচটা বউ অনবরত খেটেছে।”

হেসে বলি—“আমাদের আর সে সৌভাগ্যই হলো না।”

চক্রবর্তী বলে চলে, “তারপর শুনুন না?”

—“বলুন।”

—“বউ নিয়ে ছোকরা আমার পাশে শুয়ে পড়লো, পাঁচটা বোঁ আমার পাশে। আমি লজ্জায় লাল। সাহেব ছুটো খুব খুশি। বলে, ‘ক্যার্লি’ অন্ চক্রবর্তী।’ এর পর তেজুতে থামলাম। ডান হাতে পরশুরাম কুণ্ড। হিন্দুদের মস্ত বড় পবিত্র তীর্থস্থান। অগ্নি রাস্তা ধরে ঘন বন পার হয়ে ২০০০ ফিট উঠে ডেন্নিঙ্। কি বৃষ্টি কি বৃষ্টি! চেরাপুঞ্জীকে হার মানায়। রাতের বেলা মিস্‌মী পোর্টাররা মাংসের জন্তে মিথুন মারলে। নাচ, গান, মণ্ডপান, হৈ-ছল্লোড়। সাহেব ছুটো

মদ টেনে বেছঁশ। মিস্‌মী ছোকরার পাঁচ বো। একটা বোকে অণ্ড জায়গা থেকে ফুসলিয়ে এনেছে। স্বামী ছাড়বে কেন? ক্ষতিপূরণ স্বরূপ মিথোন চেয়েছে। সেই ক্ষতিপূরণ দেওয়া মিথোন কেটে এ উৎসব।”

—“মেয়েগুলো আপনাকে জ্বালালে বুঝি?”

—“আর বলবেন না। ব্রাহ্মণ সন্তানের চেহারাখানা খারাপ ছিলো না। আমার হাত ধরে এই টানাটানি। মেয়েগুলোর চেহারা ভালো। কিন্তু গায়ে কি ভীষণ বোটকা গন্ধ। মাসে একবার স্নান করে কিনা সন্দেহ। মাথাভর্তি উকুন। এ গুর মাথার উকুন বেছে দিচ্ছে। ছেলেমেয়ে সবাই চুরুট টানে। রাতদিন টানছে। একটি মেয়ে যখন আমার হাত ধরে টানাহেঁচড়া করছে তখুনি লক্ষ্য করলাম—”

—“কি লক্ষ্য করলেন?”

—“দেখলাম হাতের দুটো আঙুল নেই। এরকম আরো কয়েকটি মেয়ের হাতের আঙুল নেই দেখলাম। জিজ্ঞাসা করে জেনেছিলাম স্বামীর বিশ্বাস হারালে আর অণ্ড লোকের সঙ্গে ফটিনটি করলে, হাতের আঙুল বিসর্জন দেবার জগ্গে প্রস্তুত থাকতে হয়।”

—“যাক, ভাগ্যিস মেয়েটি আপনার জগ্গে তৃতীয় আঙুলটি হারায়নি!” ঠাট্টা করে বলি আমি।

—“এর ভিতর গুরু হলো ঝড়-ঝুঁটি। আর ওরা গুরু করলো মুজি ডাগ্রাহব পূজো। উনি ঝড়, বিদ্রোহ, ঝুঁটির দেবতা। এর পর হেরুলিয়াং। কি কুয়াশা! বাপ, ডিড্‌ডিং-এ ৬০০ ফিট ওপরে সাদা বরফের স্তর। মিস্‌মীদের সমাজ সিয়াং-এর আদিদের মতো সমষ্টিমুখী নয়। মিস্‌মীদের জীবনে গ্রাম বা গ্রামসভা বড়ো নয়। ঘর তাদের সর্বস্ব। পাহাড়ের ওপর ঘরগুলো। হেলে রয়েছে। সাধারণতঃ বাট ফিট লম্বা। ভেতরে করিডর রয়েছে।” মন দিয়ে শুনেছি চক্রবর্তীর কথা, চক্রবর্তীর নেকা সম্বন্ধে অনেক অভিজ্ঞতা।

—“এর পর বারো-চোদ্দ হাজার ফিট সব পর্বত অতিক্রম করতে হয়েছে। নদীগুলোতে সব বাঁশ আর বেতের নাঁকো। লোহিত, ডিগারু,

কুণ্ডিল পানী। কামলাং পানী, বেরেং ধৌত লোহিত সীমান্ত বডেং মনোরম। কুণ্ডিল নগর, শিশুপাল নগর, ব্রহ্মপুত্র বা পরশুরাম কুণ্ডর প্রদেশ সারা ভারতের লোক জানে। লোহিতে থাকে মিস্‌মী, পাদাম, খামটি আর সিং ফো জাতীয় লোক। খামটি আর সিংফোরা বৌদ্ধ ধর্মাবলম্বী। খামটির ভাষা, ব্রহ্মদেশের আর অসমীয়া ভাষা ব্যবহার করে। খামটি ভাষা ইন্দোচীন ভাষাগোষ্ঠীর সঙ্গে জড়িত। এর পর গেছি মাছিমা, হাই উলিয়াং, প্যাং গং, চ্যাং উনটি আর মিংজং। এর পর সেটটি থেকে ওয়ালাং। চৌদ্দ হাজার ফুটের ধাক্কা। বরফ আর বরফ।”

—“মিস্‌মীদের কথা আমরা কবে জানতে পারি?”

—“বাঙলা রেকর্ডে মিস্‌মীদের প্রথম উল্লেখ পাওয়া যায় ১৮২৫ খ্রীষ্টাব্দে যখন লেফটেন্যান্ট বরলান্ট ব্রহ্মপুত্রের উত্তরদিক আবিষ্কারে মগ্ন।” চক্রবর্তী থেমেছে।

—“শীগগির বাড়ি পাবো তো?”

—“বাড়ি পেয়ে যাবেন। টেঙার কল করেছে। তিনশুকিয়া আর ডিব্রুগড় থেকে মিস্ত্রী আসছে। ইনার লাইনের জগু সব গোলমাল। নেফা এ্যাডমিনিস্ট্রেশন সম্পূর্ণ আলাদা। পাস আর পারমিট ছাড়া কেউ নেফাতে ঢুকতে পারে না। মালপত্তর পৌঁছুতে অনেক দেরি হয়ে যায়। বর্ষাকালে নেফার অনেক স্থান বাইরের জগৎ থেকে সম্পূর্ণ বিচ্ছিন্ন হয়ে যায়। বাইরের লোক এসে অবাধে এখানে ব্যবসা-বাণিজ্য করতে পারে না। সব কিছুর জগ্গে ছোটো নেফা হেড কোয়ার্টার্স শিলং-এ। না, অনেক কথা বললাম এবার ফার্নিচারের লিস্টটা তৈরী করে ফেলতে হয়।” চক্রবর্তী নাকের উপর চশমা তুলে লিস্ট কমপ্লিট করতে শুরু করে। একসময় আমার দিকে চেয়ে বলে—“তবে নেফা আর সে নেফা নেই। ভারত স্বাধীন হওয়ার পর এর দ্রুত পরিবর্তন হচ্ছে। সবাইকার সঙ্গে সমান তালে পা ফেলে চলবার জগু নেফা প্রস্তুত হচ্ছে।”

## ॥ পাঁচ ॥

পাশিঘাটের ইন্সপেকশন্ বাংলোতে কয়েকদিন কাটাতে হয়েছে।  
তৃতীয় রাতেও বডো ভ্রমোংপূর্ণ আবহাওয়া ছিলো।

ইন্সপেকশন্ বাংলোর দরজা-জানালা ঠক্ঠক্ করে কাঁপতে থাকে।  
সিয়াং-এর সেদিন বডো ভয়ঙ্কর চেহারা, হাওয়ায় ছিলো সাংঘাতিক  
তেজ। বৃষ্টি এসে তীরের মতো শরীরে বিঁধতে থাকে। দরজায়  
আবার সেই করাঘাত। হ্যারিকেনটা একরাশ ধোঁয়া উদগীরণ করতে  
থাকে। বৃষ্টি বাদল, মেঘ আর বিদ্যুৎ-এর ভেতর সেই ফুঁপিয়ে ফুঁপিয়ে  
কান্না। কাঁদে আর কাঁদে। সিয়াং গর্জছে। দূরে পাহাড়গুলো  
অম্পষ্ট। এ অন্ধকারে কে কাঁদে? আজও বাংলোর চৌকিদার নেই।  
বিশ্বনাথ নন্দী আর চক্রবর্তী যেসব কাহিনী শুনিয়ে গেছে! সারা  
বাংলোতে আমি ছাড়া আর কেউ নেই। দরজার কড়া কে যেন ঘন  
ঘন নাড়ছে। অনেক কণ্ঠের ফিসফিসানি। মনে মনে ভাবি ওসব  
হাওয়ার কারসাজি। কালকে ভোরেই পালাবো এখান থেকে। কার  
সহ হয় এ কান্নাকাটি? দরজার ছিটকিনি খুলে লঠনটা নিয়ে পাশের  
ঘরে ঢুকে পড়ি। ঘরের ভেতর একরাশ ভাঙ্গা ফার্নিচার। স্তূপীকৃত  
অবস্থায় পড়ে আছে। ফার্নিচারের ওপর ধুলোর আবরণ। ছ'চারটে  
আরশোলা উড়ছে এদিকে ওদিকে। ঐ ঘরের দরজা খুলে বারান্দা।  
বারান্দায় এসে দাঁড়াই। পায়রাগুলো ডাকে বাক্-বাকুম্-কুম্। জলের  
ছাঁট এসে গায়ে লাগে। বারান্দার পর উঠোন। মস্ত বড়ো উঠোনের  
ওধারে চৌকিদারের ঘর। উঠোনভর্তি জঞ্জাল আর আগাছা। বড়ো  
বড়ো ঘাস হাওয়ায় ঘন ঘন আন্দোলিত হচ্ছে। একরাশ ফণি মনসার  
ঝোপ। হ্যারিকেনের আলোতে কিছুই নজরে আসে না। চারদিকে  
চাপ চাপ অন্ধকার। সিয়াং-এর বৃকের ওপর দিয়ে হিংস্র হাওয়া গর্জন  
করে ছুটে আসছে। মাইলের পর মাইল অতিক্রম করে এসে ধাক্কা  
দিচ্ছে ইন্সপেকশন্ বাংলোর গায়ে। হ্যারিকেনটা উঁচু করে তুলে

ধরি। বারান্দার কোণে একটা লোক শুয়ে আছে। সারা অঙ্গ চাদরে ঢাকা। লোকটা ফুঁপিয়ে ফুঁপিয়ে কাঁদছে। অসমীয়া ভাষায় চোঁচিয়ে বলি—“এই তুমি কাঁদছো কেন?” কোন উত্তর নেই।—“এই তুমি কাঁদছো কেন?” লোকটা চাদর ফেলে দিয়ে উঠে বসে। ফাল্ফাল করে তাকায় আমার দিকে। ছোটো ছোটো চোখ। মঙ্গোলিয়ান ফিচার্স। থ্যাবড়া নাক। কানের লতিতে দুটো বিরাট ফুটো। তাতে জন্তুর হাড় গোঁজা রয়েছে। মুখে দাড়িগোঁফের অভাব। বড্ডো শীর্ণ চেহারা। জিজ্ঞাসা করি—“তোমার নাম কি?”

—“ওমি ময়াং।”

—“তুমি ওরকম ভাবে কাঁদছো কেন?” আমি প্রশ্ন করি।

কোনো উত্তর নেই। আবার জিজ্ঞাসা করি—“তুমি ওরকম ভাবে কাঁদছো কেন?”

—“তুমি আমার নেনী ময়াংকে দেখেছো? নেনী ময়াং আমার বউ। আমার বউকে তুমি দেখেছো?”

—“তোমার বউকে!”

—“হ্যাঁ। আমার বউকে। নেনীর যে এ সময়ে এখানে আসবার কথা ছিলো। সে এলো না কেন? সিয়াং-এর তীরে তাকে তুমি দেখোনি?”

চক্রবর্তীর কথাগুলো মনে হয়। চক্রবর্তী আগেই এসবের আভাস দিয়েছিলো। বিশ্বনাথ নন্দীর গল্পটাও ভুলতে পারিনি।

—“তোমার বউ-এর কি হয়েছে?” প্রশ্ন করি।

—“সিয়াং ওকে খেয়েছে। সিয়াংকে কত অস্থরোধ করেছি আমার বউকে ফিরিয়ে দিতে। সে ফিরিয়ে দেয়নি। সিয়াং আমার নেনীকে খেয়েছে। তাকে কতো পূজো দিয়েছি। মিথোন মেরে মিথোনের রক্ত চলেছি ওর জলে। তাও নেনীকে ফেরত দিলো না।”

—“তুমি নেনীকে দেখেছো?” প্রশ্ন করি।

—“দেখিনি আবার! সিয়াং ওকে গিলে খাবার পর অনেকবার

দেখেছি। নেনীকে ধরতে গেলে নেনী পালিয়ে যায়। মুখ ঢেকে ও পালিয়ে বেড়ায়।”

—“মুখ ঢেকে কেন!” প্রশ্ন করি ওমি ময়াংকে।

—“ও মুখ দেখাবে কি করে?” বলে ওমি।

—“কেন?”

—“উই যে উই।” ঘন অন্ধকারের দিকে সে অঙ্গুলিনির্দেশ করে।

—“ওখানে! ওখানে কি?”

—“ওখানে একটা বাংলা ছিলো। আর বাংলোর ঘরে আমাকে না জানিয়ে গাঁয়ের কাউকে কিছু না বলে সার্কেল অফিসারের সঙ্গে সারা রাত ধরে নেনী ঢলাঢলি করতো। রিহা গ্রামে বাপের বাড়ি যাবার নাম করে নেনী একরাতে এখানে চলে এসেছিলো। সার্কেল অফিসার ওকে শাড়ি গয়নার লোভ দেখিয়েছিলো আর সে লোভেই বাংলাতে রাতের বেলা এসে হাজির হয়েছিলো। পাশিঘাটে সার্কাসের দল এসেছিলো। আমি সার্কাসের তাঁবুতে সে রাত্তিরে খেলা দেখছিলাম।”

—“তারপর?”

—“সিয়াং সব দেখতো। সিয়াং সব দেখতে পায়। সিয়াং আমাদের দেবতা। তাঁকে ফাঁকি দেওয়া সহজ নয়। সে কেন এসব সহ্য করবে? সে-রাতে নেনী আর সার্কেল অফিসার যখন স্মৃতি করছে, তখন সিয়াং-এর জল এসে গোটা বাংলা ভাসিয়ে নিয়ে গেলো। ভেসে গেলো সার্কেল অফিসার আর নেনী। আমার নেনী।” কান্নায় ওমি ময়াং ভেঙ্গে পড়ে।—“নেনীকে শাস্তি দিতে গিয়ে সিয়াং আমার বৃকের পাঁজরা ভেঙ্গে দিয়ে গেলো।” তারপর একটু থেমে বলে—“তুমি নেনীকে দেখেছো? নেনী বড্ডো সুন্দরী ছিলো। গাঁয়ের যুবকরা ওকে দেখে পাগল হতো। ওর জন্মে দু’দলে কতোবার লড়াই বেধেছে। রক্তে মাটি ভিজ়ে লাল হয়েছে।” মাথা নেড়ে জানাই নেনীকে দেখিনি। ওমি হঠাৎ খপ্ করে আমার হাতটা ধরে ফেলে।—“আমার সঙ্গে চলো। নেনীকে দেখাবো, চলো আমার সঙ্গে।”

ভালো পাগলের পাশায় পড়লাম ! এ কোথায় আমাকে নিয়ে যাবে কে জানে ? হাতটা ওর হাত থেকে ছাড়িয়ে নিই । কোথায় যাবো ওর সঙ্গে ? সিয়াং-এর ধারে ? সর্বনাশ, তাহলেই হয়েছে ! সিয়াং ফুঁসছে । গর্জাচ্ছে । কাছে-পিঠে ঘন ঘন বাঘের ডাক শোনা যাচ্ছে । নিজেকে ওর হাত থেকে মুক্ত করে নিজের ঘরের দিকে-চলে যাই । মনে মনে প্রতিজ্ঞা করি এ ইনস্পেকশন্ বাংলোতে আর এক সন্ধ্যাও কাটাবো না । এখানকার মানুষগুলো কেমন যেন । অন্ধকার আর নির্জনতার সুযোগ নিয়ে এরা এমন সব বিশ্রী-বিশ্রী গল্প বলে । ডাক্তার বিশ্বনাথ নন্দী নেনীকেই দেখেছিলো । বিশ্বনাথ নন্দী পরে গিয়ে রোগিনীর সন্ধান পায়নি । সন্ধান পেয়েছিলো তার প্রেসক্রিপশনটির । আশেপাশে ঘরবাড়ির চিহ্নমাত্র ছিলো না । একটা গাছের তলায় তার লেখা প্রেসক্রিপশনটি পড়েছিলো । না, এখানে সব সম্ভব ।

॥ ছয় ॥

গ্রাম উন্নয়ন কেন্দ্রের অফিসে যাবার রাস্তায় পোস্ট মাস্টারের ঘর । পাশিঘাটের এলাকার খানিকটা বাইরে । ছুপাশে ঘন জঙ্গল । বিরাট বিরাট সব গাছ । বট আর অশ্বথ, আম, জাম, কাঁঠাল আর হরিতকী গাছ । জানা, অজানা কতো রকমের লতা আর গুল্ম । অপরাজিতা আর ঝুমকোলতা । দূরে শীর্ণকরণ । শীর্ণ চেহারাই বটে । ঠাণ্ডা মেজাজের । অসংখ্য নুড়ি আর পাথরে বোঝাই । বেশীর ভাগ সময় জল থাকে হাঁটুর নীচে । তবে ক্ষেপে উঠলে ওর আর শীর্ণ চেহারা থাকে না, জল গলা অবধি উঠে আসে । নদী পার হওয়া তখন অসম্ভব হয়ে ওঠে । শীর্ণকরণের ধারে ঝোপঝাড়ের ভেতর বাঁশের ঘরগুলো । পদম, মিনিয়ং আর গালংদের বাস । এরই ভেতর একটা বাসাবাড়িতে থাকে পাশিঘাটের পোস্ট মাস্টার আর তার স্ত্রী । বউটির আর কতো বয়স হবে ! আঠারো কি উনিশ । টানা-টানা চোখ, ডা। কাজল-কালো আঁখি ।

এক জোড়া জু। মনে হয় তুলি দিয়ে কেউ ঐঁকেছে। বউটির গায়ের  
 রং ময়লা। কিন্তু রং ময়লা হলে কি হবে? কি অসামান্য লাবণ্য মুখে  
 চোখে। বউটি চুল টান্ করে বেঁধেছে। পেছনে ছলছে লম্বা আর  
 ইয়া মোটা একটা বেণী। কপালে প্রকাণ্ড একটা সিঁদুরের ফোঁটা।  
 ডাগর ডাগর চোখ দুটি মেলে বউটি তাকিয়ে থাকে। তাকিয়ে থাকে  
 দুর্ভেদ্য অরণ্যের দিকে। বট আর অশ্বথের দিকে। তলায় তলায় যার  
 জমাট অন্ধকার। কাঁঠাল গাছটার গা বেয়ে উঠেছে অসংখ্য লতা।  
 একরাশ ফুল নিয়ে এদিক থেকে ওদিকে ছলছে। কিছুদূরে বৃষ্টির জল  
 জমে একটা ভোবার সৃষ্টি হয়েছে। তাতে ফুটে রয়েছে ছোটো শাপলা  
 ফুল। কুঁড়ি সহ শাপলাব ডাঁটাগুলো নড়ছে। কাঁঠাবড়ালীটা জাম-  
 গাছেব গা বেয়ে সুরুত সুরুত করে উঠছে আর নামছে। নজর  
 কবে বউটিকে দেখছে। প্রতিদিনই দেখে, ছুজনের সঙ্গে এক নিবিড়  
 সম্পর্ক গড়ে উঠেছে। দূরে পাহাড়গুলোর বৃকের ওপর দিয়ে হালকা  
 মেঘ ভেসে যাচ্ছে। পাহাড়গুলোতে রয়েছে সবুজ আর নীলের মিশ্রণ।  
 এ অঞ্চলটাতে সারাদিন একটা লোক চোখে পড়ে না। সারাটা ছপুর  
 এক বকম ভীষণ নিঃস্বাম, নিস্তরু। মাঝে মাঝে “চোখ গেলো” “চোখ  
 গেলো” বলে পাখীটার আত্ননাদ। বউটি তাকিয়ে তাকিয়ে চারদিকের সব  
 কিছু দেখে। সে বডো একা। সঙ্গী নেই। সাথী নেই। লোক নেই।  
 জন নেই। বাসাবাড়ীর বাঁশের বারান্দায় বউটি দাঁড়িয়ে থাকে। দাঁড়িয়ে  
 থাকে মুখাখানা হ্লান করে। আমি ওই পথে স্কুলে যাই। ভোরে ক্লাস বসে,  
 ছপুরের দিকে আমি বাড়ি ফিরি। শীর্ণকরণ হেঁটে পার হই। কোনো-  
 দিন জল কমবার জন্তে অপেক্ষা করতে হয়। বউটিকে আমি দেখি।  
 বউটি আমাকে দেখে। এই গভীর, নির্জন প্রান্তরে যেখানে মিনিয়ং  
 আর পদমরা থাকে, যাদের ভাষা একবর্ণ বোঝা যায় না, যেখানে  
 জঙ্গল আর জঙ্গল, সেখানে ছুজনে ছুজনার বডো আপনার লোক  
 বলে মনে হয়। আমি জানি বউটি কি ভাবে। পোস্ট মাস্টারের  
 বাড়িতে গিয়ে আমি স্বামী-স্ত্রীর সঙ্গে আলাপ কবেছি। বউটি আমার



কাছে ছুঃখ করে বলেছে—“প্রায় সারাটা দিন উনি পোস্ট অফিসে কাজকর্ম নিয়ে সময় কাটান। বলুন আমার সময় কি কাটে?”

এ আক্ষেপের উত্তরে কি বলবো ভেবে পাইনে। পোস্ট মাস্টার চেয়ারে পা তুলে টেবিলের ওপর ঝুঁকে কাজ করে যায়। হাতের আঙুলে ধরা থাকে একটা বিড়ি। কাজ আর কাজ। সন্ধ্যা একটা মিরি পিয়ন। মনে মনে ভাবি তোমার তো বাপু রয়েছে রেজিস্টারড লেটার, খাম, পোস্টকার্ড, মণিঅর্ডার, স্ট্যাম্প আর সেভিংস গ্র্যাকাকউন্ট। বউকে কি দিলে! একটা কচি কোমল তুলতুলে শিশুর-চেহারা চোখের সামনে ভেসে ওঠে। ছুবছরের ওপরে হয়ে গেলো। পোস্ট মাস্টার যেন কেমন। খাঁলি কাজ আর কাজ।

—“ভাবুন তো কলকাতার শ্যামবাজারের পাঁচমাথার মোড় থেকে এখানে নিয়ে এলে কেমন লাগে?” বউটির মুখখানা বড্ডো করুণ আর বিষাদ মাখানো। কি জবাব দেবো? আমি দেখেছি ছুপুরবেলা ওর সঙ্গী হয় টিয়া, বুলবুলি, শালিক আর কাঠবিড়ালী।

পোস্ট মাস্টার বলে—“সারাটা দিন পোস্ট অফিসে না কাটিয়ে উপায় আছে? যে রকম কাজের ভিড়। কাজের গাফিলতি হলে কেউ আমাকে ছাড়বে? ডিক্রগড়ের অফিস থেকে ইন্সপেকশনে এসে চাকরি খেয়ে দেবে। আর চাকরি গেলে খাবো কি বলুন। অনেক আগেই যে ঘরবাড়ি ছাড়া হয়েছি।” পূর্ব পাকিস্থানের ছোট্ট একটি গ্রাম বোধ করি ওর স্মৃতিপথে ভেসে ওঠে।—“তাই সময় সমান ভাগ করে নিয়েছি। পোস্ট অফিস পায় বারো ঘণ্টা, বউ-এর জন্তে বারো ঘণ্টা।” পানে লাল হয়ে যাওয়া দাঁতগুলো বের করে পোস্ট মাস্টার হাসে। কানের বিড়িটা আঙুলে নিয়ে টেবিলের ওপর ঠোকে।

—“তোমার কাজই সব? বউ কিছু নয়?” বলে বউটি।

—“আরে লোক না দিলে আমি কি করবো! ডিক্রগড়, জোড়হাট আর শিলং অফিসে কি কম লেখালেখি করেছি।”

—“তুমি কিছু লেখোনি।” বউটি বলে।

সর্বনাশ, বউটি সব ফাঁস করে দিচ্ছে। পোস্ট মাস্টারের কলম ভোঁতা করে দিচ্ছে। বউটির দাঁতগুলো কি অসম্ভব ধবধবে সাদা !

বউটি এক ফাঁকে ঘি-এ ভাজা মুড়ি আর চা নিয়ে আসে।—“বলুন তো সারাদিন আমার কি করে কাটে?” বেশ বুঝতে পারি একটা দ্রুত যৌবন ওর ভেতর মাথা গুমরে মরছে। আমি কি করতে পারি? কি সাহসনা ওকে আমি দিতে পারি?

—“তাও তো সিয়াং-এর টুটিং আর টিরাপের খোন্সাতে বদলি হতে হয়নি। পাশিঘাট ওদের তুলনায় স্বর্গ।” বলে পোস্ট মাস্টার।

—“ছাই ভালো!” বলে বউটি।

—“থারটি থি, গ্র্যাণ্ড্ ওয়ান থার্ড এলাউয়েন্স, ফ্রি কোয়ার্টার্স। আরো অনেক সুবিধে। একরাশ টাকা।” বলে পোস্ট মাস্টার।

—“তুমি তোমার টাকা আর সুখ-সুবিধে নিয়ে থাকো। আমার দম বন্ধ হয়ে আসে।” তারপর আমার দিকে ফিরে বলে—“ওর ফিরতে ফিরতে রাত সাতটা সাড়ে সাতটা হয়। আশেপাশে ঘন জঙ্গল, অন্ধকারে কিছুই নজরে আসে না! বাঁশের দরজাটা ভালো করে বন্ধ হয় না। এমন ভয় করে আমার।” বউটি কেমন উদাস দৃষ্টি নিয়ে তাকায়।

চোখের সামনে ভেসে ওঠে বাঁশের ঘরটা ঠিক সন্ধ্যার পর। গভীর অন্ধকারে বাঁশের দরজাটা বন্ধ করে হারিকেনটা নিয়ে বউটি বসে আছে। দমকা বাতাস এসে আলো নিভিয়ে দিতে চায়। বাঁশের দরজার ফাঁক দিয়ে বাতাসের ভেতরে ঢোকবার প্রয়াস। কাছাকাছি একটা পেঁচা কি বিস্মীভাবে ডাকছে। বউটির মুখটা ভয়ে কেমন সাদা হয়ে গেছে। তার রূপ-যৌবন মাস্টার মশাই-এর শীলমোহর, পার্শেল আর মণিঅর্ডারের নীচে চাপা পড়ে দমবন্ধ হয়ে মরছে। মাস্টার মশাই মাথা নীচু করে টাকার হিসেব করছে। স্টাম্প আর পোস্টকার্ড গুনছে। ওয়ার্ডস্ আর ফিগারস্-এর মাঝে পোস্ট মাস্টার ডুবে রয়েছে।

বউটি কাঁহাতক তাকিয়ে থাকতে পারে শাপলা আর শালুকের দিকে ? বেতঝাপ আর কচুবনেব দিকে ? কাঁঠাল গাছটার দিকে ? যেখানে প্রকাণ্ড সাপটা গাছের ডাল পের্চিয়ে রয়েছে । যার নীচে গরুর মাথার ওপর দাঁড়িয়ে শালিকটা ঘন ঘন ওর কান ঠুকরে দিচ্ছে । যেখানে আদি ছেলেগুলো গিরগিটি জাতীয় প্রাণীটার পেছনে দৌড়ুচ্ছে । গিরগিটিকে কিছুতেই ওরা ধরতে পারছে না । ওটা দৌড়ুচ্ছে এগাছ থেকে ওগাছে । ঝোপঝাড় আর লতাগুল্লের মাঝে দিয়ে । আদি ছেলেগুলো কিন্তু ওকে ধরবেই ।

ধরে ওকে আগুনে ঝলসিয়ে খাবে । বাত আর কোমরের দরদর জগ্গে ওর মাংস নাকি অব্যর্থ । বিঘব্যথা সারবেই । এই মুহূর্তে গিরগিটিটা একটা প্রকাণ্ড গাছের ডালে গিয়ে উঠেছে । একেবারে ছেলের নাগালের বাইরে । ছেলেরা ছাড়বে না । গাছের গায়ের গর্তটাতে ওরা খরকুটো দিয়ে আগুন দিয়েছে । কুণ্ডলী পাকিয়ে ধোঁয়া ! কি ধোঁয়া ! কি ধোঁয়া ! নিশ্বাস বন্ধ হয়ে আসে । একটু পরেই আগুনের লকলকে জিহ্বা এদিক ওদিক থেকে উঁকি দেয় । গাছটা জ্বলেপুড়ে থাক্ হয়ে যাবে যাক্ । ক্ষতি নেই । অরণ্যে গাছ-লতার অভাব নেই । গাছ তেতে উঠলে গিরগিটিটা গাছ থেকে নেমে পড়বে । কয়েকটা ছেলে বেতের খাপ থেকে ঝকঝকে দা বের করে পাথরের গায়ে শান দিচ্ছে । গিরগিটিটাকে আগুনে ঝলসিয়ে ওরা টুকরো টুকরো করবে । ওর মাংস খেলে বুদ্ধ, যুবক, তরুণের শরীরের যে কোনো স্থানের ব্যথা সারবে । গাছের গর্ত থেকে আগুনের লকলকে জিহ্বা উঁকি দিচ্ছে । গাছের ডালে গিরগিটিটা চঞ্চল হয়ে উঠেছে । আনন্দে হাততালি দিচ্ছে আদি ছেলেগুলো । পোস্ট মাস্টারের ঘরে বসে আমি ঘি-এ ভাজা মুড়ি খাচ্ছি আর চা-এর কাপে চুমুক দিচ্ছি । পোস্ট মাস্টার মাথায় তেল চাপড়াচ্ছে ।

ওর খালি গা । পরনে একটা লুঙ্গি । পোস্ট মাস্টার মশাই-এর কি সরু দেহটা । বুক, পেট এই এতোটুকুন । হাত-পাগুলো পাঁকাটির

মতো। মানুষটা ক্ষীণকায় আর বড়ো দুর্বল। কিন্তু বউ-এর স্বাস্থ্য অসম্ভব ভালো। দেহ থেকে স্বাস্থ্য যেন উপস্থিত পড়ছে। ছরস্তু যৌবন যেন বাগ মানতে চায় না। পোস্ট মাস্টার কি শীলমোহর, স্ট্যাম্প, বেয়ারিং চিঠি আর রেজিস্টারড্ লেটারের স্তুপের নীচে রেখে এ ছরস্তু যৌবনকে দমবন্ধ করে মারতে পারবে? মাস্টার মশাই-এর বয়সটা যেন মেয়েটির তুলনায় অনেক বেশী। পঁয়ত্রিশ তো বটেই, ওপরেও হতে পারে। আর বউটির উনিশ কি বিশ।

—“আপনি গল্প করুন। আমি ততোক্ষণ শীর্ণকরণের জলে চানটা সেরে আসি। সিয়াং-এ নাইতে গেলে ভালো হতো। তবে সিয়াং এখান থেকে অনেকটা দূর। আর ওখানে জলে যেরকম কারেন্ট, বড়ো ভয় করে।” মাথায় তেল চাপড়াতে চাপড়াতে মাস্টার মশাই চলে যায়। কাঁধে তার গামছা, পরনে লুঙ্গি।

—“শ্রামবাজারে আমার বাবার বাড়ি। পদ্মপুকুরে আমার বোনের বিয়ে হয়েছে। মামা থাকে কালীঘাটে।”

—“শ্রামবাজারের কোনখানে আপনার বাড়ি?”

—“ঐ যে পাঁচরাস্তা এসে যেখানে মিলেছে ঠিক সেই মোড়ের মাথায়। পুলিশটা যেখানে হাত-পা নেড়ে মোটর আর বাস থামায়। আবার যেতে দেয়। সেখান থেকে মাত্র কয়েক হাত দূরে আমাদের বাড়ি। জানালা থেকে হরদমই দেখতাম সে দৃশ্য। লোকের কি ভিড়। কি ভালোই না লাগতো।” বউটি নেফার এ অরণ্যে বসে স্বপ্ন দেখছে শ্রামবাজারের রাস্তার। কলকাতার জন-অরণ্যের।

—“আমার পিসির বাড়ি তাহলে আপনাদের বাড়ির খুব কাছে? খুব যেতাম পিসির বাড়ি।” বলি আমি। আত্মীয়তা নিবিড় করতে চাই। নিবিড় করতে চাই ওদের সঙ্গে পরিচয়ের সূত্রটা।

—“আশ্চর্য! কোন দিন দেখিনি তো আপনাকে।”

—“অতো ভিড়ের ভেতর লোক চিনে রাখা মুশকিল। দেখলেও মনে রাখার কোনো কারণ নেই।” বলি আমি।

—পাঁচরাস্তার মোড়ের সেই পুলিশটাকে আপনার মনে আছে ? ইয়া বিরাট দৈত্যের মতো চেহারা । ইয়া গৌফ । ইয়া দাড়ি । কি চওড়া বুকটা । কোথাও কাউকে গ্রেপ্তার করলে ঠিক ইঁদুরের ছানার মতো ঝুলিয়ে নিয়ে যেতো ।”

পুলিসটার চেহারাটা ঠিক মনে করতে পারিনে । গৌফ সহ ঐ রকম পুলিশ কলকাতায় অনেক রয়েছে । এতো লোক থাকতে পুলিশটাকেই বা মনে রাখতে যাবো কেন ?

শীর্ণকরণের জলে মাস্টার মশাই স্নান করতে গেছে । মাস্টার মশাই বড্ডো শীর্ণ । সিয়াংকে মাস্টার মশাই-এর বড্ডো ভয় ।

—“কিন্তু জানেন, ঐ বিরাট পুলিশটাকে দেখেছি ওর বউ-এর সঙ্গে যেতে । যখন ডিউটি থাকতো না তখন ছোট ছেলেমেয়ের হাত ধরে বউকে সঙ্গে নিয়ে চলেছে । ছোট অতোটুকুন স্ত্রীর কাছে অতো বড়ো লোকটাকে এমন বেখাপ্পা দেখাতো । এমন হাসি পেতো আমার । অতো বড়ো লোকটা, যার ডিউটির সময় অতো প্রতাপ – সেই লোকটা অতোটুকুন বউ-এর কাছে ঠিক কেঁচো বনে যেতো । সুবোধ আর শাস্তশিষ্ট ছেলের মতো সঙ্গে সঙ্গে চলতো । এমন হাসি পেতো আমার ।”

বউটি হেসে গড়িয়ে পড়ে । আমার মোটেই হাসি পায় না । এতে হাসবার কি আছে আমি ভেবে পাইনে । পুলিশ-কাহিনী ছাড়া বউটি কি অগ্র কাহিনী জানে না ? না শ্যামবাজারের রাস্তায় সে আর কিছু দেখেনি ? নেফার অরণ্যে এসে বউটি পুলিশ দম্পতিকে ভুলতে পারেনি ।

মাস্টার মশাই আমি যতোদূর জানি বউকে নিয়ে বিশেষ কোথাও বেঁেরোন না ।

—“শ্যামবাজারের নিধুবাবুর দোকানের ফুলকপির সিজাড়া খেয়েছেন ?” বউটি প্রশ্ন করে ।

—“না খাইনি । পিসীমা ঘরের খাবার দিয়েছেন । নিধুবাবুর দোকানের সিজাড়া দেননি ।”

—“খেলে বুঝতেন। এখনো মুখে লেগে আছে।” বউটি বলে।

নিধুবাবুর সিঁজাড়ার প্রশংসা নেফার পাশিঘাট পর্যন্ত পৌঁছে গেছে। সঙ্গীবিহীন বউটির হৃদয় জুড়ে বিরাজ করছে। ধন্য শ্যামবাজারের গৌফওয়ালা পুলিশ! ধন্য নিধুবাবু আর তার সিঁজাড়া!

বউটি এক অপরাহ্নে স্বামীর পেছনে পেছনে এসে হাওড়ায় নর্থ বিহার এক্সপ্রেসে থার্ড ক্লাসে চড়ে বসেছে। জানে না কোথায় নেফা, কোথায় সিয়াং ডিভিসান। কোথায় আলং আর পাশিঘাট। নেফা সম্বন্ধে তার কোনো ধারণাই ছিলো না। কেউ বলেছে নাগাদের অঞ্চলে যাচ্ছিস। কেউ বলেছে গারো আর লুসাইদের কাছে। বউটি হয়তো ক্লাস সেভেন-এইট পর্যন্ত পড়েছে। ভূগোলের জ্ঞান তার অতি সামান্য। বারুণীতে ট্রেন বদলাতে হবে। কয়েক ঘণ্টা আসাম মেইলের জন্তে অপেক্ষা করতে হয়। সে প্ল্যাটফর্মেরে স্বামীর গা ঘেঁষে বসে রয়েছে। ভয়াব্র দৃষ্টি মেলে এদিক ওদিক তাকিয়ে দেখছে। কোথায় এক অজানা নাম-না-জানা দেশে সে চলেছে। কাউকে সে চেনে না। সব নূতন মুখ। এর আগে কোনদিন কলকাতার বাইরে সে আসেনি। শিলিগুড়ি, আলিপুরদুয়ার, গৌহাটি, ডিফু, লামডিং, ডিব্রুগড়, আরো কতো নাম-না-জানা স্টেশন। কতো জায়গা। কতো অপরিচিত মুখ। কতোরকম অপরিচিত ভাষায় তারা কথা বলে। দু-একজনের কথা ছাড়া বেশীর ভাগ লোকের কথাবার্তা ভালো করে সে বুঝতে পারে না। মা গো, এ দেশটাতে এতো লোক আছে? এর আগে তার জ্ঞান ছিলো না। সে শুধু স্বামীর গা ঘেঁষে বসে থাকে। বসে থাকে জড়োসড়ো ভাবে। ফ্যালফ্যাল করে চারিদিকে তাকিয়ে দেখে। কতো আর জিজ্ঞাসা করবে? ভরসা শুধু দুর্বল, ক্ষীণ ওই একরকম মানুষটা। যার বুকের হাড়গুলো গোনা যায়। যে বিড়ি ফুঁকতে ফুঁকতে ঘন ঘন কাশে। ডিব্রুগড় থেকে মোহনবাড়ি। মোহনবাড়িতে যখন সে একটা ভাঙ্গা প্লেনে চড়লো তখন তার কান্না পেয়ে গেছে। মানুষের আর কতো সহ্য হয়? তারপর প্লেনটা

যখন হুস করে একসময়ে আকাশে উঠে গেছে তখন বউটি তার স্বামীকে জড়িয়ে ধরেছে। ভয়ে তার গলা শুকিয়ে গেছে। নীচে ভীষণ সব পাহাড় আর পর্বত। আর কি অরণ্য! বউটির গা-টা কেমন গুলোয়। স্বামীকে জড়িয়ে ধরে চোখ বন্ধ করে সে। ভরসা ওই ক্ষীণকায় মানুষটা।

পঁচিশ মিনিট তাকে এভাবে থাকতে হবে। তারপর প্লেনটা তাদের পাশিঘাটে নামিয়ে দেবে। বউটির সাহসের সীমা পেরিয়ে গেছে। দ্বৈধের শেষপ্রান্তে সে এসেছে। ক্ষীণকণ্ঠে সে স্বামীকে বলেছে—“আমাকে বাবার বাড়িতে ফিরিয়ে নিয়ে চলো। আমার বড্ডো ভয় করছে।”

পোস্ট মাস্টার শীর্ণ, শিরাবহুল আঙুলগুলো বউ-এর সারা গায়ে বুলোতে বুলোতে বলেছে—“ভয় কি, আমি রয়েছি।”

“সব যুগের সব পুরুষের দল তাদের স্ত্রীদের কাছে এ কথা বলেছে। তাদের মতো বীর সাহসী দুনিয়ায় আর কে আছে।”

জানিনে বউটি কতোটা নিশ্চিন্ত হয়েছে। প্লেন উড়ে চলে পাশিঘাটের দিকে ঘন মেঘের আবরণ ভেদ করে। পাশিঘাটে পৌঁছে এবং তারপর নেফাতে ছ’বছর কাটিয়ে বউটি পোক্ত হয়েছে। মনে তার অনেক সাহস হয়েছে। তবুও অনেক কিছু সে বুঝতে পারে না। নেফার কোথায় বা কামেঙ, কোথায় বা টিরাপ। চীন আর তিব্বত দেশগুলোই বা কোথায় তা সে ভালো করে বুঝে উঠতে পারে না। কতো বর্ষণমুখর রাত্তিরে স্বামীর শীর্ণ অপ্রশস্ত বুকে মাথা গুঁজে সে পড়ে থাকে। একটার পর একটা প্রশ্ন করে চলে। বাইরে ঘ্যাঙর ঘ্যাঙর করে ব্যাঙ ডেকে চলে। কটর কটর। চিরিক্, চিরিক্। কতো রকমের ডাক আর শব্দ।

ভয়ে বউটির মুখে কথা সরে না। যাক সে-সব। এই মুহূর্তে নিস্তক্ ছপূরে স্থল থেকে ঘরে ফিরছিলাম। বউটি বাঁশের বাড়ির বারান্দায় দাঁড়িয়ে আছে। হাত তুলে আমাকে ডাকে। ওদের বাড়িতে

যাবার জন্তে আমাকে বউটি আহ্বান করে। একে ভরহুপুর, তাতে ভরা যৌবন। সাড়াশব্দহীন পথঘাট। পোস্ট মাস্টার মশাই ব্যস্ত চিঠিপত্র নিয়ে। এটা কি গল্প করার সময়? মাস্টার মশাই ফিরে এলে সন্ধ্যার সময় বরং গল্প করা যাবে। চেষ্টা করে বলি—“এখন একটু ব্যস্ত আছি। অল্প সময় আসা যাবে।” আমার বোধ হয় সাহস একটু কম। বউটির এ সময়ে সঙ্গী আমি নাই বা হলাম। নেফাকে আমার বডেডা ভয়।

\*

\*

\*

হুপুরবেলা স্কুল থেকে ফিরছিলাম। বউটি বাঁশের ঘরের জানালায় দাঁড়িয়েছিলো। ওর মুখে স্নান হাসি। হাত তুলে আমাকে ডাকলে। একবার নয়, বারকয়েক। সে আহ্বান উপেক্ষা করবার শক্তি আমার ছিলো না। পায়ে পায়ে এগিয়ে গেলাম। গেলাম অনেক সাহস সঞ্চয় করে। আমার পুরুষত্বকে অবমাননা করতে আমি রাজী নই। বউটি আমাকে অনেক আদরযত্ন করলে। খেতে দিয়েছিলো মুড়ি, নারকেলের নাড়ু। ঘরের তৈরী সন্দেশ। হাত ধোবার জন্তে সাবান দিয়েছিলো। হাতে জল ঢালার সময় হাতে হাতে ছোঁয়াছুঁয়ি হয়েছিলো। আমার সারা দেহ কেঁপে উঠেছিলো। নেফার শ্বাপদসঙ্কুল অরণ্যকে আমার বডেডা ভয়। তার চেয়ে বেশী ভয় পাই আমি ছরস্তু চঞ্চলভরা যৌবনকে। আর যদি হয় সে যৌবন নিঃসঙ্গ আর একাকী। সে যৌবনের প্লাবন কূলকিনারা ছাপিয়ে সব কিছু ভাসিয়ে নিয়ে যায়। আশঙ্কায় আমার বুক কাঁপছে। শরীর ঘন ঘন রোমাঞ্চিত হচ্ছে। বউটি উঠে একসময়ে ভেতরের দিকের ঘরে চলে যায়। আমি আশঙ্কার দোলায় ছলতে থাকি। কতোক্ষণ পরে ও ফিরে আসে। হাতে একটি কাপড়ের পুঁটলি। বউটি পুঁটলিটা আমার সামনে খুলে ফেলে। আমি কেমন হকচকিয়ে যাই। ভেতরে একরাশ গয়না। বুম্‌কো, নাকছাবি, নোলক, মটরমালা, সিঁথি, মল, ঘুঙুর, চুড়ি, বালা, কঙ্কণ। সর্বনাশ! সব নিয়ে পোস্ট মাস্টারকে সর্বস্বাস্তু করে ও আমার সঙ্গে



পালাবে নাকি ? মনে মনে ভাবি এর পরই বোধ হয় বউটি সেই বিশ্বে প্রস্তাব আনবে। সর্বনেশে প্রস্তাব। ওকে সঙ্গে নিয়ে কোথায় যাবো আমি ? এর জন্তেই ও সারা দুপুর জানালার কাছে আমার অপেক্ষায় ছিলো। ও শুধু ঘোঁষনে বিশ্বাসী নয়। হয়তো অলঙ্কার আর অর্থের ওপর বউটির অগাধ বিশ্বাস। ও বললে যে ওর এক দূর সম্পর্কের বৃড়ী পিসিমা মৃত্যুর আগে ওর সেবাযত্নে খুশী হয়ে চুপি চুপি এগুলো ওর হাতে তুলে দিয়েছিলো। কেউ জানে না এ খবর। পোস্ট মাস্টারও খবর পায়নি।

—“তা এগুলো এসময়ে বের করার উদ্দেশ্য ?”

আমার রূঢ় কণ্ঠস্বরে আমি নিজেই কেমন চমকিয়ে উঠি। উত্তর না পেয়ে ওর দিকে তাকাই। বউটি কাঁদছে। ওর অশ্রুজলে কেমন দুর্বল বোধ করি, এসময় ও কাঁদছে কেন ? এসময় কি কেউ কাঁদে ? খতমত খেয়ে যাই। যা বলবার বলে ফেলুক না। পালাবার আগে কাঁদা। এ নিশ্চয় কুণ্ডীরাক্ষ। অস্বস্তি বাড়িয়ে লাভ আছে কিছু ? ও কথা বলে না। ক্রমাগত প্রশ্নের পর বউটি যা উত্তর দেয় তার সারাংশ হচ্ছে যে ওর স্বামী নেশা করে। মদ, গাঁজা, আফিং কিছুই তার বাদ যায় না। সম্প্রতি সরকারী তহবিল তহরুপ করেছে। ধরাও পড়ে গেছে। চাকরি যাবে আর সঙ্গে সঙ্গে জেল। ওকে বাঁচাতে হবে। এখনো সময় আছে। টাকাটা দিয়ে দিতে পারলে এ যাত্রা পোস্ট মাস্টার বেঁচে যায়। গয়নাগুলো নিয়ে আমাকে কলকাতা কিংবা গোঁহাটি যেতে হবে। তারপর টাকা এনে পোস্ট মাস্টারকে জেল থেকে আর অপমানের হাত থেকে বাঁচাতে হবে। এসব আমাকেই করতে হবে। আর বউটির তাই ইচ্ছে।

গয়নার পুঁটলি বউটি আমার হাতে তুলে দেয়। পোস্ট মাস্টারের জেল হলে বউটি নাকি বাঁচবে না। সঙ্গে সঙ্গে আবার পিঠের ওপরকার শাড়ি তুলে নগ্ন পিঠটা আমাকে দেখায়। বেত্রাঘাতে কালসিটে পড়েছে। গত রাত্তিরে পোস্ট মাস্টারের অত্যাচারের ওয়াই সাক্ষী।

পোস্ট মাস্টারের শীর্ণ চেহারাটা আমার চোখের সামনে ভেসে ওঠে। হাতের তেলো মাথার ওপর চাপড়াতে চাপড়াতে শীর্ণকরণের দিকে স্নানের উদ্দেশ্যে চলেছে। পোস্ট মাস্টারের খালি গা। পরণে একটি বিবর্ণ লুঙ্গি। গয়নাগুলো একপাশে সরিয়ে রেখে উঠে পড়ি। মেয়েটির অমুরোধ উপেক্ষা করবার শক্তি আমার নেই। টাকা আমাকে যোগাড় করতেই হবে। পোস্ট মাস্টারকে বাঁচাতে হবে। তবে গয়নার বদলে টাকা নয়। টাকা আমাকে অথবা কোনো উপায়ে যোগাড় করতে হবে। মেয়েটির কাছ থেকে বিদায় নিই। শপথ নিই টাকা নিয়ে ফিরবো। যাবার সময় পিছন ফিরে একবার ওকে দেখি। বড্ডো সুন্দর দেখাচ্ছে ওকে। বোঁটি মিটিমিটি হাসছে। আমি এতো দুর্বল বোধ করছি কেন? আজ ছপুর্নে স্কুল থেকে ছুটি না নিলেও চলতো।

\* \* \* \*

## ॥ সাত ॥

পাশিঘাট হাসপাতালের গা ঘেঁষে রাস্তাটা চলে গেছে মিরমি গ্রামের দিকে। রাস্তাটা ভীষণ নির্জন, আর ভীষণ অন্ধকার। এর ওপর ঘন কুয়াশায় চারিদিক ঢেকে গেছে। দু'দিকে গভীর জঙ্গল, লুড়ি আর পাথর-ছড়ানো পথ। প্রতি পদে হোঁচট খেতে হয়। টর্চের আলো ফেলতে ফেলতে সন্তুর্পণে এগুচ্ছিলাম। হঠাৎ অন্ধকারের ভিতর একটা বিশাল লোকের সঙ্গে সংঘর্ষ হতে হতে বেঁচে গেলাম। হাতে তার না আছে একটা টর্চ, না আছে একটা লাঠি।

মিস্টার ভর্মার আয়তন নেহাৎ নগণ্য নয়। ভয়ডর বলে তার কিছু নেই। পাশের জঙ্গলে সাপ রয়েছে। জেঁক রয়েছে। চিতে আর ভালুকের অভাব নেই। সিয়াং-এ বহুবার ঢল নেমেছে। বহুবরাহের জন্মে পথ চলা দুষ্কর।—“এই যে মিস্টার ভর্মা, ভালো আছেন?” প্রশ্ন করি।

—“ভালো আছি। আপনি ভালো?” হিন্দীতে প্রশ্ন করে ভর্মা।

ভর্মা পাশিঘাটে বেশ কিছুদিন যাবৎ রয়েছে।

—“আমাদের ক্র্যাফট সেন্টারে একদিনও এলেন না?” অমুযোগের সুরে বলে ভর্মা।

—“যে কোনোদিন এসে যাবো।”

ভর্মার সাথে পাল্লা দিয়ে পা চালাই। সেই সঙ্গে কথাবার্তা চলে। ভর্মা ক্র্যাফট সেন্টারের কর্তা। ইন-চার্জ।

—“স্থানীয় অধিবাসীদের সমস্ত চাহিদা এই ক্র্যাফট সেন্টার মিটোচ্ছে। এখানে কাঠ আর বেতের আসবাব তৈরী হয়।” বলে ভর্মা।

—“আমি পাশিঘাটে এসে প্রব শুনেছি। আপনার চেষ্টা খুবই প্রশংসনীয়।”

—“আমার একটা হবি রয়েছে। নেফার ট্রাইবস্দের সম্বন্ধে রিসার্চ করছি। ওদের সমাজ নিয়ে পড়াশুনা করতে হচ্ছে। ক্র্যাফট সেন্টার আর এই পড়াশুনা নিয়ে সময় বেশ কেটে যাচ্ছে।” ভর্মার সঙ্গে পা চালিয়ে পাল্লা দেওয়া সহজসাধ্য ব্যাপার নয়।

—“এ অন্ধকার আর জংলা পথে একটা টর্চ নিয়ে চলাফেরা করলে ভালো হতো মিস্টার ভর্মা। নানারকম জন্তু-জানোয়ার রয়েছে।”

—“অভ্যেস হয়ে গেছে। তাছাড়া আমার অভিজ্ঞতা থেকে দেখেছি যে জন্তু-জানোয়ারের দল আপনার ক্ষতি ততোক্ষণ করবে না যতোক্ষণ না আপনি ওদের কিছু ক্ষতি করছেন। এ বিষয়ে ওরা মানুষ থেকে ওদের শ্রেষ্ঠত্ব প্রমাণিত করেছে। কাজকর্মে ব্যস্ত রয়েছেন না হলে গল্পগুজবে খানিকটা সময় কাটিয়ে দিতাম।”

—“আজকে রাতে ছেলে পড়ানোর ঝামেলা নেই।” আমি জবাব দিই।

—“তাহলে চলুন না আমার বাংলোতে। কতোটা আর পথ? মাইল খানেক হবে হয়তো।” ভর্মা আমার হাতে একটা মৃদু চাপ দেয়।—“চলুন ভালো কফি দেবো।” বলে ভর্মা। রাজী হতে হয়।

—“জন্তু-জানোয়ার মানুষের কিরকম উপকার করে তার একটা নমুনা দিচ্ছি। ঘটনাটা এই পাশের মিরমি গ্রামেই ঘটেছিলো। বাঁশের ঘরের বারান্দায় সন্তানকে শুইয়ে রেখে মা জঙ্গলে ঢুকেছিলো কাঠ কাটতে। টাপু পূজোতে গ্রামের সবাই মেতেছে। ট্রাইবস্দের ধারণা এ পূজো করলে লোকসংখ্যা বৃদ্ধি পায়। এক-একটা ট্রাইবের লোকসংখ্যা খুবই কম। যাক। মা কাঠ নিয়ে ফিরে এসে দেখে একটা প্রকাণ্ড কালকেউটে সন্তানের মাথার ওপর ফণা মেলে ছলছে।”

—“তারপর?”

—“মার চক্ষুস্থির। সন্তান হাত-পা নেড়ে খেলা করছে আর তার মাথার ওপর ছলছে সাক্ষাৎ যম। মার চীৎকার করবার শক্তি পর্যন্ত লোপ পেয়েছে। তাছাড়া চীৎকার করলেই বা কে শোনে। আশেপাশে কেউ নেই। সব টাপু পূজোয় গেছে।”

—“সাংঘাতিক সিচুয়েসন!” বলি আমি।

—“সিচুয়েসন আরো জটিল আরো ভয়ঙ্কর হয় যখন পায়ে পায়ে একটা নেকড়ে এগিয়ে এসে দাওয়ায় উঠে পড়ে। শিশুটিকে মুখে তুলে নিঃশব্দে পাশের জঙ্গলে অদৃশ্য হবে বলে সে প্রস্তুত হচ্ছে।”

—“মার অবস্থাটা বেশ ভালো করেই বুঝতে পাচ্ছি।” বলি আমি।

—“নেকড়ে বাঘটা বোধ করি লাফাতে যাচ্ছিলো। কিন্তু তার আগেই কালকেউটে ছোবল মারার জগ্গে তার দিকে এগিয়ে গেছে। বিরাট সাপ। এরপর শুরু হয় সাপ আর বাঘে যুদ্ধ। মিনিট পনেরো চলেছিলো সে যুদ্ধ। মা ইতিমধ্যে চীৎকার শুরু করে দিয়েছে। আর তার চীৎকারে গ্রামবাসীরা সব ছুটে এসেছে। কিন্তু প্রাণী দুটো ততোক্ষণে যন্ত্রণায় হটফট করছে। সাপের বিষে নেকড়ে ধুঁকছে। তার মুখ দিয়ে ফেনা গড়াচ্ছে। আর নেকড়ে তার দাঁত ও হাতপায়ের নখ দিয়ে কালকেউটেকে ভীষণ ভাবে জখম করেছে। গ্রামবাসীদের কিছু করতে হয়নি। মৃত্যু এসে দুজনকে শাস্তি দিয়েছে। বলুন দেখি এর পর জন্তু-জানোয়ারের ওপর শ্রদ্ধা জাগে কিনা?”

কিছু একটা উত্তর দিতে যাচ্ছিলাম। কিন্তু এরি মধ্যে “উফ্” বলে একটা শব্দ। পায়ের গোড়ালি চেপে ধরে ততোক্ষণে মিস্টার ভর্মা অন্ধকারে পথের ওপর বসে পড়েছে।

টর্চের আলো ফেলে দেখি ভর্মা যন্ত্রণায় কাতরাচ্ছে। গোড়ালি থেকে রক্তের ধারা নেমেছে। একটা দাঁতালো বন্যবরাহ মাথা নীচু করে ওধারের জঙ্গলে অদৃশ্য হয়ে গেলো। যাবার আগে ভর্মার গোড়ালি দস্তবিদ্ধ করে গেছে। জানিনে ভর্মা বরাহের কোনো ক্ষতি করেছিলো কিনা।

ভর্মাকে নিয়ে মুশকিলে পড়তে হতো। কিন্তু ভাগ্য ভালো। সার্কেল অফিসার জীপে ঐ পথ ধরেই যাচ্ছিলো। সার্কেল অফিসারের জীপে উঠিয়ে ভর্মাকে পাশিঘাটের হাসপাতালে নিয়ে যেতে হয়। সেখানে ওষুধপত্রের দেবার পর ক্ষতের ওপর ব্যাণ্ডেজ বাঁধা হয়।

ভর্মার বাংলাতে বসে সে রাত্রিতে নেফা সম্বন্ধে অনেক কাহিনী শুনেছি। ভর্মা ব্যাণ্ডেজবাঁধা পাখানা বিছানার একধারে আলগোছে রেখে আধশোয়া অবস্থায় নেফা-কাহিনী শুনিয়েছে।

ভর্মা বলে—“সারাটা নেফা এ দশ বছর চম্বে বেড়িয়েছি। ১৯৫৪ সালে ফ্রন্টিয়ার ডিভিসান পাঁচটা ডিভিসানে পরিণত হলো। নাম হলো কামেঙ, সুবনসিরি, সিয়াং, লোহিত আর টিরাপ। টুয়েন্ট সাঙ্কে ছিলো। চলে গেলো নাগা হিলসের সঙ্কে। পশ্চিমদিক থেকে প্রথমে হলো কামেঙ ডিভিসান। হেড কোয়ার্টার্স বম্‌ডিলা। সুবনসিরির জিরো। সিয়াং-এর আলং। লোহিতের তেজু। আর টিরাপের চ্যাংলাং।”

ভর্মা বলে যাচ্ছিলো। আমি ওর কথা শুনছিলাম আর একটা অয়েল পেন্টিং-এর দিকে একদৃষ্টিতে তাকিয়েছিলাম।—“কি দেখছেন মশাই? জানি ভালো লাগবে। আমার স্ত্রীর হাতের। আঁকতে জানে। অর্ধেকটা হয়ে যাবার পর ফেলে রেখেছিলো। আমি জোর-জবরদস্তি করতে সমস্ত কাজটা শেষ করলে। একটা মিসমী মেয়ের

তুলি আর রঙের অপূর্ব যোগাযোগ।” ভর্মা ছবির সৌন্দর্যের ভেতর ডুবে থাকে।

—“আপনার স্ত্রী কোথায়? আমি পাশিঘাটে এসেছি তিন মাস হলো কিন্তু কোনোদিন আপনার স্ত্রীকে দেখিনি।”

—“দিল্লীতে ওর মার কাছে রয়েছে। মার বয়স হয়েছে। মেয়েকে মা খুব ভালোবাসে। এমন সম্ভানস্নেহ আমি সচরাচর দেখিনি। আমার স্ত্রী এখানে চলে আসার জন্তে পা বাড়িয়ে রয়েছে। সপ্তাহে দুখানা চিঠি লিখে ওকে এখানে নিয়ে আসার জন্তে তাগাদা দিচ্ছে। কিন্তু আমি বাধা দিচ্ছি। শাশুড়ীর দিকটা দেখতে হবে তো। কয়েকটা দিন মেয়েকে নিজের কাছে রাখতে চায় তাতে দোষটা কিসের।”

ভর্মা মদের বোতল বের করেছে। গ্লাসে মদ ঢেলে আমাকে দিয়েছিলো। আমি ও রসে বঞ্চিত শুনে নিজে একটু একটু করে গলায় ঢালছে। চাকর আমাকে কফি আর বিস্কুট দিয়ে গেছে। ভর্মা সেদিন অনেক কিছু আলোচনা করেছিলো। সব মনে নেই। যেটুকু মনে আছে তাই শোনাচ্ছি।

—“অস্ট্রো এসিয়াটিক গ্রুপের লোকেরা, মানে আসামের খাসী, জয়ন্তিয়া, বিহারের ছোটনাগপুরের গুঁরাও, মুণ্ডারা এবং নেফার কোনো কোনো পার্বত্য অধিবাসীরা নাকি একই দলভুক্ত লোক। আবার দেখুন এই গ্রুপের লোকদের সঙ্গে কম্বোডিয়ার লোকদের অনেক সাদৃশ্য রয়েছে।” ভর্মা সার্থক নৃতত্ত্ববিদ। জাতির ইতিহাস, উৎপত্তি, মিশ্রণ, বিলোপ প্রভৃতি ঘেঁটে বেড়ানোই তার কাজ।

—“আপনাকে নিশ্চয়ই অনেক পড়াশুনো করতে হয়? অনেক পরিশ্রম করতে হয়?” আমি জিজ্ঞেস করি।

—“তা না করে উপায় আছে? নেফাকে লোকেরা চিনেছে তো মাত্র সেদিন। ভারত স্বাধীনতা পাবার পূর্বে নেফা ছিলো সম্পূর্ণ আননোন্। তাকে সম্পূর্ণভাবে জানতে গেলে প্রচুর পড়াশুনো এবং পরিশ্রম করতে হবে বৈকি। কতো বিভিন্ন ধরনের জাত রয়েছে

নেকাতে আর কতো বিভিন্ন ধরনের জীবনধারা তাদের। এখানে রয়েছে মন্থাস, সেরহুপেনস, পাঙ্গিনস, আদিস, মিজুস, আকাস, ডাক্সলাস, আপাটানিস, পদমস, মিনিয়ঙস, গালঙস, বরিস, টাগিনস, সিঙফুস, কাচিনস, ট্যাংসাস, ওয়াচুস, নঙটেস, খামটিস, মেজুস। আর কতো সব ট্রাইবস রয়েছে।”

—“সবসুদ্ধ কতো ট্রাইবস হবে?” প্রশ্ন করি।

—“আড়াইশো তো বটেই। আমার ইচ্ছে প্রত্যেকটি ট্রাইব নিয়ে আলাদা ভাবে রিসার্চ করি। কলকাতা ইউনিভার্সিটিতে থীসিস সাবমিট করবার জন্যে প্রস্তুত হচ্ছি।”

—“এ আলোয়ান প্লেনসের তৈরী বলে মনে হচ্ছে, তাই না?”

—“এটা মিসমীদের তৈরী, আর এটা মিসমী কোট।” আঙুল ঘুরিয়ে ভর্মা সব দেখাতে থাকে।

—“ওই দেয়ালে যেটা ঝুলছে সেটা আদি কোট। আর ওই আলমারির গায়ে ঝোলানো রয়েছে খামটি আর ট্যাংসাদের লুঙ্গি।” দেখতে ঠিক বর্মী লুঙ্গির মতো। আর এদিকে দেখুন দেয়ালে নানারকম বেতের টুপী ঝোলানো রয়েছে। আদিদের তৈরী বেতের টুপী ছাড়া টিরাপের ট্রাইবসদের বানানো টুপীও এখানে রয়েছে। হানাহানি এবং মারপিটের পর মন্থ্যমস্তক দেহ থেকে বিচ্ছিন্ন করে বর্শার মাথায় বিদ্ধ করে নাচ-গান সহযোগে যে উৎসব পালন করা ইতো সে উৎসবে মাথায় দেওয়া টুপীও এর ভেতর রয়েছে।”

একটা টেবিলক্লেথের ডিজাইনে লোকাল কালার যথেষ্ট রয়েছে। সুন্দর হাতের কাজ। ভেবেছিলাম কোনো ট্রাইবের লোকের হাতের কাজ। ভর্মা জানায় ওটা তার স্ত্রীর হাতে তৈরী। ওরকম আরো অনেক রয়েছে। ভর্মা খোঁড়াতে খোঁড়াতে একটা আলমারির কাছে এগিয়ে যায়। আলমারি খুলে ভেতর থেকে বিভিন্ন ধরনের ডিজাইনের এবং অনেক রকম কালার কম্বিনেশানের প্রচুর সূতীবস্ত্র বের করে আনে। প্রত্যেকটি বস্ত্রখণ্ডে সূচ আর সূতোর সাহায্যে ট্রাইবসদের

জীবনযাত্রা ও সমাজজীবন থেকে খানিকটা খানিকটা তুলে ধরা হয়েছে।

—“চমৎকার! তুলনা হয় না!” মুখে বলি আর প্রশংসাভরা দৃষ্টি নিয়ে তাকিয়ে থাকি ওগুলোর দিকে।

—“আমার স্ত্রীর হাতের।” বলে ভর্মা।

—“স্ত্রীকে কবে এখানে নিয়ে আসছেন?”

—“যে কোনোদিন এসে যাবে। আমাকে ছেড়ে থাকা ওর পক্ষে বড়ো কষ্টকর হবে।”

ঠাট্টা করে বলি—“আপনার দেখাশুনো করাও যে দরকার।”

—“খুব ঠিক কথা। তবে মার সেবায়ত্ত আগে।”

—“মাকে সঙ্গে নিয়ে এলেই হয়। পাশিঘাটে আপনার কাছেই না আর মেয়ে থাকবে।”

—“খুব ভালো কথা। কিন্তু বুঝতেই পারছেন দিল্লীতে মা মানুষ হয়েছেন। তাঁর কি এ বয়সে পাশিঘাট ভালো লাগবে। মানে দীর্ঘকাল ধরে থাকতে উনি রাজী হবেন না। আমার স্ত্রীর কথা আলাদা। স্ত্রীর রয়েছি আমি। কিন্তু শাশুড়ী এ জঙ্গলে এসে কি করবে? আর আমার বদলির চাকরি। একদিন হয়তো নেফার আরো অভ্যন্তরে চলে যেতে হবে। ওঁর তখন কষ্ট হবে। সে কষ্টটুকু আমি দিতে চাইনে।”

—“আপনার বাগানে আর বারান্দায় ফুলের ছড়াছড়ি। কতোরকম ফুলের গাছ। আপনার শখ না আপনার স্ত্রীর?”

—“আমার শখ রয়েছে, কিন্তু যা দেখছেন তার জগ্নে আমার কোনো কৃতিত্ব নেই। সব কিছুর জগ্নে আমার স্ত্রী দায়ী। সবটা কৃতিত্ব ওর প্রাপ্য।” বলে ভর্মা।

ভর্মার ফুল এবং লতাপাতার কালেকশান নিঃসন্দেহে সবাইকার প্রশংসা কুড়াবে। ফ্লাওয়ার টী, ক্যাটালিয়া, সিনাবারিয়া, স্টোন ফ্লাওয়ার, প্যান্‌সি, গ্রাউণ্ড অর্কিড, লেডিস্‌ লেস্‌, বিগানিয়া, কস্মস্‌। এছাড়া গন্ধরাজ, বকুল, টগর, বেলফুল, যুঁই, চ্যামেলি, জবা, হাস্‌বুহানা, স্থলপদ্ম।



—“জানেন আমার স্ত্রী খুবই রূপসী।” মনে ছিলো মদের গুণে ভর্মা থানিকটা বেসামাল হয়ে পড়েছে।

—“পাশিঘাটে উনি এলে আপনার কথা যাচাই করে দেখবো।” বলি আমি।

ভর্মা হঠাৎ কেমন গম্ভীর হয়ে গেছে। ভদ্রলোক স্ত্রী বলতে অজ্ঞান। বউকে বোধ হয় খুব ভালোবাসে। মর্মে মনে ভাবি ওর দোষটা কোথায়। এ অরণ্যে একলা থাকা খুবই কষ্টকর ব্যাপার। বেচারার বউকে ঘন ঘন মনে পড়া স্বাভাবিক। তা বউ যখন রয়েছে এসেই যাবে একদিন। সমস্ত ছুঃখের একদিন অবসান হবে। বউ-এর প্রশংসা অনেকেই করে। ভর্মা তাঁদেরই একজন। হয়তো ওর মাত্রাজ্ঞান একটু কম। এর পর ভর্মা সিয়াং এবং পাশিঘাটের আশেপাশের বাসিন্দা আদিদের সহক্কে অনেক গল্প বলেছে। ওরা ছিলো ভীষণ উদ্ধত প্রকৃতি এবং স্বাধীনতাপ্রিয়। ব্রিটিশ শাসনকে একেবারে মানতে চাইতো না। বড্ডো জ্বালিয়েছে ব্রিটিশ কর্তাদের। আদিদের এর আগে “আবর” বলে ডাকা হতো। “আবর” নামটা ওদের ভীষণ অপছন্দ। “আবর” অর্থে যে শাসন মানে না। উদ্ধত এবং দুর্বিনীত। ওরা আপত্তি জানিয়ে কথাটা তুলে দিয়ে আদি কথাটা বেছে নিয়েছে। ভর্মার অভিজ্ঞতা কতো। ভর্মা আদিদের চলোঙ, পলুং উৎসবে যোগ দিয়েছে। আদিদের কেবাঙ-এ উপস্থিত থেকে ওদের বিচারপদ্ধতি দেখেছে। গ্রামের বৃদ্ধের দল ঘণ্টার পর ঘণ্টা আবৃত্তির ভেতর দিয়ে দোষীর গুণাগুণ বিচার করেছে। ভর্মা মন্থুপে গ্রামের অবিবাহিতদের সঙ্গে রাত কাটিয়ে গ্রাম পাহারা দিয়েছে। অতর্কিত আক্রমণের বিরুদ্ধে ওদের ওই রকম ব্যবস্থা। ওদের মদ যা আপঙ বলে সবাই জানে এবং যা ভাত থেকে তৈরী হয় তাতে কতো গ্রাম ক্যালরি রয়েছে তা পর্যন্ত ভর্মার মুখস্থ। সেদিন পর্যন্ত নেকাতে কিরকম দাসব্যবসা চলতো তারই বর্ণনা দেয় ভর্মা। গভর্নমেন্ট নানা-রকম ভাবে দাসব্যবসা উচ্ছেদ করতে চেষ্টা করেছে। নানা কারণে একজন দাস হতে পারে। যুদ্ধে বন্দী হয়ে কেউ দাস হয়। কাউকে মিথোন বা

ঘটিবাটির বদলে ক্রীনে নেওয়া হয়। কেউ ধার শোধ না করতে পেরে দাস হয়। কেউ দাসের ঘরে জন্ম নিয়ে সারাজীবন দাসত্বের জ্বালা ভোগ করে। আর কেউ কোনো মারাত্মক অপরাধ করে ফাইন দিতে না পেরে দাসত্বের শৃঙ্খল পায়ে জড়ায়। গরু, ভেড়া, মিথোন, এমন কি ঘটিবাটির বদলে দাস বিনিময় হয়। তন্ময় হয়ে ভর্মার কথা শুনছিলাম। তবে যুগ পালটাচ্ছে। নেফা উন্নতির পথে এগিয়ে চলেছে। এখানে অনেক কিছু আজ আর সম্ভব নয়। নেফার অরণ্য ধীরে ধীরে সভ্যতার আলোকে উদ্ভাসিত হয়ে উঠছে। অজানা, অচেনা বনভূমি, পাহাড় পর্বত প্রান্তর আস্তে আস্তে শাসনের আওতায় এসে যাচ্ছে। সরকার চেষ্টা করছে, তবে সময় নেবে। তবুও নেফার অভ্যন্তরে, দুর্গম গিরি গুহা জঙ্গলে, সীমান্ত অঞ্চলে হয়তো দাসব্যবসা এখনো চালু রয়েছে। কেউ হলফ করে কিছু বলতে পারে না। কথা বলতে বলতে ভর্মা বালিশের তলা থেকে একটা ছোট্ট চামড়ার তৈরী বাগ্ল বের করে। বোতাম টিপতেই বাগ্লের ডালা খুলে যায় আর সেটা ওপরে তুলতেই চোখ ঝলসিয়ে যায়। একটা আংটি, আংটির হীরেটা জ্বলজ্বল করছে।

—“কলকাতা থেকে ওর জন্তে আনিয়েছি। এ বছর বিবাহবার্ষিকী উপলক্ষে ওকে এটা প্রেজেন্ট করবো।” ভর্মার কণ্ঠস্বর কেমন ভেজা-ভেজা। যাক কথায় কথায় অনেক রাত হয়েছিলো। বিদায় নিয়ে সেদিনের মতো চলে আসি।

পরের দিন খবরটা ডি, সি-র অফিসে বসে শুনি। ডি, সি, আর একজন দুজন ছাড়া খবরটা বড়ো বেশী কেউ জানতো না। ভর্মার স্ত্রী মাসকয়েক হলো ভর্মাকে ডিভোর্স করেছে। ক্ষতিপূরণের ওপর কেউ জোর দেয়নি। ডিভোর্সের কারণ সম্বন্ধে ডি, সি কিছু বলেনি। কোর্ট মিসেস্ ভর্মার আবেদন মঞ্জুর করেছে। ভর্মা প্রতিদ্বন্দ্বিতা করেনি। নিজের পুরুষত্বের ওপরে সে বোধকরি আস্থা হারিয়েছিলো।

## ॥ আট ॥

পাশিঘাট হাসপাতালের বেডে শুয়ে আমার হাতটা ওমি ময়াং চেপে ধরে। সে বলে—“নেনী ময়াং তোমাকে দেখতে পেলে খুশী হতো।” কিছুক্ষণ চুপ করে থাকবার পর হঠাৎ সে বলে—“আমি নেনীর কাছে যাবো।” সে হঠাৎ উত্তেজিত হয়ে বিছানার ওপরে উঠে বসতে চায়। আমি বাধা দিই।

—“তুমি উঠতে চেষ্টা করো না।” বলি আমি।

—“কেন আমার কি হয়েছে?”

—“তুমি বিষ খেয়েছিলে।”

—“নেনী যে আমাকে বিষ খেতে বলেছিলো। অনেকদিন থেকেই সে আমাকে বিষ খেতে বলেছিলো। বলেছিলো তুই আগে বিষ খাবি। তারপর আমি খাবো। ছজনে বিষ খেয়ে মরবো। মৃত্যুর পর আর আমাদের বিচ্ছেদ হবে না। কাগোলী জামুর ঘর থেকে যেদিন নেনীকে নিয়ে এসেছিলাম সেদিনও নেনী ওই এক কথাই বলেছিলো।” একটু চুপ করে থেকে ওমি হঠাৎ বুকটা চেপে ধরে বলে—“উফ, কি যন্ত্রণা!”

নার্স এসে ওমিকে শুইয়ে দেয়। কিছুক্ষণ ছজনেই চুপচাপ। আমি ওমির মাথায় হাত বোলাতে থাকি। ওমি বলে—“জানো সেবারকার যন্ত্রণার তুলনায় এ যন্ত্রণা কিছুই নয়। গাঁয়ের লোকগুলো গুনে গুনে আমাকে চাবুক মেরেছিলো। সারা শরীরের মাংসপেশীগুলো চাবুকের ঘায়ে দড়ির মতো ফুলে উঠেছিলো। অসম্ভব যন্ত্রণা হচ্ছিলো। কিন্তু সব সহ্য করেছিলাম। সহ্য করেছিলাম নেনীর মুখের দিকে তাকিয়ে।” ওমি মুখের ভাব এমন করে যেন সে সেই মুহূর্তে সেই বেত্রাঘাতের কষ্ট অনুভব করছে।

—“ওরা তোমাকে চাবুক মারলে কেন?”

—“নেনীর জন্তে একটা পাথরের মালা চুরি করেছিলাম। মালাটা ছিলো কাগোলী জামুর মেয়ের। ওর মালাটা দেখামাত্র নেনী আবদার ধরলো মালাটা তার চাই। ছোটো সাহেব ডিক্রগড়ের চান্দাগান থেকে

এসেছিলো। তারাই মালাটা কাগোলী জামুর মেয়েকে দিয়েছিলো। কাগোলী জামু মেবোর পথে ওদের মালপত্রের ছেনছিলো।”

—“মালাটা দেখে বুঝি নেনীর খুব লোভ হলো?” প্রশ্ন করি আমি।

—“কাগোলী জামুর মেয়ে ওই মালাটা গলায় বুলিয়ে জঙ্গলে কাঠ কাটতে যায়। গর্বে মাটিতে তার পা পড়ে না। কি করে নেনী সে সব সহ্য করবে? তার মুখে ভাত ওঠে না। নেনী খাওয়াদাওয়া প্রায় ছেড়েই দিলে। তার সব চেয়ে প্রিয় ছিলো ভালুকের মাংস। ভালুকের মাংস আঙুল দিয়ে ছুঁয়েও সে দেখলো না। ওর অবস্থা দেখে মনটা আমার ভেঙ্গে গেলো। ভাবলুম মালাটা কাগোলী জামুর ঘর থেকে চুরি করে আনবো।” ওমি ময়াং পুরানো দিনগুলোর স্মৃতির ভেতর ডুবে রয়েছে।

—“চুরি করতে গিয়ে বুঝি ধরা পড়লে?”

—“হ্যাঁ, সব বলছি শোনো।”

আমাদের কথাবার্তা অসমীয়া ভাষার মাধ্যমে চলেছে।

—“তুকে পড়লাম কাগোলী জামুর ঘরে রাতের অন্ধকারে। এক ঘরে সব শুয়ে আছে। ছেলে আর তার বো। কাগোলী জামু আর তার স্ত্রী। মেয়ে আর তার জামাই। মালাটা খুঁজে বের করতে বেশ সময় লেগেছিলো। অন্ধকারের সুষোগ নিয়ে মালা নিয়ে যখন বেরিয়ে এসেছি, ঠিক তখনই কাগোলী জামুর ঘুম ভেঙ্গে যায় আর সঙ্গে সঙ্গে লাফিয়ে উঠে অন্ধকারের ভেতর সে আমাকে জড়িয়ে ধরে।”

—“তা হলে ওখানেই ধরা পড়লে?”

—“না, না। আমার শরীরে তখন একটুকরো স্মৃতিও ছিলো না। তাতে জংলী গাছের রস সারা শরীরে মেখে নেওয়াতে কাগোলী জামু আমাকে জড়িয়ে ধরলেও টুক করে পাঁকাল মাছের মতো হাত গলিয়ে বেরিয়ে এলাম। সঙ্গে সঙ্গে এক দৌড়ে নেনীর কাছে। তুমি বিশ্বাস করবে না মিগম্, মালা গলায় বুলিয়ে নেনীর কি আনন্দ! বললে তোকে

আমি কাঠবিড়ালীর কলিজা রেঁধে খাওয়াবো। গিরগিটির স্নপ্ করে খাওয়াবো। আমার মনটা যা ভালো লেগেছিলো। সেসব কথা তোমাকে বলে বোঝাতে পারবো না মিগম্।” আনন্দে ওমির ছোট চোখ দুটো নাচতে থাকে।

—“কাগোলী জামু পুলিশে খবর দিলে না?” প্রশ্ন করি।

—“পুলিস-টুলিস নয়। কাগোলী সোজা ধন্য দিলে দেওদারের কাছে।”

—“দেওদার কে?”

—“তাও জানো না তুমি! সে আমাদের পুরোহিত। পূজো করে। আত্মকে পৃথিবীর মাটিতে ডেকে আনে। রোগ সারায়, ভূত তাড়ায়। গ্রামে তার অনেক প্রতিপত্তি। সে মিথোনের মাংস খায়। আপড়্ গলায় ঢেলে মস্ত সুর করে পড়ে। তার অনেক কিছু করবার শক্তি রয়েছে।” ওমি থেমে যায়।

—“তারপর কি হলো?”

ওমি যা বলেছিলো তার সারাংশ এখানে তুলে ধরছি। মেবোর সে দিনটা ওমির এখনো স্পষ্ট মনে আছে। দেওদারের মুখটা গম্ভীর। মাটিতে পড়ে আছে কয়েকটা গলাকাটা মুরগী। রক্তের ধারার উপর রেখা টেনেছে দেওদার। সে বিড় বিড় করে মস্ত পড়ছে। মেবোর আশেপাশের গাঁয়ের সমস্ত লোক নির্ভর করছে দেওদারের গণনার ওপর। দেওদারের মুখখানা অসম্ভব গম্ভীর। থম্‌থম্‌ করছে চারদিকের আবহাওয়া। দেওদার চারদিকে অমঙ্গলের চিহ্ন দেখতে পাচ্ছে। ভিড়ের ভেতর নেনী রয়েছে। ওমি রয়েছে। নেনীর হাত ওমি ধরেছে। ওমির হাতের ভেতর নেনীর হাত ধরথর করে কাঁপছে। ওমি ভাবছে কেন সে হারটা চুরি করতে গেলো। দেওদারকে ফাঁকি দেওয়া সহজ নয়। আকাশটা লাল হয়ে উঠেছে। ঝড় উঠবে নাকি? মেবোর জঙ্গলে হায়না ডাকছে। দেওদার চোঁচিয়ে বলে—“মালা যে নিয়েছো সময় থাকতে ফিরিয়ে দাও।

এখনো সময় আছে। যে মালা নিয়েছে আমি জানি সেই লোক এ ভিড়ের ভেতর রয়েছে।” সেই ভিড়ের ভেতর গুঞ্জন ওঠে। লোকজন চঞ্চল হয়ে ওঠে। দেওদার চৈঁচিয়ে ওঠে—“এখনো সময় আছে, স্বীকার করো। করো স্বীকার। চুটে গামটে, পিরকু অপদেবতারা নেমে এলে তোমার ধ্বংস অনিবার্য। কেউ এ ধ্বংস রুখতে পারবে না। এখনো সময় আছে। আমি চারিদিকে সব অমঙ্গলের ছায়া দেখতে পাচ্ছি। আর গাঁয়ের অমঙ্গল হবেই যতোকণ না গাঁয়ে চুরি বন্ধ হয়। চোর ধরা পড়ে। আমি এখনো সাবধান করে দিচ্ছি। বোলানের পাহাড়ে আজ কয়েকদিন ধরে শকুনিরা মৃত জীবজন্তুর দেহ স্পর্শ করেনি। এর কারণ কি? সিরকি আর ছুরাকরণের জলে মরা মাছ ভেসে উঠছে কেন? লিঙ্গুকরণের ছুধারের জঙ্গলের সব গাছ মরে যাচ্ছে কেন? এসবের কারণ গাঁয়ের লোক অসৎ হয়ে উঠেছে। সেই জন্তে। সেই জন্তে অপদেবতার দল চঞ্চল হয়ে উঠেছে। সেই জন্তে চারদিকে অমঙ্গলের চিহ্ন। দেওদার বোঁ বোঁ করে পাক্ খেয়ে ঘুরতে থাকে। মুরগীর দেহ থেকে রক্ত গড়িয়ে চাপ বেঁধেছে। দেওদার একটা ছোট্ট পাথরখণ্ডের ওপর নিজের হাত স্পর্শ করে মন্ত্র পড়তে থাকে। কিছুক্ষণ পরে সেই পাথর নড়তে শুরু করে। সমবেত জনতা আনন্দে চীৎকার করে ওঠে।

বিশ্বয়ে আনন্দে তারা অভিভূত। পাথর প্রথমে নড়তে শুরু করলে। তারপর চলতে শুরু করে। সঙ্গে চলেছে দেওদার। তার হাত পাথর স্পর্শ করে রয়েছে। পাথর গড়িয়ে চলেছে পাহাড়ের ঢাল বেয়ে। সঙ্গে দেওদার, পেছনে বিস্মিত বিমূঢ় জনতা। পাথর গিয়ে যেখানে থামবে সেখানেই পাওয়া যাবে অপরাধীর সন্ধান। ওমি আর নেনী দেওদারের পেছনে চলেছে। ওমির ভয়ে বুক টিপ্ টিপ্ করছে। ওই পথেই তার ঘর। পাথর চলতে চলতে যদি তার ঘরের কাছে থেমে যায়? তাহলে উপায়? নেনীর গলা থেকে মালাটা ঝুলে সে আগেই পাহাড়ের এক গুহায় লুকিয়ে রেখেছিলো। পাথর এবার ভীষণ জোরে গড়িয়ে চলেছে। দেওদার সঙ্গে সঙ্গে ছুটছে। জনতা চলার গতি বাড়িয়ে দিয়েছে। দেওদার মন্ত্র

পড়ছে ভীষণ জোরে জোরে। দেওদার পেছন ফিরে মাঝে মাঝে নেনীর দিকে তাকাচ্ছে। নেনী তাকাচ্ছে দেওদারের দিকে। ওমি ভাবে ওর দিকে দেওদার এতো ঘন ঘন তাকাচ্ছে কেন? নেনীর কোনো অমঙ্গল হবে না তো? দেওদার বার বার নেনীর দিকে তাকায় কেন? ওমি স্বীকার করবে নাকি তার দোষ! যা ভেবেছিলো ঠিক তাই। ওমির বাঁশের ঘরের কাছে এসে পাথর থেমে যায়। সমবেত জনতা হর্ষধ্বনি করে ওঠে। দেওদার তাকায় নেনীর দিকে। নেনী তাকায় দেওদারের দিকে। ওমি ভাবে পাথর যেখানে খুশি থেমে যাক, শুধু দেওদার তার ওই সর্বনাশা দৃষ্টি থেকে নেনীকে মুক্তি দিক। ওমি আর ভাবতে পারেনি। জনতা ঝাঁপিয়ে পড়ে ওমির ওপর। একটি মুহূর্তের জন্তে ওমি দেখতে পায় দেওদারের দৃষ্টির সঙ্গে নেনীর দৃষ্টি বিনিময়। চোখের তারায় তারায় ইঙ্গিত আর ইশারার আদান-প্রদান। দুজনের গুষ্ঠপ্রান্তে হাসির ঝিলিক। ওমি দেওদারকে হাতের কাছে পেলে টুকরো টুকরো করে ছিঁড়ে ফেলতো। জনতা ওমির ওপর ঝাঁপিয়ে পড়েছে। ওর কাছে মালা আছে কি নেই সে সব তাদের জানবার দরকার নেই। পাথর এসে ওমির বাড়ির কাছে থেমেছে। ওটুকুনই যথেষ্ট। কিল, চড়, লাথি, আঁচড়, কামড়—যে যা পেরেছে অকাতরে দান করেছে। ওরা ওমিকে ক্ষতবিক্ষত করে তুলেছে। তারপর ওরা ওমিকে টানতে টানতে নিয়ে চলে কেবাঙ-এ। কেবাঙ-এ গাঁয়ের বয়স্ক ব্যক্তিদের সভা বসবে। আর সেই সভাতে ওমির বিচার হবে। মারের চোটে ওমির মাথা ফেটে রক্ত গড়িয়ে চোখের পাতা দুটো বারে বারে বুজিয়ে দিচ্ছিলো। তবু এর ভেতর এক কঁাকে সে তাকিয়ে দেখে দেওদার নেনীর মুখে আপড় ঢেলে দিচ্ছে। কাগোলী জামু আনন্দে নেনীকে জড়িয়ে ধরেছে। জড়িয়ে রয়েছে অনেকক্ষণ ধরে। একটা আহত সিংহের বিক্রম নিয়ে সে জনতার হাত থেকে নিজেকে মুক্ত করে কাগোলী জামুর ওপর ঝাঁপিয়ে পড়তে চেয়েছিলো। কিন্তু নিজেকে সে ওদের হাত থেকে মুক্ত করতে পারলে

না। যে বাড়িতে কেবাঙ্ বসবে তাকে বলা হয় মোরাং। কেবাঙ্-এর বিচার দেখবার জন্তে সমস্ত গাঁথানা ভেঙ্গে পড়েছে। ওমিকে একটা গাছের সঙ্গে দড়ি দিয়ে বাঁধা হলো। গ্রামসভা ঠিক করবে তার কি ধরনের শাস্তি হবে। গ্রামের প্রবীণ এক ব্যক্তি কাগোলী জামুর পক্ষ নিয়ে সব কিছু বলে যেতে শুরু করলে। এ ঠিক বলা নয়। যেন বিরাট একটা কবিতা ঘণ্টার পর ঘণ্টা সুর করে আওড়িয়ে যাচ্ছে। একটানা একঘেঁয়ে একটা সুর। সাক্ষীসাবুদের অভাব হলো না। ওমিকে মালা সম্বন্ধে অনেক কিছু জিজ্ঞাসা করা হলো। ওমি কিছুই বললে না। মালার কথা জিজ্ঞাসা করাতে সে জানালে মালা তার কাছে নেই। হুকুম হলো ত্রিশ ঘা বেতের। বেত শরীরে কেটে কেটে বসে যাচ্ছে। মুখ দিয়ে ওমির ফেনা গড়াচ্ছে। তবুও ওমি মালার খোঁজ দেয়নি। বেত চলেছে একটার পর একটা। দয়া নেই, মায়্যা নেই। বিশ ঘা বেতের পরে ওমি অজ্ঞান হয়ে গেছে। তার আর কিছুই মনে নেই। ধীরে ধীরে সব ঝাপসা হয়ে এসেছিলো। মেবোর পাহাড়, জঙ্গল সব ধীরে ধীরে অস্পষ্ট হয়ে গিয়েছিলো। এর পর কতোক্ষণ কেটে গেছে সে জানে না। একসময় তার জ্ঞান ফিরে এসেছে। মেবোর প্রাস্তর ভখন জনশূন্য। কাছেপিঠে জঙ্গলে আর পাহাড়ে হায়না ডাকছে। ঘন ঘন ফেউ ডাকছে। গাঁয়ের কুকুরগুলো কি বিস্মীভাবে কাঁদছে। তাকে মৃত মনে করে মেবোর জঙ্গলে শকুনিগুলো ডানার ঝাপটা দিচ্ছে ঘন ঘন। শেয়ালগুলো একবার এগিয়ে এসে আবার পিছিয়ে যাচ্ছে। তাদের জিহ্বা দিয়ে লাল ঝরছে। ধারেকাছে কেউ কোথাও নেই। খানিকটা জল মুখে তুলে দেবে এমন একটা লোক পর্যন্ত আশেপাশে নেই। বেতটা মাংস কেটে কেটে বসে গেছে। অসম্ভব রকম রক্তস্রাব হচ্ছে। অনেক কষ্টে ওমি উঠে দাঁড়ায়। কি যন্ত্রণা, বাপ! কোনো রকমে টলতে টলতে গিয়ে একটা শ্রোতস্থিনীর জলে সে লাফিয়ে পড়ে। বরফগলা জল। সমস্ত শরীর ঠাণ্ডা করে দেয়। নেনীটা কোথায় গেলো? সে রওনা দিলে নেনীর খোঁজে। সন্ধ্যার অন্ধকারে



সারাটা গাঁ সে খুঁজে দেখলে, কোথাও নেনী নেই। না, কোথাও নেই।  
 গাঁয়ের লোকেরা তাকে দেখে হাসলে। টিটকিরি দিলে। খুখু ফেললে।  
 গুমির শরীরে তীব্র ব্যথা। মনে দুর্জয় ক্রোধ। আবার সেই সঙ্গে  
 অসম্ভব অভিমান। একবার ভাবলে দেওদারের কাছে ছুটে যায়।  
 সে হয়তো গুনে নেনীর খবর বলে দিতে পারবে। শেষ পর্বস্তু গাঁয়ের  
 এক যুবক তাকে সমস্ত খবর দিলে। নেনী রয়েছে কাগোলী জামুর  
 ঘরে। পৃথিবীটা চোখের সামনে ঘুরতে থাকে। ঘুরতে থাকে পাহাড়,  
 পর্বত। নদী প্রান্তর সব কিছু ঝাপসা দেখতে থাকে গুমি। এর  
 পর গুমি ছুটেতে থাকে পাগলের মতো। হাতে তার ধরা রয়েছে  
 মস্তো বড় একটা ছুরি। ঝকঝক করেছে এক বিরাট ছুরি।

জিমি, পিরটে, ওমাইউ দেবতা আর অপদেবতা সবাইকে ডেকে  
 সে বলেছে তাকে ক্ষমা করতে। ছুরি বসাবে সে কাগোলী জামুর বুকে।  
 শাস্তিস্বরূপ নেনীর একটা অঙ্গ, হয় হাতের আঙুল নয়তো পায়ের  
 পাতা সে দেহ থেকে বিচ্ছিন্ন করে দেবে। ওই শাস্তিই নেনীর প্রাণ্য।  
 ভীষণ জোরে দৌড়িয়ে সে কাগোলী জামুর ঘরের কাছাকাছি পৌঁছিয়ে  
 গিয়েছিলো। কিন্তু তারপরই পায়ের নীচের মাটি ছলতে থাকে।  
 গুরগুর গুরগুর করে এক অদ্ভুত শব্দ। তারপর মাটি ছুঁকাক হয়ে  
 যেতে থাকে। গুরগুর গুরগুর আবার সেই ভীষণ! ভয়ঙ্কর শব্দ।  
 কেঁপে ওঠে মাঠ আর প্রান্তর। আকাশে পাণ্ডুর চাঁদ মেঘের আড়ালে  
 ঢাকা পড়ে। পৃথিবী ছলতে থাকে। দেবতা, অপদেবতার কি গুমির  
 প্রার্থনা শুনলো? মাটি ছলছে। চলার শক্তি নেই গুমির। সে মাটি  
 আঁকড়িয়ে পড়ে রইলো। এতো অত্যাচার! এতো অত্যাচার! এতো  
 পাপ! ধ্বংস হয়ে যাবে এ পৃথিবী। আবার গুরগুর গুরগুর শব্দ!  
 একটা পাহাড়ের চূড়ো তার চোখের সামনে পাহাড় থেকে আলাগা হয়ে  
 মাটিতে নেমে এলো। সঙ্গে সঙ্গে শোনা গেলো অসংখ্য জীবজন্তুর মরণ-  
 চীৎকার। কারো রক্ষা নেই। বাড়িঘর, গাছপালা নিয়ে সামনের  
 পাহাড়টা ভেঙ্গে পড়লো। মরণচীৎকারে আকাশবাতাস মুখরিত।

ওমির হঠাৎ খেয়াল হলো নেনীকে বাঁচাতে হবে। যে করে হোক নেনীকে বাঁচাতে হবে। মাটি থেকে উঠে সে আবার কাগোলী জামুর ঘরের দিকে ছুট লাগায়। মাটি কাঁপছে। ওমির পা কাঁপছে। কি অসম্ভব ধুলোবালি উড়ছে! আকাশটা ধুলোবালিতে ঢেকে গেছে। চাঁদটাও যেন ঢাকা পড়ে যাচ্ছে। একপাল হরিণ প্রাণভয়ে এদিকে দৌড়িয়ে এসেছিলো। তাদের পায়ের নীচেকার মাটি হঠাৎ ফেটে ছুভাগ হয়ে গেলো। আর সেই বিরাট গর্তের ভেতর দিয়ে গোটা হরিণের দলটা অদৃশ্য হয়ে গেলো। যাবার আগে সে কি ভীষণ চীৎকার। বিরাট বিরাট সব গাছ আশেপাশে ভেঙ্গে পড়ছে। তবুও মাতালের মতো টলতে টলতে ওমি চলেছে। পৃথিবী ধ্বংস হয়ে যাক। নেনী শুধু বেঁচে থাক।

মাটির তলা থেকে ফাটল দিয়ে বগ্‌বগ্‌ করে জল উঠছে গরম জল। টগ্‌বগ্‌ করে যেন ফুটছে। আর তা থেকে ধোঁয়া বেরুচ্ছে। আকাশে বাতাসে কি বিশ্রী একটা গন্ধ! কাগোলী জামুর ঘরে পৌঁছুতে গেলে একটা ছোট নদী পার হতে হয়। সে আশ্চর্য হয়ে দেখলো নদীটার কোন চিহ্ন পর্যন্ত নেই, সম্পূর্ণ অদৃশ্য হয়ে গেছে। কাগোলীর ঘরে পৌঁছে সে দেখে কাগোলীর থেঁতলানো দেহটার পাশে নেনী অজ্ঞান অবস্থায় পড়ে আছে। নেনার মাথা ফেটে রক্ত গড়াচ্ছে। নেনীর অজ্ঞান দেহটা কাঁধে করে সে দৌড় শুরু করেছিলো। কতোক্ষণ দৌড়েছিলো তার খেয়াল নেই। ততোক্ষণ কম্পন বন্ধ হয়েছে। কিন্তু যদিকে তাকানো যায় সেদিকেই ধ্বংসের চিহ্ন। সে সারারাত একটু একটু করে চলতে চলতে একসময় সিয়াং-এর ধারে পৌঁছে গিয়েছিলো। পথ নেই, ঘাট নেই। সিয়াং-এর জলধারা স্তব্ধ হয়ে রয়েছে। একটা বিরাট পাহাড় ভেঙ্গে সিয়াং-এর ওপর হুমড়ি খেয়ে পড়েছে। তাতেই সিয়াং-এর জলস্রোত চলবার পথে বাধা পেয়ে থমকে দাঁড়িয়েছে। জলের রং বদলে ঘোর কালো হয়ে গেছে। জলের ওপর হাজার হাজার মাছ মরে ভেসে উঠেছে। সিয়াং-এর বুকে থেকে ধোঁয়া উঠছে। কি যেন

সব মিশেছে জলের সঙ্গে। একটা বিরাট মৃত বাঘ আর একটা মৃত হাতীকে সে সিয়াং দিয়ে ভেসে যেতে দেখলো। ভোর হলো। বহু আকাজিকত এ সকাল। আবার সেই মিষ্টি নরম আলো। ফুরফুরে হাওয়া বইছে। নেনী চোখ মেলে চেয়েছে। ওমি ওকে বুকে জড়িয়ে রয়েছে। আবার শ্যামা, দোয়েল, কোকিল গাইছে। গত রাত্রির সমস্ত বিভীষিকা কেটে গেছে। দেওদারের সেই ভীষণ মুখখানা মন থেকে মুছে গেছে। নেই কাগোলী জামুর সেই পৈশাচিক হাসি। ওমি ভুলে গেছে জনতার মার। চাবুকের ঘা। সে ভুলে গেছে রাতের সেই ভয়ঙ্কর ভূকম্পন। পৃথিবীর সেই বারে বারে কঁপে ওঠা। পাহাড়ের চূড়া ভেঙ্গে পড়া। হরিণের সেই আত চীৎকার। কিছু নেই। সব থেমে গেছে। আর কোনো ভয়ের কারণ নেই। সব মন থেকে মুছে গেছে। মনে হচ্ছে ভগবান তার সমস্ত যন্ত্রণা মুছিয়ে দিয়েছেন। মনে হচ্ছে পৃথিবী কি সুন্দর। নেনী কি সুন্দর। শত শত পাহাড় গুঁড়ো হয়ে যাক। নদীর মুখ শুকিয়ে যাক। প্লাবন হোক। হাতির পাল, হরিণের পাল মাটির গহ্বরে হারিয়ে যাক। ওমির তাতে কি যায় আসে, নেনী রয়েছে তার বুকে। ভোরের সোনালী আলো, ফুরফুরে হাওয়া চমৎকার। মধুর। তবে সিয়াং-এর বুকে এ গুরুভার। সিয়াং বাঁচবে তো? দরকার হয় ওমি তার দেহের রক্ত সিয়াং-এর বুকে ঢেলে দেবে তাতে যদি সিয়াং খুশী হয়, তার শাস্তি হয়! সিয়াং আদিদের দেবতা।

ওমির গল্প খুব মনোযোগ দিয়ে সেদিন শুনেছিলাম। শুনেছিলাম হাসপাতালের বেড়ে ওমির পাশে বসে। এরপর নার্স এসে ওমির কথা বজা বন্ধ করে দিলে। আমাদের অনুরোধ করলে বিদায় নিতে। রোগী উত্তেজিত হলে তার শরীরের পক্ষে খারাপ হবে। বাড়িতে পৌঁছে কাগজপত্রের ঘেঁটেছিলাম। ১৮৯৭ সালের আসামের ভূমিকম্পের চাইতে ১৯৫০-এর ভূমিকম্প অনেক বেশী জোরালো। সমস্ত নেকার চেহারাটা নাকি এ ভূমিকম্প পালটিয়ে দিয়েছিলো। অদৃশ্য হয়েছিলো অনেক নদী, গিরি, প্রান্তর আর জনবসতি।

থ্রী নোট্রাম্‌স্‌! বরফুকনটা পাগল নাকি? হাতে তাস নেই মোটেও, কি যা-তা সব ডাকছে! চমকায় মিস্টার দাস। আর চমকায় মিস্টার মদন আর সঙ্গে সঙ্গে মিস্টার সেনগুপ্ত। পশুর ডাক্তার সেনগুপ্ত। তার বাড়িতেই আজ সন্ধ্যার পর তাসের আড্ডা বসেছে। আড্ডা দেবার দিন শনিবার আর রবিবার। এক শনিবার সেনগুপ্তর বাড়িতে জমায়েত হলে পরের শনিবার ওরা হাজির হয় মদনের বাড়িতে। এক রবিবার যদি দাসের বাড়ি, তবে পরের রবিবার বরফুকনের বাড়ি। সঙ্গে থাকে গৃহিণীরা। আজও তারা উপস্থিত। শুধু আড্ডা দেওয়া আর তাস খেলা নয়। খাবারের ব্যবস্থা থাকে। সঙ্গে থাকে ড্রিন্‌কস। অফিসে কাজ আর কতোটুকুন। পার্টি আর পিকনিকের ছড়াছড়ি। ওসব ছাড়া নেফা সার্ভিস করাই মুশকিল হতো। কর্তারা কাজ করে পলিটিক্যাল, মেডিক্যাল, সি. পি. ডবলু ডি. আর এডুকেশন অফিসে। গিন্নীরা ঘোরে সর্বত্র। সারা পাশিঘাট চষে বেড়ায়। দাস তাস ফেলে একটা সিগারেট ধরিয়েছে। ড্রিন্‌কস-এ চুমুক দিচ্ছে একটু একটু করে। মিসেস্‌ সেনগুপ্ত ঝুঁকে রয়েছে মদনের ঘাড়ের ওপর। তার উষ্ণ নিঃশ্বাস পড়ছে মদনের ঘাড়ে গলায় ঘন ঘন। মিসেস্‌ মদনের গা থেকে সেন্ট আর পাউডারের গন্ধ উড়ছে। বরফুকনটা সব সময় সর্বনেশে ডাক দেয়। তাসের আসরে বসে ভুলে যায় যে গুনে গুনে পয়সা ফেলতে হবে। ও ভীষণ বেপরোয়া আর ডানপিটে। ঐতিহাসিকদের মতে ওর রক্তে অনেক রক্ত মিশেছে। অক্টোএসিয়াটিকস্‌। ড্রাবিদিয়ানস্‌। টিবেটো-বার্মান। মঙ্গোলয়েডস্‌ আর এরিয়ানস্‌। অসম ইতিহাসে দেখা যায় ফুকনরা ছ হাজার সৈন্তের কর্তা ছিলো। স্ত্রীর প্রসাধনে, ব্লাউজ আর শাড়িতে পরম্পরের সঙ্গে পাল্লা দিতে চেষ্টা করেছে। মিসেস্‌ মদনের বব্‌ করা চুল থেকে কেমন একটা মিষ্টি মিষ্টি গন্ধ বেরুচ্ছে। সেনগুপ্ত ঘন ঘন নিঃশ্বাস টানছে। মিসেস্‌ মদন আঙুলের ডগায় একটা সিগারেট ধরে আছে। মিসেস্‌ মদন ধূমপানে

অভ্যস্ত। মিসেস্ দাস লুকিয়ে লুকিয়ে ইদানীং সিগারেট টানবার আর্টটা রপ্ত করেছে।

—“থ্রী নোট্রামস্ !”

বরফুকনের ডাক শুনে মিসেস্ মদন বলে ওঠে, “মাই ডিয়ার ! মাই ডিয়ার !”

এটা বলা তার একটা মুজাদদাষে দাঁড়িয়েছে। সেনগুপ্ত এক-ফাঁকে মিসেস্ বরফুকনকে দেখে নেয়। জোড়হাটের মেয়ে। হলুদ গায়ের রং। অদ্ভুত সুন্দরী। ঠোঁটের পাশে তিলটায় সৌন্দর্য যেন অনেক বাড়িয়েছে। তার লোকাট ব্লাউজের আড়ালে চলেছে স্পর্ধা আর আত্মস্পর্ধার সদস্ত আত্মালন।

—“আজকে কিন্তু মাংস নেই।” বলে সেনগুপ্ত।

—“হোপলেস্।” সঙ্গে সঙ্গে বলে ওঠে মিসেস্ বরফুকন আর দাস।

আলি সাহেবের অর্ডার দেওয়া পাঁঠা-খাসী আজ ওরাং বাটুর নৌকায় পাশিঘাট পৌঁছুতে পারে নি। ব্রহ্মপুত্র ফুলে ফেঁপে একাকার। নেকার বৃষ্টির জলের সবটুকু নেমে আসে ব্রহ্মপুত্রে। আর সেই জগ্গে ব্রহ্মপুত্র ঘন ঘন ডিক্রগড়কে শাসায়। ব্রহ্মপুত্রের রক্তচক্ষু দেখে ডিক্রগড় কাঁপে থরথর করে।

ওরাং বাটু আর জাওলাপ্রসাদের নিজেদের বোট রয়েছে। বোটে ছোট্ট মোটর ফিট করা। ওদের বোট ডিক্রগড়ের ঘাট থেকে পাড়ি দেয় পাশিঘাটের উদ্দেশ্যে। যাবে ওইরাম ঘাট পর্যন্ত। ফট্‌ফট্‌ করে শব্দ করতে করতে বোট জল কেটে এগিয়ে যায় নব্বুই মাইল পথ। ওইরাম ঘাট থেকে বাসে বা জীপে পাশিঘাট। জংলাপথে অনেকটা দূর অতিক্রম করলে তবে পাশিঘাটে পৌঁছানো যায়। সপ্তাহে তিন দিন বোট যাতায়াত করে। পাশিঘাটের লোকজন নৌকো ঘাটে পৌঁছুবার আশায় হা করে চেয়ে থাকে। নিত্যপ্রয়োজনীয় জব্যসামগ্রীতে বোঝাই হয়ে বোট জল কেটে পাশিঘাটের পথে পাড়ি জমায়। নৌকোয় কি নেই? লোকজন, মুরগী, পাঁঠা-খাসী, জীপ, সাইকেল, গরু, কয়লা,

লোহা, কাঠ, খবরের কাগজ, আলু-পটল। সব মিলেমিশে একাকার। এক একটা বছর বর্ষা যে ভীষণ রূপ নিয়ে এসে উপস্থিত হবে তা মার্চ মাস থেকেই স্পষ্ট বোঝা যায়। ব্রহ্মপুত্রের ওপর দিয়ে নৌকো চালিয়ে নিয়ে আসা তখন অসম্ভব হয়ে ওঠে। সেসময় প্লেন নামবে না, নৌকো পনেরো দিনে একদিন ওইরাম ঘাট পৌঁছুবে কিনা সন্দেহ। তারপর পাহাড়ী পথে জঙ্গলের ভেতর দিয়ে মাল পাশিঘাটে নিয়ে আসা। সেও কম কষ্টকর ব্যাপার নয়। পাশিঘাট সভ্য জগতের সংস্পর্শ থেকে একেবারে বিচ্ছিন্ন হয়ে যায়। তখন সারা পাশিঘাটের লোকগুলো নির্ভর করবে জাওলাপ্রসাদের মার্বেলের মতো ছোট ছোট শুকনো আলুর ওপর, আর ওরাং বাটুর ছাতা-পড়া মুসুরির ডালের ওপর। ছ'মাসেরও ওপরে হয়ে গেছে ওরাং বাটু, ডাল এনে ঘরে মজুত করেছে। শ্রাঁৎসেঁতে ময়লা নোংরা ঘর। ততোদিন ডালে পোকামাকড় ছেয়ে গেছে।

ব্রহ্মপুত্র ডিব্রুগড়কে ধীরে ধীরে খেয়ে শহরের ভেতরে ঢুকছে। কোনো রকমেই নদীকে শাসন করে বাগমানানো যাচ্ছে না। তারের নেটে পাথর বোঝাই করে ব্রহ্মপুত্রের তীরে ফেলা হচ্ছে। ডিব্রুগড়কে বাঁচাতে হবে। এর আগে নেট ছাড়াই পাথর ফেলা হয়েছিলো। কত লক্ষ পাথর ফেলা হয়েছিলো এবং কিভাবে ফেলা হয়েছিলো তার দিকে কেউ নজর রাখেনি। হাজার আর লক্ষের মধ্যে দৃষ্টি রাখবার প্রয়োজন আছে বলে কেউ মনে করেনি। টাকার অঙ্কের বহর দেখে কঠীদের চোখ ছানাবড়া। কিন্তু ততোদিনে পাথর জলের তলায় অদৃশ্য হয়েছে। সঙ্গে সঙ্গে জলে গেছে অনেক টাকা। ব্রহ্মপুত্র সমস্ত পাথর খেয়ে বসে আছে। হিসেবনিকেশের বাইরে চলে গেছে সমস্ত কিছু। অতো পাথর জলে ফেলা হয়েছে কিনা সে বিষয়েই অনেকে সন্দেহ প্রকাশ করতে শুরু করলো। দুজন ওভারসিয়ার, চারজন কন্ট্রাক্টারের বিরুদ্ধে আদালতে নালিশ হলো।

পাথর খেয়ে ব্রহ্মপুত্রের পেট মোটেও ভরলো না। তার দাপট

বাড়লো। ডিক্রগড়ের রক্ষার কাজ মোটেও এগুলো না, এবার ভাই নেটবন্দী পাথর ব্রহ্মপুত্রের তীরে ছড়ানো হচ্ছে। ব্রহ্মপুত্রকে রুখতে হবে। জাওলাপ্রসাদ গোঁড়া হিন্দু। সে তার নৌকায় পাঁঠাখাসী আনবে না। জাওলাপ্রসাদের দোকানে জিনিসপত্রের দাম ভীষণ চড়া। ছুঁটাকার বিস্কুটের টিন আট থেকে দশ টাকায় বিক্রী হয়। জাওলাপ্রসাদের সঙ্গে ওরাং বাটুর ভীষণ প্রতিযোগিতা। জাওলাপ্রসাদের নৌকো যাতে ব্রহ্মপুত্রে গুলটায় সেজতে চুটে গামটের কাছে ওরাং বাটু বেশ কয়েকবার মানত করেছে। ওরাং বাটুর মোটরবোটে তেল আর মবিল অয়েলের দরকার হলে জাওলাপ্রসাদ সব কিছু সরিয়ে রাখে। সঞ্চিত তেল আর মবিল অয়েল লুকিয়ে রেখে মুখখানা কাঁচুমাচু করে বলে—“ভাই, ওসবের এককণাও আর অবশিষ্ট নেই। আনতে হবে ডিক্রগড়ের বাজার থেকে।” সে মনে মনে ভাবে ওরাং বাটুর বোট অচল হয়ে পড়ে থাক না কয়েকদিন। তখন পাশিঘাটের ঘরে ঘরে জাওলাপ্রসাদের খোঁজ পড়বে। স্বয়ং ডি. সি. মানে পাশিঘাটের ডেপুটি কমিশনার জাওলাপ্রসাদের খোঁজখবর করবে। দামী কাপড়ে মোড়া সোফাতে জাওলাপ্রসাদ তার রোদ্দুরে ফেটে যাওয়া আর বর্ষাতে ছাতা পড়া পা দুখানা তুলে বসলেও ডি. সি. আপত্তি করবে না। ডি. সি-কে প্রয়োজনে অনেক জিনিসপত্র ডিক্রগড় থেকে আনাতে হবে। জাওলাপ্রসাদ তার শ্যালকের একটা বিজনেস পারমিটের জন্ম ডি. সি-র পেছনে অনেকদিন থেকে ঘোরাফেরা করছে। নেফাতে বিজনেস করবার পারমিট পাওয়া খুব মুশকিল। ইনার লাইন। পারমিশান আর পারমিট ছাড়া ব্যবসা করা অসম্ভব। পাস আর পারমিট ছাড়া নেফাতে ঢোকানো মুশকিল। শিলং সেক্রেটারিয়েট থেকে পারমিশান আর পারমিট আনাতে হবে ডি. সি-র নোটের ওপর অনেক কিছু নির্ভর করে। জাওলাপ্রসাদ জানে মাসখানেক ওরাং বাটুর বোট অচল হয়ে পড়ে থাকলে তার কাজ সহজে হাসিল হবে।

নেফার বাইরে থেকে উড়ে এসে জুড়ে বসা এ লোকটাকে ওরাং

বাটু কিছুতেই সহ্য করতে পারে না। ওর সঙ্গে ব্যবসা-বুদ্ধিতে সে কিছুতেই পেরে ওঠে না। কিন্তু এদিকে তার ধমনীতে বইছে আবার রক্ত। শাসন মানে না। বশু আর উদাস। সাহেবদের আবার বড্ডো জ্বালিয়েছে। বছর বছর সাহেবদের হত্যা করেছে তারা। অনেকেই বলেছিলো আবরু নামটা ট্রাইবস্দের মোটেও পছন্দ নয়। তাই আজকে সবাই তাদের আদি বলে ডাকে। ওরাং বাটু ছবার চেষ্টা করেছে তার নৌকো নিয়ে জাওলাপ্রসাদের নৌকোর ওপর ঝাপিয়ে পড়তে। সংঘর্ষ বাধিয়ে চেষ্টা কবেছে জাওলাপ্রসাদের নৌকো ডুবিয়ে দিতে। ছবারই সে বিফল হয়েছে। তবে রাতের অন্ধকারে গিয়ে বোটের মোটর নষ্ট করে রাখা, তেল চুরি করে বোটকে পঙ্গু করে দেওয়া নানারকম অসুবিধের সৃষ্টি করে যাতায়াতের বাধাবিলম্ব ঘটানো—এসব অহরহ হুজনে করছে। যতোদিন জঙ্গলের পথে নূতন নূতন সড়ক না বেরুবে, জীপ আর বাস চলাচলের পথ সুগম না হবে, প্লেন ঘন ঘন পাশিঘাটে না নামবে ততোদিন হুজনের এ রেষারেষি, এ দ্বন্দ্ব চলবে। ভুগবে পাশিঘাটের লোকগুলো। আর এসব অসুবিধার পূর্ণ সুযোগ নেবে ওরাং বাটু আর জাওলাপ্রসাদ।

—“আমাদের মুরগী চাই! মুরগী চাই!” সন্মিলিত কণ্ঠধ্বনি।

—“মুরগী পাওয়া যাচ্ছে না। কি একটা অজ্ঞাত রোগে পাশিঘাটের মুরগীগুলো সার্ভিস না দিয়েই মারা পড়ছে। ওষুধ সময়মতো ডিক্রগড হাসপাতাল থেকে না এসে পড়াতেই এ বিপদ।” বলে সেনগুপ্ত।

মিসেস দাস তাকিয়ে থাকে মিসেস মদনের দিকে। মিসেস দাস মিসেস মদনকে সমস্ত ব্যাপারে অনুকরণ করে। ওর সঙ্গে সে সমস্ত কিছুতে পাল্লা দিতে চায়। চুল থেকে পায়ের নখ পর্যন্ত। সর্ব বিষয়ে ওকে অনুকরণ করে।

মিসেস মদন দিল্লীর মেয়ে। অল্পবয়স থেকে অনেক কিছু সে দেখেছে। ক্লাব, পার্টি অনেক করেছে। এসব ওর কাছে নূতন নয়। মিসেস দাসের স্বামী নেফাতে চাকুরি নেবার আগে কলকাতার বাইরে



মকঃস্থলের এক কলেজের লেকচারার ছিলো। মিসেস্ দাস হাত-পা পুড়িয়ে রান্না করেছে। বাটনা বেটে, বাসন মেজে, কাপড় কেচে, হাত-পা-এর আঙুলগুলোর অবস্থা কাহিল করে তুলেছিলো। আঙুলের ফাঁকে ফাঁকে ঘা হয়ে গিয়েছিলো। হাওড়ার এক অখ্যাত গলিতে স্বামী-স্ত্রী থাকতো। কলকাতায় বিশেষ করে দক্ষিণ কলকাতায় বেড়াতে এলে বাড়িঘরগুলোর দিকে মিসেস্ দাস হাঁ করে তাকিয়ে থাকতো। ড্রইংরুম, গাড়ি, বাগান, দারোয়ান, খানসামা, বেয়ারা দেখে মিসেস্ দাস দীর্ঘশ্বাস ফেলতো। অতি আধুনিকাকে দেখে দেখে তার আর আশ মিটতো না। নিজে সুন্দরী সে কোনোকালেই ছিলো না। রং তার ময়লা, অতি সাধারণ চেহারা। কিন্তু সুন্দরীর প্রতি তার দুর্বলতা পুরুষমানুষের চেয়ে কোনো অংশে কম ছিলো না। মাজাঘষা ফিটফাঁট চেহারার আধুনিকাদের দেখে মিসেস্ দাস স্বপ্নের রঙীন জাল বুনতো। মিস্টার দাস যখন সেজ্জপীয়ারের গ্রন্থ নিয়ে মেতে রয়েছে তখন মিসেস্ দাস সতৃষ্ণনয়নে দেকানের শোকেস্গুলোর দিকে তাকিয়ে রয়েছে।

সেই দাস পাশিঘাটের পলিটিক্যাল অফিসের চাকরির জন্তে দরখাস্ত করে দিন গুনতে শুরু করলে। চাকরি শেষ পর্যন্ত তার হলো। মিসেস্ দাসের পীড়াপীড়িতে এ চাকরি নেওয়া। মাইনে ভালো। সুযোগ-সুবিধে অনেক রয়েছে। চমৎকার বাড়ি। বাগান। একটা জীপ, চাকর, বেয়ারা। ড্রইংরুম, পার্টি, পিকনিক। মিসেস্ দাস ঠোঁটে লিপস্টিক ঘষে, নখে রং লাগিয়ে, কাজল, কুমকুম, টিপ ব্যবহার করে অতিমাত্রায় আধুনিক হবার চেষ্টা করলে। সে কলকাতায় গিয়ে চুল বব্ করে এসেছে। মিসেস্ দাস ধীরে ধীরে নিজেকে গড়ে তুলছে। আর সেজন্তে তাকে অনেক মেহনত করতে হচ্ছে। কলকাতায় আর হাওড়ায় যা হয়নি, এখানে এসে সেসব কিছু ধীরে ধীরে হচ্ছে। সিগারেট টানতে গেলেই ভীষণভাবে সে কাশতে শুরু করে। গুটা না টেনে আঙুলে ধরে রাখা অনেক ভালো। আদব-

কায়দার ঘোলাজলে হাবুডুবু খাচ্ছে মিসেস্ দাস। সিগারেটের চাইতে আবার ড্রিঙ্কস ভালো। মিসেস্ দাস নিজের পা দুটো আলগোছে বয়ের আর বেয়ারার কোলে চাপিয়ে দেয়। ওরা পায়ের আঙুলগুলো জুতোর ভেতর ঢুকিয়ে দেয়। আবার কখনো টেনে বের করে আনে। পাশিঘাট মিসেস্ দাসকে ধীরে ধীরে গড়ে তুলছে। তবে দুঃখ এটুকুনই যে এ নেফার পাশিঘাট। কলকাতা, দিল্লী, বম্বে নয়। এখানে দেখবার লোকের অভাব।

—“পাশিঘাটে জুটুসের বড্ডো অভাব!” বলে মিসেস্ মদন।

—“আর আজকাল ড্রিঙ্কসেরও ভীষণ অন্ত্রবিধে হচ্ছে।” মিসেস্ দাস বলে। সে মিসেস্ মদনের কাছে কোনোরকমেই পরাজয় স্বীকার করবে না।

মিস্টার দাস চমকায়। হাওড়ার গলির শাকচচ্চড়ীতে পুষ্ট মিসেস্ দাস অনেক দূর এগিয়েছে। আরো কতোদূর যাবে কে জানে! ভাবে মিস্টার দাস।

—“জানো মদন, উনি বম্বেতে খুব ভালো একটা অফার পেয়েছিলেন। খুব বড়ো চাকরি।” বলে মিসেস্ দাস।

—“চাকরিটা নিলেন না কেন?” প্রশ্ন করে মিসেস্ মদন।

—“আমাদের কি শুধু টাকা দেখলে চলে। আমরা কি শুধু টাকার জন্তে নেফায় এসেছি। নেফায় এসেছি দায়িত্বপালন করতে। উদ্দেশ্য এখানে কিছু ভালো কাজ করা। উদ্দেশ্য ট্রাইবগুলোর উন্নতিসাধন। ওদের ফেলে চলে যেতে মন চায় না। ওদের প্রতি আমাদের একটা কর্তব্য রয়েছে। রয়েছে দায়িত্ব।” বলে মিসেস্ দাস।

মিস্টার দাস রুমাল নিয়ে ঘন ঘন কপালে বোলায়। ঘাম রয়েছে কিনা সেদিকে খেয়াল নেই। সেনগুপ্ত তাস থেকে চোখ তুলে মিসেস্ বরফুকনের দিকে ঘন ঘন তাকাচ্ছে। লোকাট ব্লাউজের অন্তরাল থেকে র্যোবনের হাতছানি। সেনগুপ্ত হার্টের ডাক দেবে। কিন্তু তার আগে তার নিজের হার্টটা বড্ডো-দুর্বল মনে হচ্ছে। মিসেস্

সেনগুপ্ত প্লেট সাজাচ্ছে। ওমলেট, পের্মাজের বড়া, চিঁড়েভাজা, সন্দেশ।

—“কাল আমরা কোথায় মিলিত হচ্ছি?” জিজ্ঞেস করে মিসেস বরফুকন।

—“কেন? মেবোর ডাকবাংলোতে। ওখানেই পার্টির বন্দোবস্ত হয়েছে।” জবাব দেয় মিসেস সেনগুপ্ত।


—“সঙ্গে নুইমিং কস্টিউম নিতে ভুলো না যেন।” বলে মিসেস দাস।

মিসেস সেনগুপ্তের দেহে চবির আধিক্য রয়েছে। হনলুলু, পুরী, বিশ্বের বীচে মিসেস সেনগুপ্ত ওসব পরিধান করে আবার অবতীর্ণ হলে লোকজনের ভিড় হতো। একটা নূতন কিছু দেখবার আশায় কৌতূহলী জনতা তাকে হয়তো ঘিরেই ফেলতো। ভিড় সামলাবার জেগে পুলিশকে হয়তো শেষ পর্যন্ত লাঠি চার্জ করতে হতো। নেফার অরণ্যে সে অশ্রুবিধে নেই।

মদন বরফুকনকে বলে—“আগরওয়ালাকে রাতের বেলা জেনারেটারটা একটু বেশী সময় চালু রাখতে বলেছো তো?”

বরফুকন জানায় যে সে বলেছে।

আগরওয়াল। সি. পি. ডবলু. ডি-র ইলেকট্রিক্যাল ইঞ্জিনিয়ার। পাশিঘাটের ভালো জেনারেটারটা অকেজো হয়ে পড়ে আছে। দ্বিতীয় জেনারেটারটার শক্তি কম। তাতে আবার কয়েকদিন যাবৎ ভীষণ ট্রাবল দিচ্ছে। আগরওয়াল। জেনারেটার ছুটোর ওপর সন্তান-স্নেহ অর্পণ করেছে। ধুয়ে-মুছে, তেলে-জলে স্নান করিয়ে ওদের সচল রেখেছে। রাতদিন সে ও ছুটোর পেছনে লেগেই রয়েছে।

আজ রাতের পার্টিতে ডি. সি. আসবে। একটু নাচগানের বন্দোবস্ত করা হয়েছে। আগরওয়াল। জেনারেটারটা বেশীক্ষণ চালু রাখতে প্রথমে রাজী হয়নি। পাশিঘাটে আর্টটার ভেতর আলো । পথেঘাটে আলোর বালাই নেই। বেশীর ভাগ বাড়ি-

ষর ও সুবিধে থেকে বঞ্চিত। আর্টটার পনেরো মিনিট আগে আলো নেভাবার সঙ্কেত ধ্বনি দেওয়া হয়। লোকজন হ্যারিকেন আর মোমবাতি নিয়ে প্রস্তুত হয়।—আর্টটার পর পাশিঘাট অন্ধকারের অতল তলে ডুবে যায়।

আগরওয়ালা তার দুর্বল জেনাবেটারটা নিয়ে রিস্ক নিতে চায় না। একটি দুর্বল জেনারেটার মাত্র সম্বল। অপরটি নিষ্ক্রিয়। কিন্তু বরফুকন নাছোড়বান্দা। রাত এগারোটা পর্যন্ত আলো তাদের চাই-ই। অনেক বলে-কয়ে আগরওয়ালাকে রাজী করিয়েছে। অবশ্য একটা শর্ত রয়েছে। আগরওয়ালাকে মিস্ মজুমদারের সঙ্গে নাচতে দিতে হবে। আগরওয়ালা ড্রিক্স্ চায় না। সাদা চোখেই সে নাচবে। মিস্ মজুমদার যতো ইচ্ছে পান করুক। আগরওয়ালার আপত্তি নেই। বরফুকন আজকের পার্টিতে মিস্ মজুমদারকে পার্টনার বেছেছিলো। তাস খেলার সময় পার্টনার। নাচের পার্টনার। আগরওয়ালা জিদ ধরে সব ভেস্টে দিলো। যাক্ গে। আজকের জন্তে আগরওয়ালার এ অমুরোধ মেনে নিতেই হবে।

অন্য সময় হলে আগরওয়ালার এ আবদার সে কখনোই সহ্য করতো না। কিন্তু আজ উপায় নেই। রাজী তাকে হতেই হবে। ডি. সি. আজ রাত্তিরে প্রধান অতিথি। আলো না হলে কি চলে। আর কন্-ফিডেন্সিয়াল রিপোর্ট লেখার সময় এসে গেছে। ডি, সি-র কাছ থেকে ভালো একটা রিপোর্ট নিয়ে শিলিং-এ বদলি হতেই হবে। সমস্ত ব্যবস্থার ভার বরফুকনের ওপর। আজ রাতে জোড়ায় জোড়ায় ওরা নাচবে। চলবে ওয়েস্টার্ন মিউজিক্ রেকর্ড্। ড্রিক্স্। আর সঙ্গে ভালো খাবার। অনেক রাত পর্যন্ত আলো জ্বলবে। আজ পাশিঘাটের রাতটা হয়ে উঠবে জমজমাট। নেফা ধথ হবে। ধথ হবে পাশিঘাট আর তার আশেপাশের অঞ্চল।

—“সইকিয়া এখনো এলো না কেন?” প্রশ্ন করে দাস।

—“বললে তো সাতটার ভেতর এসে যাবে।” জবাব দেয় সেনগুপ্ত।

—“ওর পার্টিতে জয়েন্ করা সম্বন্ধে আমার ডাউট রয়েছে।” বলে মদন।

—“লোকটা যেরকম কর্তব্যপরায়ণ আর কাজ নিয়ে যেরকম সারাক্ষণ মেতে থাকে, কিছু বলা যায় না, শেষ পর্যন্ত কর্তব্যের খাতিরে কোথাও না বেরিয়ে পড়ে।” বলে বরফুকন।

—“ওর মিসেস্ না এলে কিন্তু আমরা খুব দুঃখিত হবো।” বলে দাস। সঙ্গে সঙ্গে জু কোঁচকায় মিসেস্ দাস।

—“লোকটা একটু অদ্ভুত ধরনের, তাই না?” বলে মিসেস্ মদন।

—“সত্যিই তাই। ডয়ইং গোবিঙ-এর হলটা ছেড়ে দিতে কিরকম গড়িমসি করছে। চিত্রাঙ্গদা আর স্বপন কুঁয়োরের রিহার্সেল বন্ধ।” বলে দাস।

—“আচ্ছা, বিশ্বনাথ নন্দীর সঙ্গে শুনছি মিসেস্ ভট্টাচার্যের ভীষণ রেবারেবি চলেছে!” বলে মিসেস্ সেনগুপ্ত।

—“তা তো চলেছেই।” জবাব দেয় মিসেস্ দাস।

—“বিশ্বনাথ নন্দী চায় এবার ‘শাহজাহান’ নাটক মঞ্চস্থ করা হোক। মিসেস্ ভট্টাচার্যের চিত্রাঙ্গদা নাটকের ওপর ঝোক। এই নিয়ে দ্বন্দ্ব আর বচসা।” বলে সেনগুপ্ত।

—“শাহজাহান নাটকে রূপ দেবার মতো লোকজন পাশিঘাটে কোথায়?” বলে দাস।

—“নন্দী সে কথা শুনতে চায় না। সে নাছোড়বান্দা। এর আগে কলকাতায় আর তিনসুকিয়ায় শাহজাহানের রোলে নেমে সে নাকি দুবার গোল্ড মেডেল পেয়েছে। তৃতীয়বার শাহজাহানের রোলে নেমে সে পাশিঘাটের জনসাধারণকে মুগ্ধ করে দিতে চায়।” বলে বরফুকন।

—“ওই চেহারা নিয়ে শাহজাহানের রোলে?” হেসে গড়িয়ে পড়ে মিসেস্ দাস।

—“শাহজাহানের ছুঁর্ভাগ্য! ভারত-ঈশ্বর শাহজাহান!” বলে হেসে গড়িয়ে পড়ে মিঃ সেনগুপ্ত।

—“হাসপাতালে গিয়ে দেখবেন, বিশ্বনাথ নন্দী রোগীর মুখের দিকে তাকায় না, এক কোণে মাথা নীচু করে বসে রোগবর্ণনা শুনছে আর ওষুধ লিখে যাচ্ছে। ট্রাইবস্দের লোকদের সে দ্বিতীয়বার কথা বলবার সুযোগ দিতে নারাজ। শাহজাহানের রোলে নামতে গেলে যে সব বুলি আওড়াতে হবে তারই মহড়া ঘন ঘন দিয়ে যাচ্ছে। নাটকের লাইনগুলো অনবরত আওড়িয়ে যাচ্ছে।” বলে সেনগুপ্ত।

—“সে কি মশাই?” মদন বলে।

—“আমার কথা বিশ্বাস না হয় রোগী হয়ে ওর কাছে চলে যান। দাঁড়িয়ে থাকুন ওর টেবিলের কাছে। খানিবক্ষণ পরে শুনতে পাবেন ভারত-ঈশ্বর শাহজাহান বা তচিত করছে। তবে দিল্লীর সিংহাসনে বসে নয়, হাসপাতালের চেয়ারে বসে।” হা-হা করে হেসে ওঠে সেনগুপ্ত।

সইকিয়া তার স্ত্রীকে নিয়ে সেনগুপ্তর বাড়ির দিকে রওনা হয়েছিলো। উদ্দেশ্য পার্টিতে যোগ দেওয়া। পাশিঘাটের শ্মশানের কাছাকাছি তারা এসে গিয়েছিলো। এমন সময় একটা লোক অন্ধকার থেকে বেরিয়ে কাছে এসে দাঁড়ায়, কি যেন সব ফিস্ ফিস্ করে সইকিয়ার কানে বলে। সব শোনামাত্র সইকিয়ার মুখ গম্ভীর হয়ে ওঠে। সে ঘুরে দাঁড়ায়। সঙ্কের আদালিকে বলে মিসেসকে সেনগুপ্তর বাড়ি পর্যন্ত পৌঁছিয়ে দিতে। নিজে রওনা দেয় তার নিজের বাংলোর পথে। সিয়াং-এর ধারেই তার বাংলা। ড্রয়ার থেকে লোডেড্ রিভলবারটা নিতে হবে। তারপর লোকটার সঙ্গে বেরিয়ে পড়তে হবে। এখুনি। এই মুহূর্তে।

সইকিয়া পাশিঘাটে এ. পি. ও. টু—মানে পলিটিক্যাল অফিসার নাম্বার টু।

সইকিয়ার কিন্তু পার্টি আর নাচগানের দিকে বিশেষ নজর নেই। খানিকটা নজর দেওয়া শুধুমাত্র তার স্ত্রীর অনুরোধে। সইকিয়ার মাথায় সর্বক্ষণ ঘুরছে ট্যুর। টি. এ। ডি. এ। ট্রান্স্কার, ইনক্রিমেন্ট, প্রমোশান, এ. পি. ও. টু থেকে এ. পি. ও. ওয়ান হবার স্বপ্ন দেখছে সে।

কালে কালে ডাইরেক্টরেটে সেক্রেটারীর পদে অধিষ্ঠিত হওয়া। মেমোরে-  
 গাম, সাকুলার, ফাইল, চিঠি, ওয়ার্নিং, হুজুর, হাজির। নেফার অরণ্যকে  
 সে লাল ফিতে দিয়ে আষ্টেপৃষ্ঠে বাঁধতে চায়। পাশিঘাটে জেল নেই।  
 সইকিয়া সামান্যতম অপরাধে আসামীকে কোয়ার্টার গার্ডসে পুরে দেয়।  
 যে লোক বিনা অনুমতিতে এয়ার-ফিল্ডের মাঠে ঘাস কেটেছে, যে  
 রাতের বেলা পাশিঘাটের পথে গরু-ভেড়া ছেড়েছে, তাদের সে ছোট  
 ঘরটিতে অগ্নান বদনে পুরে দেয়। সইকিয়া সি. আর পি. অর্থাৎ সেন্ট্রাল  
 রিজার্ভ পুলিশের কমান্ডারের সঙ্গে ঝগড়া করে। নোট লেখে, তাকে  
 শাসায়। মেডিক্যালের ডাক্তার পরিবারের কেউ নেফায় আসতে চাইলে,  
 পাশিঘাটে বেশীদিন থাকতে চাইলে, ইনার লাইনের পাস নিয়ে সে গড়ি-  
 মসি করে। টালবাহানা করে। পজিসন্ প্রেসটিজ রাখবার জন্তে সময়  
 নেয়। কেরোসিনের দাম ছ'পয়সা বাড়ালে সে কোয়ার্টার গার্ডসে পুরবার  
 ভয় দেখায়। তার রক্তচক্ষুকে সবাই ভয় পায়। সে বোট চালিয়ে  
 চলে যায় অনেক দূর। সেই ব্রহ্মপুত্র আর সিয়াং যেখানে মিশেছে প্রায়  
 সেই পর্যন্ত। সেখানে বোট থেকে আফিং চোরাইকারবারিদের  
 নৌকোর ওপর সে অতর্কিতে ঝাঁপিয়ে পড়ে, প্রতিপক্ষকে সে নাস্তা-  
 নাবুদ করে ছাড়ে। বোলানের জঙ্গলে ইঞ্জিনীয়াররা সড়ক ঠিকঠাক  
 বানাচ্ছে কিনা সে-বিষয়ে সে খোঁজখবর নেয়। পাশিঘাটে বিনা পাশে  
 যে প্রবেশ করেছে তাকে সে খুঁজে বার করে। জঙ্গলের পথে কতটা  
 চিনি আর চাল পাচার হচ্ছে, সে খোঁজখবরও তাকে রাখতে হয়।  
 ভীষণ কঠিন সমস্ত কাজ। কিন্তু সইকিয়া তাতে ঘাবড়ায় না। এজন্তেই  
 বোধ হয় তার হাসি, ঠাট্টা, নাচ, গান ভালো লাগে না। এসব কাজ  
 করতে গেলে অনেক ঝুঁকি নিতে হয়। দায়িত্বের সঙ্গে সঙ্গে বিপদও  
 অনেক রয়েছে। সইকিয়ার অফিসের ড্রয়ারে তাই থাকে লোডেড,  
 রিভলবার। অফিসে এবং বাড়িতে সে সবসময় প্রস্তুত। একবার সইকিয়া  
 বিষাক্ত তীরে জখম হয়ে ডিব্রুগড় হাসপাতালে বেশ কয়েক মাস শুয়ে-  
 ছিলো। অল্পে জন্তে বেঁচেছে। সইকিয়া পান খায় না। সিগারেট

টানে না। ডিক্লেসের ওপর তার আসক্তি নেই। মেয়েমানুষ থেকে সে দূরে থাকে। অফিসার হবার সমস্ত গুণ তার রয়েছে। যেভাবে হোক তাকে ডিসিপ্লিন বজায় রাখতে হবে। শুধু অফিসে নয়, সমস্ত পাশিঘাটে ডিসিপ্লিন চালু রাখার দায়িত্ব কাঁধে চাপিয়ে সরকার তাকে পাশিঘাটে পাঠিয়েছে। তার ঘরের পাছাপুলার পাখা টানতে টানতে ঘুমিয়ে পড়েছিলো। সঙ্গে সঙ্গে ছোট্ট ঘরে তাকে দুদিন আবদ্ধ থাকতে হয়েছে। প্রমোশান তাকে যে কোন প্রকারে হোক পেতেই হবে। নাহলে সম্মান থাকে না। এইমাত্র সঙ্গে লোকটা ফিস্ ফিস্ করে অনেক কিছু বললে। সে গুপ্ত সম্বন্ধে কয়েকটা প্রয়োজনীয় খবর দিলে। আর সঙ্গে সঙ্গে সব কিছু ফেলে সইকিয়া গুপ্তর সন্ধান চলেছে। গুপ্ত ছিলো পাশিঘাটের ওয়ারলেস্ অপারেটর। ঘোর বর্ষায় পাশিঘাটের সঙ্গে যখন বাইরের জগতের সমস্ত সম্বন্ধ বিছিন্ন হয়ে যায়, তখন গুপ্তকে প্রয়োজন সব চেয়ে বেশী। গুপ্তর টেবিল নানারকম মেসেজে ভরে ওঠে। ওয়ারলেসে সমস্ত যোগাযোগ বজায় রাখতে হয়। সব খবরবার্তা পাঠাতে হয়। গুপ্তর তখন অনেক কাজ। অনেক রকম খবরই তাকে পাঠাতে হয়। কিন্তু গুপ্ত সর্বদাই মদে চুর হয়ে থাকে। তার টেবিলে মেসেজ জমে ভূপ হয়। গুপ্ত সর্বক্ষণ রাম নয়তো আপঙ্ গিলছে। আর ওসব গিলে চলে যায় হুঁশ তার খেয়ালের বাইরে। সময়মতো খবর আসা-যাওয়া করে না। আর এখানেই সইকিয়ার আপত্তি। এজ্যেই সে গুপ্তর ওপর চটে আছে। একটা ভীষণ জরুরী খবর পাঠাতে গুপ্ত দেরি করেছিলো। ডি. সি.-কে বলে সইকিয়া গুপ্তর বদলির অর্ডার বের করেছিলো। উত্তর সিয়াং-এর অভ্যন্তরে এক ভীষণ নির্জন পোস্টে তার বদলির অর্ডার হয়েছিলো। গুপ্ত যায়নি, গুপ্ত অর্ডার রিসিভ পর্বস্তু করেনি। একটা পাহাড়ের উপর গুপ্তর অফিস, চারদিকে জঙ্গল আর জঙ্গল। সইকিয়া শুনেছিলো গুপ্ত অফিসে রাতদিন কাটায়। শোয়, খায়। রান্নাবান্না পর্বস্তু অফিসের ভেতর। গভর্নমেন্ট কনডাক্ট রুলসে এসব গুরুতর অপরাধ। দোষীকে শাস্তি দিতেই হবে। সইকিয়াকে



ঘন ঘন সাকুলার ছাড়তে হয়েছে। কিন্তু সাকুলার রিসিভ করবার লোক নেই। পাহাড়ের ওপর ছোট্ট এইটুকুন টেলিগ্রাফ অফিস। দেড়খানা ঘর। পায়রার খুপরির মতো ঘরগুলো। গুপ্ত ঘর থেকে সদাসর্বদা নজর রাখে। টেলিগ্রাফ অফিসের দিকে ডি. সি-র অফিসের পিওন বা আদালিকে এগুতে দেখলেই সে পাহাড়ী পথে নেমে জঙ্গলের ভেতর অদৃশ্য হয়ে যায়। তাকে খুঁজে বের করা তখন অসম্ভব হয়ে পড়ে। পিয়ন সাকুলার দোরগোড়ায় ঝুলিয়ে রেখে বিদায় নেয়। সাকুলার আর নোট জমতে থাকে। গুপ্ত জঙ্গল থেকে ফিরবার সময় লতাপাতা আর শাকসব্জি নিয়ে ফেরে। সেসব অফিসের ঘরে, অফিসেরই হিটারে, অফিসের ইলেকট্রিসিটি খরচ করে সেদ্ধ করে খায়। সরকারের সম্পত্তি নিজের কাজে লাগানো এক গুরুতর অপরাধ। শোনা যায় সে নাকি একটা ছরবীন কিনেছিলো। ছরবীন চোখে লাগিয়ে সে পাহাড়ের ওপর থেকে সব কিছুর ওপর নজর রাখতো। সইকিয়া পাতার পর পাতা নোট লিখে গুপ্তর বিরুদ্ধে কেস ভালো ভাবেই সাজিয়েছিলো। অনেক তথ্য। অনেক প্রমাণ। শিলং ডাইরেক্টরেট থেকে তদারক করবার জন্তে দুজন উপরওয়াল এসেছিলো। এনকোয়ারি কমিটির সভারা সময়মত সমবেত হলো। কিন্তু সইকিয়া নোট, মেমোরেণ্ডাম, সাকুলার আর ইস্তাহার কোনো কিছুই হাজির করতে পারলো না। অফিস ড্রয়ার থেকে সমস্ত কিছু নিখোঁজ। বেইজ্জতির চূড়ান্ত। সইকিয়ার মাথা হেঁট। সভারা বিরক্ত। সারা অফিসে গুঞ্জন, হাসি, ঠাট্টা, মস্করা। সব গুপ্তর কাজ। এনকোয়ারি কমিটি বসবার আগের রাত্তিরে গুপ্ত অফিসঘরে ঢুকে ড্রয়ার খুলে সব কাগজপত্র নিয়ে চম্পট দিয়েছে। কেউ টের পায়নি। গুপ্তর জয়। সইকিয়ার পরাজয়। কঠিন মন্তব্য করে মেম্বাররা বিদায় নিলে। সইকিয়ার অপমানের চূড়ান্ত। সেবার সইকিয়া খুব নাকাল হয়েছিলো। সইকিয়া প্রতিজ্ঞা করেছিলো যে এ অপমানের প্রতিশোধ সে নেবেই। সে দৃঢ়প্রতিজ্ঞ, যে করেই হোক গুপ্তকে পাশিঘাট থেকে সরাতেই হবে। গুপ্ত

পাশিঘাটে গা ঢাকা দিয়ে আছে। বেশ কয়েকদিন হলো তার পাশিঘাটে থাকার ছাড়পত্রের মেয়াদ ফুড়িয়ে গেছে। আর ছাড়পত্র ছাড়া পাশিঘাটে থাকা মানেই অপরাধ। আর সে অপরাধ আইনের চোখে দণ্ডনীয়।

রিভলবার পকেটে ফেলে সইকিয়া বেরিয়ে পড়ে। শ্মশানকে পেছনে রেখে, পাওয়ার হাউস ছাড়িয়ে, বাজারের পথ পেরিয়ে, নেপালী বস্ত্রীর উদ্দেশ্যে সে চলতে থাকে। গুপ্ত আজ কয়েকদিন ওখানেই গা ঢাকা দিয়ে আছে। বেশী রাত না হলে ওখানে তাকে পাওয়া যাবে না। পথটা ঘন জঙ্গলে ঢাকা। বুনো জানোয়ারের উৎপাত খুব বেশী। সইকিয়ার ভ্রক্ষেপ নেই। পায়ের ওপর দিয়ে কি যেন সড়সড় করে চলে গেলো। টর্চের আলো ফেলতেই দেখা গেলো একটা কালকেউটে। সঙ্গের লোকটা খুব ভয় পেয়েছে। সইকিয়ার গা ঘেঁষে দাঁড়িয়ে কাঁপছে। টর্চের আলোটা ঘুরিয়ে ওধারটায় ফেলতেই দুটো চোখ জ্বলজ্বল করে ওঠে। লেপার্ড হবে হয়তো। বড্ডো হিংস্র। সইকিয়া রিভলবারের বাঁটটা শক্ত করে চেপে ধরে। এখন গুলি করা চলবে না। গুপ্ত গুলির শব্দ পেলে আর আলো দেখলে অদৃশ্য হবে। এত মেহনত মাঠে মারা যাবে। সইকিয়া সঙ্গের লোকটাকে ধরে একরকম টানতে টানতে নিয়ে চলে। টর্চটা পর্যন্ত সে জ্বালেনি পাছে গুপ্ত টের পায় তার আগমনবার্তা। নেপালী মেয়েটার ঘরে প্রায় সারারাত তাকে ওর সঙ্গে থাকতে হয়েছে। অভিনয় করতে হয়েছে। প্রেমের জয়গান গাইতে হয়েছে। বার বার মদের গ্লাস হাতে তুলে নিতে হয়েছে। মদ সে খায়নি। দু'এক চোকের পর মেয়েটির অজ্ঞাতে জানালা গলিয়ে বাইরে ফেলে দিয়েছে। রাত আড়াইটের সময় গুপ্তর স্টেজে আবির্ভাব। সঙ্গে সঙ্গে সইকিয়া তার ওপর ঝাঁপিয়ে পড়েছে। গুপ্ত ভোজালি তুলেছিলো বুকে বসাবার জন্তে। রিভলবারের কঠিন শীতল নল তার বুকের পাঁজরে ঠেকাতেই গুপ্ত ভোজালি নামিয়ে নিয়েছে। রাত তিনটের সময় ওকে নিয়ে সইকিয়া অফিসে ফিরেছিলো।

গুপ্তর হাতে হাতকড়া লাগানো। গুপ্ত এতোটা আশা করেনি। মাথা তার হেঁট হয়েছে। দৃষ্টি মাটির দিকে নিবদ্ধ। সে-রাতেই সইকিয়া ডি. সি-র কাছে খবর পাঠিয়েছিলো। ডি. সি তখন সেনগুপ্তের বাড়িতে মিসেস্ সইকিয়ার সঙ্গে নাচছে। পার্টি তখনো ভাঙেনি। দুজনের কেউই সইকিয়ার এ খবরটা খুব খুশিমনে নেয়নি। পার্টির সমস্ত আবহাওয়াটা যেন কেমন নষ্ট হয়ে যায়। বিষিয়ে ওঠে ডি. সি-র মনটা। এ খবরটা সইকিয়া পরের দিন অফিসে দিলেই পারতো।

দশটায় অফিসে এসে সে সইকিয়াকে ডেকে পাঠায়।—“আমি শিলং ডাইরেক্টরেটে আজই আপনার প্রমোশানের ব্যাপারে লিখছি।” তারপর একটু থেমে আস্তে আস্তে বলে—“মিষ্ণু এতো ভালো নাচে এটা আমার আগে জানা ছিলো না।”

মিষ্ণু হলো মিসেস্ সইকিয়া। উন্নতির মইটা বেয়ে সইকিয়া ধীরে ধীরে ওপরে উঠছে। তাকে উঠতেই হবে। না হলে শাস্তি নেই। এখনো অনেকগুলো সোপান তাকে অতিক্রম করতে হবে। ডয়ইং গোবিং মানে পাশিঘাটের ক্লাব-ঘরে সেদিন সন্ধ্যায় সে ফুংফাংকে শাসন করে। ফুংফাং জাতিতে লুসাই। সইকিয়ার দক্ষিণহস্ত। কিন্তু সইকিয়ার কাছে কারো নিস্তার নেই। ফুংফাং-এর জীপে লোকের সংখ্যা নির্ধারিত সংখ্যার চেয়ে অনেক বেশী ছিলো। তাছাড়া নির্ধারিত স্পীডের ওপরে স্পীড দিয়ে ফুংফাং জীপ চালিয়েছিলো। ফুংফাংকে লাস্ট ওয়ার্নিং দিয়ে সইকিয়া বেরিয়ে পড়ে। আড্ডা দিতে সে এখানে আসেনি।

পাশিঘাটে রয়েছে মিস্টার ভট্টাচার্য আর তার স্ত্রী। ভট্টাচার্য পাশিঘাটের ফরেস্ট অফিসার। জঙ্গলভর্তি গাছ। লতা, কুঁড়ি, পাতা, ফুল আর ফল। পুরানো গাছ মরে। পাতা ঝরে। নতুন গাছ জন্মায়। কুঁড়ি থেকে ফুল। ফুল থেকে ফল। ফল পাকে। ঝরে যায়। জঙ্গলে কতো ধরনের জীবজন্তু রয়েছে। সংখ্যায় তারা অসংখ্য। কে তার হিসাব রাখে। হিসেবপত্র রয়েছে সব ফাইলে। লাল ফিতে দিয়ে সে সমস্ত ফাইল বাঁধা। সমস্ত কিছু স্ট্যাটিস্টিকদের সংখ্যার বাঁধনে বাঁধা পড়েছে। ফাইল খুলে ভট্টাচার্য মুহূর্তে সব কিছু রুলে দিতে পারে। জঙ্গলে জঙ্গলে ঘোরা তার পোষায় না। জীবজন্তুরা নেফার জঙ্গলে বেঁচে থাক। বেঁচে থাক স্ত্রী পুত্র কন্যা নিয়ে। সুখে ঘর-সংসার করুক। গাছপালা দীর্ঘজীবী হোক। বংশবৃদ্ধি করুক। অফিসে কেরানীরা ফরেস্ট গার্ডদের সঙ্গে তর্কের তুফান বইয়ে দিক। ঘুষ আর টাকাপয়সা নিয়ে বাদানুবাদ, বচসা হোক। হাতীর-দাঁত, লেপার্ড স্কিন, হরিণ আর অজগরের চামড়ার হিসেবনিকেশ নিয়ে ওরা মাথা ঘামাক। ভট্টাচার্যের কোনো আপত্তি নেই। সে অফিস বস্। বাস ওই পর্যন্ত। ভট্টাচার্য আর তার স্ত্রী ব্যস্ত গানবাজনা নিয়ে। ভট্টাচার্য যদি ঠুংরি কায়দাকানুন রপ্ত করতে ব্যস্ত থাকে, মিসেস্ তবে রবীন্দ্রসংগীতের সুরে গুন্‌গুন্‌ করে গাইতে থাকে। ভট্টাচার্য তবলা বাজায়। হরেক-রকম তাল নিয়ে উতলা হয়ে ওঠে। ঝাঁপতাল, তিনতাল, একতাল। বুমরা, আড়া, চৌতাল আর তিলুয়ারা। সারাদিন ধরে চলে মেহনত। পাড়াপ্রতিবেশীদের কানে তাল। লেগে যায়। তবলার ঝাঁপতাল আর তিনতালের কসরৎ চলতে থাকে ঘন ঘন। ধিনা ধি ধিনা। তিনা ধি ধিনা। আবার ধা ধিন্‌ ধিন্‌ ধা, ধা ধিন্‌ ধিন্‌ ধা। তিন্‌ তিন্‌ তা। তা ধিন্‌ ধিন্‌ ধা। ওদিকে মিসেস্ ব্যস্ত সেতার নিয়ে। মিড়, গমক, মুর্ছনায় ডুবে থাকে। আলাপ জোর ঝালায়, মাতিয়ে তোলে চারদিক। মোট কথা সঙ্গীত নিয়ে ছুজনেই মেতে আছে। কথক,

মণিপুরী, ভারতনাট্যম ছেলেমেয়েদের শেখাবার জন্তে ওরা মেননকে দিল্লী থেকে নিয়ে এসেছে। মেনন পলিটিক্যাল অফিস থেকে একটা মাইনে পায়। থাকা-খাওয়ার বন্দোবস্ত ভট্টাচার্যদের বাড়িতে। বরফুকন শঙ্করদেব আর মাধবদেবের বরগীত শেখায়। মেনন নাচ শেখায়। বিহুগীত শেখায় মিসেস্ সইকিয়া। আদিদের চলোং পুন্স উৎসবের সব কিছু শেখাবার ভার ওরাং বাটুর মেয়ে নিয়েছে। মিসেস্ ভট্টাচার্য এক মিনিটও চুপ করে থাকতে পারে না। তার মুখ দিয়ে অনবরত খই ফোটে। মিসেস্ ভট্টাচার্যের বাড়িতে সবাই জড়ো হয়। নাচগানে পাড়া মেতে ওঠে। মিসেস্ কাউকে গরম হালুয়া খাওয়াচ্ছে। কাউকে গলায় সেক দিয়ে দিচ্ছে। হাসপাতালের মেল আর ফিমেল নার্সরা মিলে একটা ফাংশন করছে। মিসেস্ ভট্টাচার্যের নেতৃত্বে সেদিন ডয়ইং গোবিঙ-এ রিহার্সেল চলেছে। অসমীয়া উৎসব বহাগ বিহুর রিহার্সেল।

বাইরে এপ্রিলের সূর্য। প্রথর আর কঠিন। তপ্ত মাটি। তপ্ত জমি। সেই মাটি বর্ষার জলে ভিজবে। শস্য বোনা হবে। ফলবে কসল। বিহু নাচ যৌবনের প্রবল আকর্ষণ।

শুধু যৌবনের জয়জয়কার। তোমার যৌবন আছে। আমার যৌবন আছে। আমাদের মিলনে হবে সার্থক সৃষ্টি। সূর্যের প্রথর তাপে জমি তেতে ফেটে আছে। বর্ষার স্নিগ্ধধারায় তাকে করে তুলবে সম্ভাবিত। হবে সুজলা আর সুফলা।

কিশোরীর বৃকের লাল রিহাতে জানাচ্ছে আগামী দিনের সম্ভাবনা। আমি নাচছি, নেচে চলেছি। আমাকে এখন ডেকো না। তোমার ডাক যে আমাকে চঞ্চল করে তুলেছে। আমার যে বিহু নাচ নাচা হবে না। ঢোলের সঙ্গে সঙ্গে কি উদ্গাদনা। কি আকর্ষণ! সঙ্গে বাজছে মোষের শিং-এর তৈরী সিঙ্গা। নাচের সঙ্গে সঙ্গে ফুকন গানের মর্ম বুঝিয়ে যাচ্ছে।

—“জানেন ফুকন সাহেব, স্টেজের পরদা বদলাতে চেয়েছিলাম, পলিটিক্যাল অফিস পয়সা দিলে না। ওরা যে পয়সা গ্র্যান্ট করেছে

তাতে সমস্ত কিছুর জন্তে খরচ করে পরদা কেনা যায় না। ওরা ভাবে  
পরসা বাঁচিয়ে আমরা পেট ভরাবো।” বলে মিস্টার ভট্টাচার্য।

—“সইকিয়া এসবের মর্ম কি বুঝবে। সে আর্ট বোঝে না। সে  
শুধু বোঝে চালডালের হিসেব। বোঝে সি আর. পি. (সেন্ট্রাল  
রিজার্ভ পুলিশ), বি. এম. পি. (বিহার মিলিটারী পুলিশ), চুরি  
আর খুনজখম। ট্রাইবস্দের সে রক্তচক্ষু নিয়ে শাসাতেই শিখেছে।  
মেননকে অকারণ কতোগুলো কড়া কথা শুনিয়েছে। মেনন বোনের  
অশুখের ছুতো করে ডি. সি-র কাছ থেকে পাস যোগাড় করে পাশিঘাট  
ছেড়েছে। বোধ হয় পাশিঘাটে আর ফিরবে না। ছেলেমেয়েদের নাচ  
কে শেখাবে বলুন দেখি!” এতো জোরে মিসেস ভট্টাচার্য কথাগুলো  
বলে যে মনে হয় কানের পরদা বুঝি ফেটেই যাবে। কথাগুলো এক  
নিশ্বাসে বলে মিসেস ভট্টাচার্য। চোখ দুটো শাড়ীর আঁচল দিয়ে ঘন ঘন  
মুছতে থাকে।—“কদিন থেকে চোখটা বড্ডো জ্বালাচ্ছে। জল পড়ছে  
ঘন ঘন। ডিক্রগড় কি গৌহাটি গিয়ে চশমা নিতে হবে।” বলে  
মিসেস ভট্টাচার্য।

—“আমি এ. পি. ও. টু-এর জারিজুরি সব ভাঙ্গবো। কালকে ডি.  
সি-র অফিসে গিয়ে বেশ কড়া ছ’কথা শুনিয়ে আসবো।” বলে  
মিসেস ভট্টাচার্য।

ওকে সবাই ভয় পায়। অনেক বাড়ির হাঁড়ির খবর সে রাখে।  
কথায় কথায় ঝগড়া করে মিসেস ভট্টাচার্য। কালকে ডি. সি-র  
অফিসে গিয়ে মিসেস ভট্টাচার্য সত্যি হয়তো একটা কাণ্ড বাঁধিয়ে বসবে।  
মিস্টার ভট্টাচার্য চিন্তিত হয়ে পড়ে বৈকি। বলা যায় না। ডি. সি  
চটে গিয়ে যদি তাকে আবার নেফার অভ্যন্তরে কোথাও বদলি করে  
দেয়! আদি নার্সরা চলোং পন্থ থেকে খানিকটা প্রেজেন্ট করবে।  
নিলাম ডাই আর মাল্‌টু জামু সব কিছু শেখাচ্ছে। গালং ছেলেরা আর  
মিনিয়ও মেয়েরা এসেছে পন্থ নাচতে। নাচের সঙ্গে চলবে সমবেত  
সঙ্গীত। একটানা সুরে সবাই গেয়ে যাবে। সবাইকার হাতে থাকবে

একটা ভোঁতা তরবারি। তরবারির গোড়ার দিকে কয়েকটা লোহার খালা। তরবারি নাচালে তাতে শব্দের সৃষ্টি হয়। বিষয়বস্তু হলো আদিদের পুরানো ঐতিহ্য, তাদের ইতিহাস।

এক ফাঁকে মিসেস্ ভট্টাচার্য স্টেজ থেকে নেমে হলের বাইরে চলে এসেছে। ঝোপজঙ্গল যেখানে খুব ঘন সেখানে দাঁড়িয়ে শাড়ির আঁচলের গিঁট খুলে একটুকরো কাগজ বের করেছে। কাগজের টুকরোটা সে আলোয় মেলে ধরেছে। কয়েকটা লাইন তাতে লেখা রয়েছে।

মেনন লিখেছে—“তোমাকে আমি ভালোবেসেছিলাম। আমি জানি তুমিও আমাকে ভালোবাস। তাই চেয়েছিলাম তোমাকে সঙ্গে নিয়ে বেরিয়ে পড়তে। তুমি রাজী হলে না। ভয় পেলে। আমার পক্ষে পাশিঘাটে থাকা আর সম্ভব হলো না।”

কয়েকটা লাইন। মিসেস্ ভট্টাচার্য চিন্তামগ্ন। টের পায়নি যে আমি পেছন থেকে সব কিছু দেখেছি।

ছোট চিঠিখানার ওপর মিসেস্ ভট্টাচার্যের দশবার চোখ বুলিয়েও আর যেন আশা মেটে না। এর পর কাগজখানা সে ছিঁড়ে টুকরো টুকরো করে জমির ওপর ছড়িয়ে দেয়। পাতা ঝরে যায়, পুরানো গাছ মরে। নূতন গাছ জন্মায়। কুঁড়ি থেকে ফুল। ফুল থেকে ফল। ফল পাকে। ঝরে যায়। তার বীজ থেকে নূতন অঙ্কুর উকি দেয়। নূতন সম্ভাবনা। মিসেস্ ভট্টাচার্য এখন শুধু সম্ভাবনা নিয়ে বেঁচে থাকবে। হয়তো আবার ওর সঙ্গে কোথাও কোনোখানে দেখা হবে। সেই আশা নিয়েই বাঁচবে।

মেশনকে আমি শিলং-এর হোটেলে মিট করেছিলাম। একঘরে ছজনে কিছুদিন থেকেছি। অন্তরঙ্গতা হয়েছিলো। মেনন আমাকে সব খুলে বলেছিলো। ও চিঠিতে কি লিখেছিলো তা পর্যন্ত বলেছিলো।

## ॥ এগার ॥

কান্থুর ইন্সপেকশন্ বাংলোতে বসে কথা হচ্ছিলো সার্কেল অফিসার তরফদারের সঙ্গে। তরফদার একটার পর একটা সিগারেট শেষ করে যাচ্ছিলো। আর শোনাচ্ছিলো নেফা কাহিনী। পাশে বসেছিলো মিসেস্ তরফদার। তরফদার পরিবারের সঙ্গে পাশিঘাটে আলাপ। তরফদার পাশিঘাটের পর নেফার অনেক স্থান ঘুরে সম্প্রতি কান্থুতে বদলি হয়েছে। ওরা স্বামী-স্ত্রীতে কান্থু পরিদর্শন করবার নিমন্ত্রণ জানিয়েছিলো। নিমন্ত্রণ রক্ষা করতে কান্থুতে আসা। নেফাতে সিয়াং ডিভিসানের প্রধান শহর আলং। আলং ছাড়িয়ে উত্তরে টুটিং, গেলিং, টাবাসোরা আর কান্থু। তারপর যে সমস্ত জমি রয়েছে তার অনেক স্থানের জরিপ হয়নি। অনেক স্থানে সভ্য জগতের মানুষের পা পড়েছে কিনা সন্দেহ। পাহাড় আর পাহাড়। দশ-বারো হাজার ফিটের ওপরে সব পাহাড়। পাহাড়ী নদীগুলো উল্লস্তু, উদ্দাম। সিয়ম, সিমেন, সিবু, সিডো। আরো কতো নদী রয়েছে। তরফদার সিয়ম, সিমেন আর সিবুর তীরে তীরে জরিপ করে বেড়ায়। অর্কিডের সন্ধান করে। তিব্বত থেকে সেসময় প্রচুর আফিং-এর চোরাই চালান চলছিলো। সেসব বন্ধ করারও চেষ্টা করছিলো আমাদের তরফদার। তরফদারের প্রচুর সাহস। অদম্য উৎসাহ। আজ চৌদ্দ বছর ধরে তরফদার নেফা সার্ভিসে রয়েছে। অনেক সাহস সঞ্চয় করে, অনেক আশায় বুক বেঁধে, পিতৃআজ্ঞা লঙ্ঘন করে, ছুঁদাস্তু গ্র্যাডভেশ্বারের আকাজক্ষা নিয়ে সে ঢুকেছিলো নেফা সার্ভিসে। নেফাতে ঘুরতে ঘুরতে আজ সে ক্লাস্ত, শ্রান্ত। তরফদার কামেং ডিভিসানের বৃড়গাঁও আর বম্‌ডিলাতে ছিলো। বম্‌ডিলা ন হাজার ফিট উঁচু। তারপর টোয়াং। টোয়াং-এর কাছাকাছি অঞ্চলের বরফের ওপর তরফদার বিরাট বিরাট সব পায়ের ছাপ দেখেছিলো। সেখানে নহা ডাকবাংলোর বারান্দার জানালায় দাঁড়িয়ে সন্ধ্যার অন্ধকারে মিসেস্ তরফদার যে বীভৎস মুখখানা দেখেছিলো সে মুখের মালিকের পায়ের ছাপই কি বরফের



ওপর পড়েছিলো ? একি সেই অনেক আলোচিত তুষারমানব, নাকি এ সাধারণ মানুষের পদচিহ্ন ! বরফ গলে গলে পায়ের ছাপ বৃহদাকার ধারণ করেছিলো । পদচিহ্নের মালিকের খোঁজে অনুসন্ধান চালিয়ে তরফদার তিব্বতের দিকে চলে গিয়েছিলো । কিন্তু কোনো হৃদিসই সে করতে পারেনি । মিসেস্ তরফদার সেদিন ভয় পেয়ে অস্ত্রান হয়ে গিয়েছিলো এবং তারপর থেকেই মিসেসের ওই ফিটের অস্ত্রখটা ভালো ভাবে জাঁকিয়ে বসেছে । অল্প ভয় পেলেই মিসেস্ তরফদার ফিট হয় । আর ফিট হলেই শরীরটা বেঁকে যায় । মুখ দিয়ে ফেনা গড়ায় । তরফদার ওকে কামেং ডিভিসানের টোয়াং মনস্টারির লামার কাছে নিয়ে গিয়েছিলো । লামার নাকি অদ্ভুত সব ক্ষমতা রয়েছে । কিন্তু কোনো ফল পাওয়া যায়নি । তরফদারের অভিজ্ঞতা কতো । চৌদ্দ হাজার ফিট উঁচু সেলা পাস্ সে অতিক্রম করেছে । টোয়াং-এর লাইব্রেরীতে বসে বৌদ্ধ ভিক্ষুকের সঙ্গে সে ধর্মালোচনা করেছে । নিজে সে মন্থপাসদের সঙ্গে সজ্জিত হয়ে বৌদ্ধধর্মাবলম্বী শেরডুক পেন্স আর মন্থপাসদের সঙ্গে ঘুরেছে । শেরডুক পেন্স আর মন্থপাসরা সাত হাজার থেকে সতেরো হাজার ফুট ওপরে বাস করে । কস্তুরী, কস্থল, চামরী গাই-এর লোমের চাদর, কাঠের নানারকম জিনিস আর পাথরের মালা তারা কেনাবেচা করে ।

তরফদার কান্থর বাংলোতে বসে আমাকে টিরাপের গল্প শুনিয়েছে । কোথায় কামেং আর কোথায় টিরাপ । টিরাপের সীমান্ত ব্রহ্মদেশের সীমান্তের সঙ্গে মিশেছে । তরফদার টিরাপে ছিলো । টিরাপের খোন্সাতে ছিলো । খোন্সা, চ্যাংলাং, লোন্কাও, সেলুয়া, লঙ্ ফঙ্ । অরণ্য আর অরণ্য । অতুর্বর, ধূসর, দুর্গম সব পাহাড় । টিরাপ অঞ্চলে একসময় হেড হাল্টিং, দাসব্যবসা, বাচ্চা-চুরি, আফিং-এর চোরাকারবার প্রভৃতি ছিলো অতি সাধারণ ব্যাপার । এক গ্রাম অতিক্রান্তে আর এক গ্রামকে আক্রমণ করে কচ্ কচ্ করে মাথা কেটে নিয়ে যেতো । যে যতো কাঁচা মাথার অধিকারী গ্রামে তার ততো প্রতাপ । হরিলুটের বাতাসার

মতো কাঁচা মাথার জগে কাড়াকাড়ি পড়ে যেতো। ভারত সরকার অনেক চেষ্টা করে মাথা কালেকশানের রেওয়াজটা বন্ধ করেছে। কড়া শাসন চালু করেছে। আইন আদালতের হুমকি দিয়ে সব বন্ধ করবার চেষ্টা করেছে। উৎসবের দিনে তাই মাটি দিয়ে তৈরী মানুষের দেহ থেকে মুণ্ডু বিচ্ছিন্ন করার রেওয়াজটা রয়ে গেছে। তারা কাঠ আর মাটি দিয়ে তৈরী মানুষের মাথা গলায় ঝুলিয়ে বেড়ায়। পুরানো দিনের কুসংস্কার দূর হতে সময় নেবে। তরফদার বলে আর মুছ মুছ হাসে। সে অনেকদিন আগেকার কথা। আমাদের দেশে যেমন বাচ্চা ছেলেমেয়েদের ঘুম পাড়াবার জগে বর্গীর ভয় দেখানো হতো তেমনি অনেকদিন আগে অসমীয়া মা বাচ্চা ছেলেমেয়েকে ঘুম পাড়াতে গিয়ে বলতো রাংপা আসবে। খোকা ঘুমো। রাংপার দল ব্রহ্ম সীমান্তে পাটকই পাহাড়ের কোণে কোণে বাস করতো। আর সুর্যোগ পেলেই প্লেন্সের লোকদের ওপর ঝাঁপিয়ে পড়ে রক্তগঙ্গা বইয়ে দিতো।

—“ওখানে কি কি জাত রয়েছে?” আমি প্রশ্ন করি।

—“ওয়াং চু, নস্তাস্, ট্যাংসাম্, সিংফোস্। বছর কয়েক আগে আমার টিরাপে পোস্টিং হয়েছিলো। ছিলাম খোনসাতে। একটা বিরোধের মীমাংসার জগে অনেকটা অভ্যস্তরে ঢুকতে হয়েছিলো। সঙ্গে অবশ্য বন্দুকধারী পুলিশ ছিলো। ওয়াং চুস্ ট্রাইবের লোক নক্টেট্রাইবের কয়েকটা লোকের মাথা কেটে নিয়ে গেছে। কটকী বা দোভাষীর মাধ্যমে আলাপ আলোচনা চালাচ্ছি।” তরফদার গল্প শোনায়। কাথুর বাংলাতে বসে তরফদারের গল্প শুনছিলাম। বসে রয়েছি সিয়াং ডিভিসানের কাথুতে। শুনছিলাম কিন্তু টিরাপের কাহিনী।

তরফদার বলে যাচ্ছে—“কটকীর মারফৎ নক্টেট্রাইবের লোকদের জানানো হলো সান্ধী-সাবুদ যোগাড় করতে। বিচার করতে হবে। ওরা শুনে হেসে গড়িয়ে পড়ে। পোকা খাওয়া দাঁত বের করে হাসে। বলে এ আবার কি কথা। এতো পরিশ্রম কে করতে যাবে। আর এতো পরিশ্রম করবার সময় কোথায়। তাদের গ্রামে উৎসব রয়েছে। নকল

যুদ্ধের মহড়া দিতে হবে। লোকদের মাথা পাওয়া যায়নি, দেহ তো পাওয়া গেছে। শরীরের জন্তে মুণ্ডুর দরকার, তা মুণ্ডু এনে দিলেই হবে। ছপুরের দিকে তাঁবুর আশেপাশে একটা গোলমাল। ওদের ঠেকিয়ে রাখা যায়নি। টেবিলের ওপর ঠিক আমার স্টাইলের ওপর সত্কাটা রক্তাক্ত ছোটো মাথা ওরা এনে ফেলেছে। সাহেবকে কথা দিয়েছে। ধড়ের জন্ত মুণ্ডুর দরকার। ধড় থেকে বিচ্ছিন্ন মাথা ছোটো সাজিয়ে রেখে ক্রমাগত আমাকে সেলাম জানাতে থাকে। বুঝে দেখো আমার অবস্থা।”

—“কি সাংঘাতিক কথা!” বলি আমি।

তরফদার সিগারেট টানছিলো আর গল্প বলে যাচ্ছিলো। বাংলোর বারান্দায় নীচু হয়ে বসে একটা লোক পাখার দড়ি টেনে যাচ্ছিলো। লোকটার কোমর থেকে একফালি কাপড় বুলছে। প্রায় নগ্নই বলা চলে। লোকটা হঠাৎ পাখার দড়ি টানা বন্ধ করে। তারপর উঠে এসে তরফদারের পায়ের ওপর হুমড়ি খেয়ে পড়ে। ইনিয়িং বিনিয়িং কাঁদতে থাকে আর কি যেন সব বলে চলে। তরফদার হাত ধরে ওকে টেনে তোলে। ওর ভাষাতে ওকে কি যেন বোঝাতে থাকে। কি যে বুঝিয়েছিলো বলতে পারবো না। তবে লোকটা আবার স্বস্থানে ফিরে গিয়ে দড়ি টানতে শুরু করে। লোকটার দৃষ্টি মাটির দিকে নিবদ্ধ। মনে হয় যেন ঝিমোচ্ছে। তরফদারকে লোকটা সম্বন্ধে জিজ্ঞাসা করি। তরফদার যা বলেছিলো তার সারমর্ম শোনাচ্ছি। লোকটার নাম তোলো কাছ। অনেকদিন অগ্নের কাছে থেকেছে। থেকেছে দাস হয়ে। গালংদের দুই ট্রাইবের ভেতর সংঘর্ষের ফলে বেচারি বন্দী হয়। আর বন্দী অবস্থায় ওকে ক্রয়-বিক্রয়ের চৌকাঠ বারকয়েক অতিক্রম করতে হয়েছে। একজন ওকে কিনে কিছুদিন তার কাছে রেখে পরে অগ্নের কাছে চড়াদামে বিক্রী করেছে। দাস আখ্যা নিয়ে বেশ কয়েকবার সে হাতবদল হয়েছে। ইয়ামসা, ইয়াকিং, কাঙ্গু অনেক স্থানে অনেক প্রভুর সেবা তাকে করতে হয়েছে। দুঃখকষ্ট গেছে অনেক। সহ্য করতে হয়েছে অনেক ঝড়ঝাপটা।

সামান্য সামান্য জিনিসের পরিবর্তে হাতবদল হয়েছে। আমার

খালা, ঘাটি, বাটি, মিথোন। ঐসব জিনিসের পরিবর্তে এক এক প্রভু তাকে পেয়েছে। পরে বেচে দিয়েছে। সর্বশেষ তরফদার সরকারের তরফ থেকে গিয়ে টাকা দিয়ে তাকে কিনে মুক্তি দিয়েছে। তোলো কাছ এখন স্বাধীন মানুষ। আফিং খাবার অভ্যাসটা অবশ্য ওর এখনো গেলো না। তরফদার অনেক চেষ্টা করেছে যাতে ও আফিং ছেড়ে দেয়। কিছু করতে পারেনি। আফিং খেয়ে ও সারাটা দিন বিমোয়। শক্তি-সামর্থ্য বলতে ওর আর কিছু নেই। সব যেতে বসেছে। তোলো কাছ যে মেয়েটিকে বিয়ে করেছে, সে মেয়ের ওপর তার অত্যাচার ভাই-এর পুরো যৌন অধিকার রয়েছে। বিয়ে করেছে তোলো কাছ।

ভাইদের ঔরসে যেসব ছেলেমেয়ে হয়েছে বা হবে তাদের সমস্ত দায়িত্ব তোলো কাছুর। এটাই নিয়ম। আর তোলো কাছুর এতে আপত্তিও নেই। আপত্তি শুধু একটি ব্যাপারে। সম্প্রতি তার বউ চার ভাই-এর এক ভাই-এর সঙ্গে বেশীকম ফণ্ডিনশ্টি শুরু করেছে। ছেলেটার সঙ্গে মেয়েটি ছুবার পালিয়েছিলো। অনেক কষ্ট করে তাকে ধরে আনা হয়েছে। তোলো কাছ এসে তরফদারকে ধরেছে। হুজুরের একটা আদেশ হলে মেয়েটা আর পালাতে সাহস পাবে না। তাছাড়া ভাইটাকে যদি সাহেব একটু শায়েস্তা করে। তার বিশ্বাস সাহেব সব পারে। সাহেবের ওপর তার অগাধ বিশ্বাস। তোলো কাছ বউকে নিয়ে পাশিঘাটের কাছাকাছি ছিলো। তখন জিমি দেবতার কাছে মানত করেছে। পিরকু অপদেবতাকে অনেক ডেকেছে। তোলো কাছ সম্বন্ধে তরফদার এক আশ্চর্য কাহিনী শোনালো। তোলো কাছ সিবু নদীর ধারে জঙ্গলে কাঠ কাটতে গিয়েছিলো। কাঠ কাটার সময় ওকে সাপে কাটে। কিছুতেই ওকে বাঁচানো সম্ভব হয় না। সঙ্গের লোকটা তোলো কাছুর মৃতদেহটা জঙ্গলে ফেলে গ্রামের লোকদের খবর দিতে ছোট্টে। লোকজন সঙ্গে নিয়ে সে যখন ঘটনাস্থলে গিয়ে উপস্থিত হয় তখন এক আশ্চর্য ব্যাপার দেখতে পায়। যে তোলো বিধে জর্জরিত হয়ে নীলবর্ণ হয়ে মরে পড়েছিলো সেই তোলো কাছ উঠে বসেছে।

তার শরীরে নীল ভাবটা আর তেমন নেই। তার আশেপাশে কয়েক হাজার জেঁক মরে পড়ে আছে। বিষটা বোধ হয় ওরা রক্তের সঙ্গে নিজেদের দেহে টেনে নিয়েছিলো। কাছ প্রাণ ফিরে পেয়েছে। আর জেঁকেরা দলে দলে মরেছে। বাঁচিয়ে দিয়েছে তোলোকে। তরফদার খবর পেয়ে ছুটে গিয়েছিলো। রোগীকে সে যথাসম্ভব তাড়াতাড়ি করে আলাং এবং পরে পাশিঘাটের হাসপাতালে পাঠিয়ে দেয়। তোলো কাছ বেঁচে যায় এবং সেই থেকে সে তরফদারের বিশেষ ভক্ত।

তরফদারের গল্প শুনছিলাম। হঠাৎ গগনভেদী এক চীৎকার। বাংলোর আশেপাশে সন্ধ্যার অন্ধকার নেমে এসেছে। আলো-আঁধারের খেলা চলেছে। তরফদার বিজ্ঞবেগে চেয়ার ছেড়ে উঠে দাঁড়ায় এবং পরমুহূর্তে দৌড়ায়। পেছনে আমি। যা আশঙ্কা করা গিয়েছিলো। মিসেস্ তরফদার বাথরুমের পাশে বারান্দায় পড়ে রয়েছে। মিসেস্ তরফদার অজ্ঞান হয়ে গেছে। সেই ফিটের ব্যারাম। মুখ থেকে ফেনা গড়াচ্ছে। তার মুখে-চোখে জল ছিটোবার পর মিসেস্ তরফদার চোখ মেলে তাকায়। মুখে-চোখে কিরকম একটা আতঙ্কের ভাব। মিসেস্ তরফদার ভয় পেয়েছিলো। এবং ভয় পেয়েই অজ্ঞান হয়েছিলো। এখনো সে ভাবটা রয়েছে। সে আঙুল দিয়ে বাথরুমের জানালাটা দেখিয়ে দেয়। তরফদার লাফ দিয়ে বারান্দা থেকে নেমে বাগানের দিকে দৌড়ায়। বাংলোর সঙ্গে বিশাল বাগান। অজস্র গাছপালা। অনেক রকম ফুলের গাছ। তরফদারের পেছন পেছন আমিও এগিয়ে যাই। বাগানের ভেতর তরফদার যাকে পেয়েছিলো তাকে দেখলাম। তরফদার আগে থেকেই চেনে।—“ও তুমি!” বলে তরফদার।

লোকটা কোনো উত্তর দেয় না।

—“বাংলোর দিকে গিয়েছিলে কেন!” প্রশ্ন করে তরফদার।

—“তোমার খোঁজে। তোমাকে পেলাম না। তাই আবার এখানে ফিরে এসেছি।” লোকটা জবাব দেয়।

তরফদার আলাপ করিয়ে দেয়। ওর নাম কারছ টাইপোদিয়া।

তাহলে টাইপোদিয়া বাংলোর বারান্দায় উঠেছিলো। বাথরুমের জানালা থেকে সন্ধ্যার অন্ধকারে মিসেস তরফদার ওর মুখই দেখেছিলো। দেখে ভয় পায় এবং ভয় পেয়ে অজ্ঞান হয়ে যায়।

কারছ টাইপোদিয়ার ভয় পাওয়ার মতো চেহারাই বটে। লোকটা কেমন পাগলাটে ধরনের। গায়ের রং ফরসা। বিরোট একটা মাথা। মনে হয় একটা ফরসা গরিলার মুখ বসিয়ে দিয়েছে। ছোট ছোট চোখ। চ্যাপটা নাক। নাকের ওপর একটা রূপালী ফ্রেমের চশমা। মুখে দাড়ি-গোফের বালাই নেই। সামনে দুটো দাঁত নেই। সব চেয়ে মারাত্মক হলো কারছ টাইপোদিয়ার হাসি। হাসির সঙ্গে কেমন যেন একটা বিক্রমের ভাব মিশে রয়েছে। আর চোখ দুটো সর্বক্ষণ রক্তবর্ণ।

তরফদার জানায় কারছ এ অঞ্চলের খুব প্রভাবশালী লোক। সে কাঠের ব্যবসা করে প্রচুর টাকা করেছে। কারছ আলং তার পাশিঘাটে কাঠ চালান দেয়। এছাড়া জঙ্গলের ভেতর পাহাড় পর্বত উড়িয়ে দিয়ে সি. পি. ডবলু. ডির ইঞ্জিনিয়ারেরা যখন পথঘাট তৈরী করে, কারছ তখন মজদুর যোগাড় করে এনে দেয়। ট্রাইবের লোকদের ওপর কারছের ভীষণ প্রভাব।

—“ওর একসময় অনেক টাকা ছিলো। এখন তেমন নেই।” বলে তরফদার।

কারছ নীচু হয়ে ততক্ষণে গাছের গুঁড়ি আর আশেপাশের জমি পরখ করছে। আমাদের দিকে তাকিয়েও দেখছে না। আশেপাশের মাটিতে ঘন ঘন কুড়ুল চালাচ্ছে।

—“এখন টাকা নেই কেন?” প্রশ্ন করি।

—“নেকাতে ব্যাঙ্ক নেই। যে ছোট পোস্ট অফিস রয়েছে তা কান্থুর অরণ্য থেকে বহুদূরে। ছুদিনের পথ। কারছের পোস্ট অফিসের ওপর খুব বিশ্বাসও ছিলো না। সমস্ত টাকা সে মাটির তলায় পুঁতে রেখেছিলো। সমস্ত টাকা জঙ্গলের ভেতর লুকিয়ে রেখেছিলো। লুকিয়ে রেখেছিলো গাছের নীচে, নদীর তীরে, মাটির তলায় আর

পাহাড়ের গুহায়। বিভিন্ন স্থানে টাইপোদিয়া তার অর্থ লুকিয়ে রেখেছিলো।”

—“সেসব টাকা বুঝি খুঁজে পায়নি?”

—“না। কিছু পেলেও পেতে পারে। বেশীর ভাগই পায়নি। টাইফয়েড রোগে ওর মাথাটা খারাপ হয়ে গেলো। টাকা কোথায় রেখেছিলো স্মৃষ্ হবার পর সব ভুলে বসে রইলো।”

—“তারপর?” আমি প্রশ্ন করি।

—“সেইজন্মে গুপ্তধনের সন্ধান অনবরত চালিয়ে যাচ্ছে কারতু টাইপোদিয়া। তাই টাইপোদিয়াকে বেশীর ভাগ সময় কুড়ুল হাতে নিয়ে মাটি খুঁড়ে খুঁড়ে পরীক্ষা করতে দেখা যায়। আজকেও এসেছিলো বাংলোর আশেপাশের জমি পরীক্ষা করে দেখবার জন্মে। তারপর কি মনে হয়েছে বারান্দায় উঠে পড়েছে আমার সঙ্গে দেখা করবার আশায়। আর ওকে দেখেই শ্রীমতী মুছাঁ গেছে।”

কারতু টাইপোদিয়া নীচু হয়ে একটা গাছের গুঁড়ি পরীক্ষা করছে। কোনো কিছুর সন্ধান পেলো কিনা কে জানে। ছ’চারটে লাল পিঁপড়ে টিপে টিপে সে মারছে। কার ওপর আক্রোশ কে জানে। হঠাৎ কি মনে হতে সে ঘুরে দাঁড়ায়, তারপর সোজা আমাদের দিকে চলে আসে। তরফদার পরিচয় করিয়ে দেয়। নেফাতে ছেলে পড়াতে এসেছি শুনে কারতু টাইপোদিয়া হেসেছিলো। হাসি শুনে আমার অন্তরাঝা জল হয়ে গিয়েছিলো। মনে হয় একটা গরিলাই যেন হাসছে।

—“কি জানিস নেফার যে ছেলে পড়াতে এসেছিস? জানিস কিছু?”

—“তুই” “তুই” করে বলাটা টাইপোদিয়ার অভ্যেস হয়ে গেছে। স্বীকার করতে হয় কিছুই জানিনে।

—“তোরা সব বিশ্বাসঘাতক। প্লেন্সের লোকদের নেফাতে ঢুকতে না দেওয়াই উচিত। আর সে নিয়ম যাতে চালু থাকে সে ব্যবস্থাই আমি করবো। তোরা সব বডো নেমকহারাম। বড়পুজারী তিন-

শুকিয়া থেকে ছুটো সাহেবকে নিয়ে এলো। ১৯৫০ সালের ভূমিকম্পের আগে আসামের ডিব্রুগড় আর তিনশুকিয়ায় গালংদের যাতায়াত ছিলো। কিরুকে গিয়েছিলাম। কিরুক মানে তোরা যাকে শিকার বলিস তাতেই গিয়েছিলাম। হৈ-হল্লা, নাচ, গান। বড়পূজারীটা এতো মদ খাওয়ালো আমাকে! কোনো হুঁশই ছিলো না। কোমরের থলি থেকে সব টাকা বের করে বড়পূজারী পালালো। অনেক টাকা। সব টাকা নিয়ে গা ঢাকা দিলে।”

—“তোমার টাকা চুরি করলে?” বলি আমি।

—“তবে আর বলছি কি! তোরা বড্ডো বিশ্বাসঘাতক। বড়পূজারীকে বড্ডো বিশ্বাস করেছিলাম, দোস্তু বলে ডেকেছিলাম। পরের বছর ডিব্রুগড়ের বাজারে ওকে দেখেছিলাম। সওদা করতে ডিব্রুগড় গিয়েছিলাম। পায়ে হেঁটেই গিয়েছিলাম। ওকে দেখলাম। ধরতে পারলাম না। পালিয়ে গেলো। নেফার অরণ্য হলে, কান্থুর জঙ্গল হলে ওকে ধরে মুণ্ডুটা খড় থেকে টেনে আলাগা করতাম।” কারছ টাইপোদিয়া দাঁত দিয়ে ঠোট চেপে ধরে। আক্রোশে সে ফুলছে। তার ঘন ঘন নিঃশ্বাস পড়ছে। কপালের শিরাগুলো ফুলে উঠেছে। কয়েকটা লাল পিঁপড়ে নিয়ে হাতের তেলোতে রেখে সে টিপে টিপে মারে। তারপর সেই প্রাণ-চমকানো হাসি। ও আমার দিকে তাকাতেই বুকটা কেঁপে ওঠে। মিসেস্ তরফদারের ভয় পাওয়ার কারণটা আমি সহজেই বুঝতে পারি।

॥ বারো ॥

কান্থুর জঙ্গলে সে রাতটা চিরদিনমনে থাকবে। ভয়ঙ্কর, ভীষণ সে রাত। বিরাট বিরাট সব গাছ। প্রেতের মতো দাঁড়িয়ে আছে। হাওয়া নেই মোটেও। গাছের পাতা নড়ে না। ডালের ওপর দিয়ে প্রকাণ্ড সব অজগর মোচড়াতে মোচড়াতে এগিয়ে যায়। ডোরাকাটা বাঘ



নিঃশব্দ চরণে ঘোরাফেরা করে। কান্থুর জঙ্গলে সে রাত আমার মনে চিরদিনের জগ্নু স্থায়ী আসন পেতেছে। বাঁশের তৈরী কুঁড়েঘর। আমার সঙ্গে রয়েছে তরফদার আর কারছ টাইপোদিয়া। কারছ টাইপোদিয়ার চেপ্টা নাক, মঙ্গোলিয়ান ফিচার্স। চোখের দৃষ্টিটা কেমন যেন অদ্ভুত। অন্তরাআ কঁপিয়ে ছাড়ে। আর ও যখন হাসে তখন সত্যি কেমন যেন ভয়-ভয় করে। ও অঞ্চলে কারছ টাইপোদিয়ার অসাধারণ প্রতিপত্তি। ট্রাইবদের লোকেরা ওকে সম্মান দেখায়, সমীহ করে চলে। কারছ টাইপোদিয়ার অনেক কথা আমি হেসে উড়িয়ে দিয়েছিলাম। বিশ্বাসের চেয়ে অবিশ্বাসের ভাবটা আমার মনে অনেক বেশিমানায় ছিলো। কারছ টাইপোদিয়ার বোধ হয় সেটা পছন্দ হয়নি, বিশেষ করে স্থানীয় অধিবাসীদের কাছে বোধ করি তার মাথা হেঁট হয়েছিলো।

তাই সে আমাকে আর তরফদারকে কান্থুর ভয়ঙ্কর অরণ্যে এনে হাজির করেছিলো। কান্থুর অরণ্য নির্জন বাঁশের ঘরে এনে হাজির করেছিলো। পুরোহিত মন্ত্র পাঠ করে মৃত ব্যক্তিদের আত্মা পৃথিবীর মাটিতে নামিয়ে আনবে আর তাই দেখার জগ্গে আমাদের নিয়ে আসা হয়েছে। টাইপোদিয়া তার প্রতাপ, প্রতিপত্তি, শক্তির অবমাননা দেখতে রাজা নয়। সেই নির্জন প্রান্তরে আরো দু'ব্যক্তিকে আনা হয়েছে। তারা হলো তোলো কাছ আর তার জ্বী। বাঁশের ঘরের পাশে খানিকটা খোলা জায়গা। সেখানে একরাশ কাঠ। লতাপাতা পুড়ছে। খানিকটা স্থান সেই আগুনের আভায়ে আলোকিত হয়েছে। তোলো কাছুর জ্বী মাটিতে বসে রয়েছে। তাকে ধরে রয়েছে তোলো কাছ। তোলো কাছুরা পাঁচ ভাই। পাঁচ ভাই-এর ওই এক জ্বী। বিয়ে করেছে তোলো কাছ, কিন্তু অগ্ন চার ভাই-এর তার জ্বীর ওপর পুরো অধিকার। কিন্তু সমস্তটা বিয়ের ব্যাপার নিয়ে নয়। মেয়েটি সম্প্রতি তোলো কাছুর একটা ভাই-এর সঙ্গে ঘন ঘন পালাচ্ছে। মেয়েটাকে শায়েস্তা করবার জগ্গে এখানে সমস্ত রকম

আয়োজন করা হয়েছে। পূজা করে মৃত পূর্বপুরুষদের আত্মাদের এখানে আনা হবে।

তোলো কাছুর পূর্বপুরুষদের আত্মারা এসে ওর স্ত্রীকে শায়েস্তা করবে। তোলো কাছুর সেই পাজী ভাইটাকে শাস্তি দেবে। আত্মারা এক এক করে এসে কাঙ্গুর অরণ্যে জড়ো হবে। সিয়াং ডিভিসানের উত্তরে আলং। আলং সিয়াং ডিভিসানের হেড কোয়ার্টার্স। কাঙ্গু বনভূমির ওধারে অনেক জমি জরিপ হয়নি। দুর্গম, দুর্ভেদ্য। সভ্য জগৎ সেখানকার খবর পুরোপুরি রাখে না।

ম্যাজিসিয়ান্ ইবো মাটিতে গড়াগড়ি দিচ্ছে। আহ্বান করছে ওমা ইউকে। মাথায়, মুখে, দেহে ইবো মুঠো মুঠো ধুলোবাণি ছড়াচ্ছে। ইবোই আত্মাদের আনবে। ইবো ঘন ঘন মন্ত্রপাঠ করছে। কাঙ্গুর জঙ্গলে সন্ধ্যাটা কিরকম অস্বস্তিকর। ইবো চেষ্টা চেষ্টা ওমা ইউকে ডাকছে। মন্ত্র পড়ে চারধারে চাল ছড়াচ্ছে। চাল ছড়াচ্ছে তোলো কাছু তার স্ত্রীর চারধারে। মাঝে মাঝে সে চীৎকার করে উঠছে—‘ইয়া’, ‘ইয়া’, ‘ইয়া’!

তোলো কাছুর পূর্বপুরুষদের আত্মাদের তৃপ্ত করতে হবে। একটা মিথোন কেটে তার রক্ত ইবো মাথায় মুখে মেখেছে। সে আপঙ খেয়েছে প্রচুর। সুরা-আধিক্যে চোখ দুটো তার রক্তিম। মৃত কুকুরের পেটে চাল পুরে রাখা হয়েছে। কুকুরটাকে আগুনে ঝলাসিয়ে আত্মাদের উদ্দেশ্যে নিবেদন করা হবে। অতৃপ্ত আত্মারা নেমে আসবে কাঙ্গুর জঙ্গলে। আত্মার দল যারা সন্তান দেয়, আবার সন্তানকেড়ে নেয়। যারা জমিতে ফসল দেয়, আবার মাটি পুড়িয়ে খাক করে ছাড়ে। এরাই শিকারকে ভুলিয়ে ফাঁদে ফেলে। তারপর ধীরে ধীরে রক্ত চুষে খায়।

—‘ইয়া’, ‘ইয়া’, ‘ইয়া’, ‘ইয়া’! সে চীৎকারে কাঙ্গুর অরণ্য কেঁপে কেঁপে ওঠে। বাঘের দল বুঝি গর্জন করতে ভুলে গেছে। ফেউ আর শেয়ালের দল ভয় পেয়ে পালিয়েছে। চারদিকে আগুনের আভায়ে লাল হয়ে উঠেছে।

মিথোনের রক্ত মেখে ইবোর মুখখানা ভয়ঙ্কর হয়ে উঠেছে। শুকনো পাতার ওপর দিয়ে শব্দ তুলে সরীসৃপেরা চলে যাচ্ছে। আগুনের তাপে বনভূমি উষ্ণ হয়ে উঠেছে। পশু, পাখী, সরীসৃপ সবাই কিরকম চঞ্চল হয়ে উঠেছে। অরণ্যের এক প্রান্ত থেকে অন্য় প্রান্তে তারা পালিয়ে বাঁচতে চায়। ইবো সব পারে। আত্মারা শুধুমাত্র তার কথা শোনে। আর কারু কথা তারা শোনে না। গাছটা এতো জোরে ছলছে কেন? মেয়েটা মাটিতে পড়ে গড়াচ্ছে। তার মুখ দিয়ে ফেনা গড়াচ্ছে। তা হলে আত্মারা এসে ওর ওপর ভর করলো। তোলো কাছ থর থর করে কাঁপছে।

কারু টাইপোদিয়া কিরকম বিশ্রীভাবে তাকাচ্ছে। তার মুখে একটা পৈশাচিক হাসি। মনে হচ্ছিলো আমার শিরদাঁড়া বেয়ে ঠাণ্ডা বরফগলা জলের স্রোত নেমে যাচ্ছে। তরফদারও ভয় পেয়েছে বলে মনে হচ্ছে। কাপম বাড়ু স্বপ্ন দেখলো যে সে শিকার করতে গিয়ে পা ভেঙ্গে ফেলেছে। ঘুম ভাঙতেই সে ছুটলো ইবোর কাছে। ইবোই তাকে বলে দিলো তার স্ত্রী খুব শীগগীর মারা যাবে। আর সত্যি তো সাপের কামড়ে তার স্ত্রী অল্পদিনের ভেতর মারা পড়লো।

ইবো ডাকছে জিমিকে। জিমি যে এ পৃথিবী সৃষ্টি করেছে। ইবো ডাকে ডাইনি পোলোকে। ডাইনি পোলো যে তাপ আর আলোর কর্তা। ইবো ডাকছে পিঙ্কু-পিন্টেকে। শস্যক্ষেত রক্ষা করবার ভার যার ওপর। ইবো ডাকছে চুতে গামতেকে। গৃহরক্ষার কর্তা চুতে গামতে। গৃহস্বামীকে সে সর্ব বিষয়ে রক্ষা করে। ইবো ঘন ঘন মন্ত্রপাঠ করছে। মেয়েটা থর থর করে কাঁপছে। তার পালাবার অধিকার নেই। পাঁচ ভাই-এর ওই এক স্ত্রী। যদিও তোলো কাছ মেয়েটিকে বিয়ে করেছে, কিন্তু পাঁচ ভাই-এর সন্তান সে গর্ভে ধারণ করবে। অন্য় ভাইদের বঞ্চিত করে এক ভাইকে সে প্রাধান্য দিতে পারে না। এ তার মন্ত বড়ো অপরাধ। আর এই অপরাধের বিচার করবে আত্মার দল। যাদের জন্তে বাঁশের ঘরের পাশে গাছের ডালে দড়ি বেঁধে মাংস ঝুলিয়ে দেওয়া হয়েছে। ইবো হাত-পা তুলে নাচছে,

চেষ্টাচ্ছে। ইয়াসী বা মৃতের আত্মা এসে মাংস নিয়ে যাবে। দড়ি টেনে মাংস ওপরে তুলবে আর সেই মাংস খেয়ে আত্মারা পরিতৃপ্ত হবে। সত্যি তো দড়িটা ওপরে একটু একটু করে উঠে যাচ্ছে! আশুনের আলোতে দেখা যাচ্ছে দড়ি ওপরে একটু একটু করে উঠছে। উঠছে আর উঠছে। তাহলে নেমে এলো আত্মারা। সত্যি সত্যি নেমে এলো। আমি বিস্মিত বিমূঢ়। তরফদারের মুখে কথা নেই। মেয়েটা গোড়াচ্ছে, তার মুখ থেকে ফেনা গড়াচ্ছে। ইবো পাগলের মতো নাচছে। চীৎকার করছে—‘ইয়া’, ‘ইয়া’, ‘ইয়া’। কারছ টাইপো-দিয়ার জন্ম ঘুরে তাকালাম। তাকে কোথাও দেখতে পেলাম না। কোথায় টাইপোদিয়া? তরফদার চীৎকার করে টাইপোদিয়ার নাম ধরে ডাকতে থাকে। না, নেই সে। আশেপাশে কোথাও সে নেই। হঠাৎ একটা গগনভেদী চীৎকার। আর সঙ্গে সঙ্গে গাছের ডালের ওপর একটা ছটোপুটির শব্দ। আমরা কিছু বুঝবার আগেই ধপাস্ করে একটা কিছু মাটিতে এসে পড়ে। আমরা দুজনে এগিয়ে যাই। এ কি! কারছ টাইপোদিয়ার প্রাণহীন দেহটা মাটিতে পড়ে আছে। হাত আর গলায় গভীর ক্ষতের চিহ্ন। ভীষণভাবে রক্ত ঝরছে। ওমা ইউ দড়ির মাংস ছেড়ে কারছ টাইপোদিয়াকে ধরলে শেষ পর্যন্ত। গাছ থেকে চিতাবাঘটার নেমে যাওয়া তরফদারের চোখ এড়ায়নি। ইবো তখনো মাতাল। আপড্ খেয়ে সে টলছে আর ‘ইয়া’ ‘ইয়া’ ‘ইয়া’ করে ক্রমাগত চীৎকার করে চলেছে। কান্থুর জঙ্কলে কারছ টাইপোদিয়া আর কোনোদিন ফিরে আসবে না। সে আর আত্মাদের পৃথিবীর মাটিতে নামিয়ে আনবার চেষ্টা করবে না। সে বোধ করি এতক্ষণে মৃত আত্মীয়দের আত্মার সঙ্গে মিতালি পাতিয়েছে।

## ॥ তেরো ॥

ওমি ময়াং আর নেনী ময়াং-এর দিনগুলো ভালোই কাটছিলো। শুধু স্বপ্ন আর স্বপ্ন। ছুরাকরণের জলে নেনী ছোট ছোট হুড়ি ছুঁড়ে দেয়। জল ছলকে ওঠে। ওমির ধমনীর রক্ত দ্রুত হয়। ছুরাকরণের জলে প্রবল শ্রোত। মাঝে মাঝে ঘূর্ণী রয়েছে। কিছু পড়ামাত্র চোখের পলকে ভাসিয়ে নিয়ে যায়। ছুরাকরণ, লিখুকরণ, সির্কি, শিওকরণ। কেউ কারো চেয়ে কম নয়। পার্বত্য শ্রোতস্বিনী। বৃষ্টি আর বরফগলা জলে পুষ্ট। এরা ঘন অরণ্যানীর ভেতর দিয়ে বয়ে এসেছে। হৃদিকে ঝোপঝাড়, লজ্জাগুল্ম। এরা এক-একটি তরুণী, দেহভরা যৌবন। এদের চঞ্চলতা, অস্থিরতা নেনীর মনে আবেশ আনে। সিয়াং কিন্তু ঠিক উন্টো। সিয়াং বিরাট কিন্তু প্রোটা। সিয়াং আজ কেমন যেন শান্ত আর ক্লান্ত। যৌবনের সেই জয়-উল্লাস নেই। সেই প্রবল ভূমিকম্পের পর সিয়াং কেমন যেন ঝিমিয়ে গেছে। মিইয়ে গেছে। ভূমিকম্পের সময় একটা বিরাট পাহাড়ের চূড়ো ভেঙ্গে সিয়াং-এর ওপর পড়ে জলের গতি রুদ্ধ করছে। চলতে চলতে সিয়াং বাধা পেয়ে থমকে দাঁড়িয়েছে। এক দিকে জল বাধা পেয়ে ফুলে ফেঁপে উঠেছে, কিন্তু অণু দিকটা শুকিয়ে গেছে।

সিয়াং ক্রমশঃ ক্ষীণকায় হতে যাচ্ছে। ওমি বলে—“তুই সিয়াংকে শুষে নিয়ে নিজের যৌবনকে বাড়িয়ে চলেছিস।”

নেনী হেসে জবাব দেয়—“কি যা তা বলিস! ও কি আমার সতীন?”

—“ঠিক তাই। তোকে আজ খুব সুন্দর দেখাচ্ছে।” বলে ওমি।

—“ওপেট্ ময়াং-এর চেয়ে বেশী?” বলে নেনী। নেনী প্রতিশোধ নেয়। একটু আগে ওমি যা বলেছিলো তার যোগ্য প্রত্যুত্তর দেয় নেনী।

কথাটা ওমির মনে খচ করে বেঁধে। ওপেট্ ময়াংকে পাবার

জন্মে ওমি অনেক চেষ্টা করেছিলো। ওপেট ওমির কাছে ধরা দেয়নি।  
নেনী সব জেনেছে।

—“ওসব পুরোনো কথা এনে মনে যা দিসনে নেনী। সর্দারের  
ঘর থেকে তোকে কে তুলে এনেছিলো? মাটি যখন ঘন ঘন নাড়া  
দিচ্ছিলো আর তুই যখন অজ্ঞান হয়ে পড়ে ছিলি? এতো অল্পদিনেই  
সব ভুলে গেলি? কাগোলী জামোর ঘরে যাওয়া নিয়ে আমি কখনো  
তোকে কিছু বলেছি?” বলে ওমি। প্রকাণ্ড এবং জাঁদরেল হুমান-  
গুলো এক গাছ থেকে আরেক গাছে লাফঝাপ দেয়। ছ-চারটে পাকা  
বুনো ফল নেনী আর ওমির দিকে ছুঁড়ে দেয়।

—“পাহাড় চাপা পড়ে সিয়াং ঝিমিয়ে পড়লেও ওর সাথে লিঙ্গুকরণ  
আর ছুরাকরণের কোনো তুলনা হয় না। যেমন হয় না আমার সঙ্গে  
ওপেটের। তাই না?” প্রশ্ন করে নেনী।

—“তোর দেখছি বড্ডো গর্ব।”

নেনী হাসে। দাঁতগুলো মুক্তোর মতো ঝকঝক করছে। কি  
একটা গাছের পাতা ঘষে ঘষে দাঁতগুলোকে সে পরিষ্কার করেছে।  
খুব কাছে একটা অজগর একটা কাঠবিড়ালীকে গিলছে। কাঠবিড়ালীর  
অর্ধেকটা অজগরের মুখের ভেতর চলে গেছে। ওর মুখগহ্বর  
থেকে বেরিয়ে আসার জন্মে কাঠবিড়ালীটার কি প্রবল চেষ্টা। নেনী  
একসময় ওমির গলা জড়িয়ে ধরে। বলে—“জানিস, সিয়াং-এ কাল  
স্নান করতে গিয়েছিলাম। বালুতে সাবধানে পা রেখে রেখে  
এগুচ্ছিলাম। কি জানি বলা তো যায় না। জায়গায় জায়গায়  
চোরাবালি। তলিয়ে যাবার সম্ভাবনা। হঠাৎ এক জায়গায় দেখি  
বালু চিক্‌চিক্‌ করছে।”

—“বালুতে সোনা।” বলে ওমি।

—“ঠিক তাই। কিন্তু তুই জানলি কি করে?” প্রশ্ন করে নেনী।

—“আমার ঠাকুরদা একবার ওরকম দেখেছিলো। তার মুখে সব  
শুনেছি।”

—“তুই কি করলি ?” ওমি নেনীকে প্রশ্ন করে ।

—“মুঠোমুঠো বালু উঠিয়ে গা-হাত, পা-মাথায় ছড়িয়েছি । সারা শরীর চিক্‌মিক্‌ করেছে । এর ওপর সূর্যের আলো পড়ে রঙের হাট বসিয়েছিলো ।” বলে নেনী ।

—“আমাকে নিয়ে যাবি ?” বলে ওমি ।

—“না । তোর লোভ হবে । ও জায়গার খোঁজ তোকে দেবো না । তোর লোভ হলে তুই গাঁয়ে ফিরে গিয়ে সবাইকে খবর দিবি । লোকজন এসে সব মজা নষ্ট করে দেবে । সব বালু কুড়িয়ে নিয়ে যাবে । সিয়াং-এর রাগ হবে । জানিস, আরো একটা জিনিস দেখেছি !” বলে নেনী ।

—“কি রে ?” জিজ্ঞেস করে ওমি ।

—“বাঘের পায়ের ছাপ । মা-বাপের সঙ্গে চারটে বাচ্চাও ছিলো । পায়ের ছাপ দেখে তাই মনে হলো । আজ আবার যাবো । যদি একটা বাচ্চাকে তুলে নিয়ে আসতে পারি ।” নেনী বেশ সহজভাবে বলে ।

—“সর্বনাশ ! ও কাজ করতে যাস্‌ নে নেনী । ফল ভালো হবে না ।”

—“তোকে সঙ্গে নিয়ে যাবো । তুই তীরধনুক নিয়ে সঙ্গে সঙ্গে থাকবি । তোর তীরে যে রকম বিষ মাখানো থাকে, আমার ভয়টা কিসের ?”

—“চলোং পূজোর তোড়জোড় কেমন চলেছে রে ?” ওমি প্রশ্ন করে ।

—“খুব জোর আয়োজন চলেছে । ছটি মেয়েকে নাচতে হবে । তার ভেতর আমি রয়েছি । মারিয়াং গ্রাম থেকে মিরি আসছে । এরকম মিরি আমাদের গাঁয়ে এর আগে আর আসেনি । এমন ভালো গায় আর নাচে । মিরির চারদিকে আমাদের নাচতে হবে ।”

—“দেখিস মিরির সঙ্গে যেন বেশী ঢলাঢলি করিস নে ।” ওমি নেনীকে বোঝায় ।

—“না, না, তোর ভয় নেই। ভালো করে না নাচলে হ’জনের ভেতর থেকে মিরি আমাকে কেন বেছে নেবে? আর জানিস তো, হ’জনের ভেতর আমাকে বেছে না নিলে তোর পরাজয়। তুই ভাবতে পারিস, তোর নেনী পিছিয়ে থাকবে?”

—“সেটা ঠিক কথা। নাচে তোর খুব ভালো করা চাই। আচ্ছা শোন, এবারকার গানের বিষয়বস্তুটা আমাকে খানিকটা শোনাবি?” বলে ওমি।

—“এই জগৎটা নিয়ে মানুষ আর শয়তানের ভেতর প্রতিযোগিতা হলো। পৃথিবীটা কার দখলে থাকবে? শয়তান মানুষের কাছে হেরে জঙ্গলে পালিয়ে গেলো।” নেনী গানের সারমর্ম বুঝিয়ে বলে।

—“কাল পাশিঘাটে সওদা পিঠে করে নিয়ে গিয়েছিলি?” প্রশ্ন করে ওমি।

—“গিয়েছিলাম।” জবাব দেয় নেনী।

—“কি কি বস্তু নিয়ে গিয়েছিলি?”

—“মরিচ, ডিম, সাপের চামড়া আর হরিণের শিং।”

—“সব বিক্রী হয়ে গেলো?”

—“সব।”

—“কে কিনলে?” ওমি প্রশ্ন করে। তার মনে একটা প্রশ্ন অনবরত ঘোরাফেরা করছে।

—“পলিটিক্যাল অফিসের বাবু সব কিনে নিলে।” জবাব দেয় নেনী।

—“ও।” ওমির মুখ গম্ভীর হয়। “ওর কাছে বেচতে গেলি কেন? তোকে না এতো করে ওর কাছে যেতে বারণ করলাম?” ওমির মনে সন্দেহটা ভালো করে দানা বেঁধেছে।

—“গেলে দোষটা কোথায়? বড্ডো ভালো দাম দেয়।” জবাব দেয় নেনী।

—“দাম না হাতী। ও তোকে মরম করতে চায়। ভালোবাসার



বাঁধনে জড়াতে চায়। আর তোর ভালোবাসা কুড়োতে ভালো লাগে।”

—“খেং, তোর যতো বাজে বকুনি!” মুখের অভূত ভঙ্গী করে নেনী।—“কি যে তুই বলিস?” বলে নেনী।

—“আমি ঠিক বলেছি। ওর সঙ্গে ধেমালি ( ঠাট্টা-মস্করা ) করিস নে। লোকটা ভালো নয়। ওর মতলব খারাপ বলে মনে হয়।”

—“ত্যাখ্, জাওলাপ্রসাদের দোকান থেকে কেমন একটা চকচকে জামা কিনেছি।” নেনী বেতের ঝুড়ি থেকে জামাটা বের করতে চেষ্টা করে। ঝুড়ির ভেতর অনেক জিনিসপত্তর। শুকনো মাছ, তামাক, পান, সুপরি, লতাপাতা আরো অনেক কিছু।

—“ত্যাখ্, নেনী, জাওলাপ্রসাদের সঙ্গে পলিটিক্যাল অফিসের বাবুর যোগ রয়েছে। দেখছিস না জাওলাপ্রসাদের দোকানে কতো রকমের জিনিসপত্তর। আর আমাদের ওরাং বাট্ কিছুই যোগাড় করতে পারে না। ওই বাবু জাওলাপ্রসাদকে সমস্ত রকম সুখসুবিধে আর নানারকম বন্দোবস্ত করে দেয়। সব বাবুর কারসাজি।” বলে ওমি।

—“জানিস, বাবু আমাকে ডিক্রগড়ে নিয়ে যেতে চায়। সেখান থেকে জোড়হাটে যাবো। তারপর শিলং। আমাকে বাইস্কোপ দেখাবে। জামাকাপড় দেবে বলেছে।”

—“সর্বনাশ। ভালো হবে না নেনী। ওর সঙ্গে গেলে, ভালো হবে না। অপদেবতাকে আমি ডাকবো। তোর নৌকো তখন ব্রহ্মপুত্রের জলে ওলটাবে।” ওমি উত্তেজিত হয়ে ওঠে।

—“পলিটিক্যাল অফিসের বাবুর গায়ের রংটা এরকম টকটকে লাল কেন রে?” প্রশ্ন করে নেনী।

—“সর্বনাশ! পিশাচী মরেছে! কখনো তুই আর পাশিঘাটে যাবিনে। সওদা নিয়ে কখনোও বাবুর কাছে যাবিনে। বাবুর দেহটা লাল, মনটা কালো।” বলে ওমি।

—“বেশ যাবো না।”

হঠাৎ নেনী উঠে ছুট লাগায়। ওমি পেছন পেছন দৌড়ায়। কিন্তু পাথরের ওপর পা হড়কে একেবারে লিপ্সুকরণের জলে। নেনী হেসে গড়িয়ে পড়ে।

\*

\*

\*

\*

পাশিঘাট এয়ার-ফিল্ডের খুব কাছেই সার্কাসের তাঁবু পড়েছে। গ্রাম্য সার্কাস। আসামের কোনো ছোট্ট শহর থেকে এ সার্কাস-পার্টি এসেছে। ওদের সঙ্গে সাজসরঞ্জাম যা এসেছে তা অতি নগণ্য। লোকজন মাত্র জনকয়েক। খেলা দেখাবার জিনিসপত্রের সাংঘাতিক অভাব। ছোট্ট ছাগল, একটা বানর, একটা গাধা, ছোট্ট রং-ওঠা বাইসাইকেল মাত্র সম্বল। হ্যাজাক্ জালিয়ে, বাঁশী বাজিয়ে, ঢোল, টিন পিটিয়ে ওরা দর্শকদের আহ্বান জানায়। হেঁড়া তাঁবু। তাঁবুর জায়গায় জায়গায় ফেটে গেছে। তবু পাশিঘাটে এর কদর আছে। কদর আছে নেফার অরণ্যে। কয়েকটা বাঁশের সাহায্যে তাঁবুটাকে কোনোরকমে দাঁড় করানো হয়েছে। ভেতরে স্থানাভাব, দর্শকরা মাটিতে বসেই খেলা দেখে। দলে পুরুষ ছাড়া একটি মেয়েও রয়েছে। নাম লছমী। লছমী আঁটো পায়জামা পরে, কাঁচুলি এঁটে, সোনালী আর রূপালী স্নুতোয় কাজ করা জ্যাকেট গায়ে চড়িয়ে আসরে এসে নামে। ডাগর ছোট্ট চোখে কাজল টেনে, পাউডার আর ক্রীমে মুখখানা ফরসা করে, কপালে কুমকুমের টিপ এঁকে লছমী এসে দর্শকদের সামনে দাঁড়ায়। তাঁবুর বাইরে তখন ঢোল, বাঁশী, করতালের ঐকতান শুরু হয়। দর্শকরা স্ত্রী আর পুরুষ অবাধে বিস্ময়ে তাকিয়ে থাকে। ওদের দেহে বস্ত্রাভাব। পুরুষদের শুধু নেংটি সম্বল। মেয়েদের পিঠে গ্ৰাকড়ার ফালি বা বেত দিয়ে বাচ্চারা বাঁধা রয়েছে।

জঙ্গলের পথে বহুদূর থেকে তারা এসেছে। এসেছে দলে দলে। পদম্, পাশি, পাজিন্ আর টাগিন্ ট্রাইবস্-এর লোকজন। ইয়াংবু, পাজিন্ মেবো থেকে ওরা এসেছে। এসেছে স্ত্রীর পিঠে বাচ্চা চড়িয়ে, নিজেদের কোমরে চক্চকে দা ঝুলিয়ে। শুকনো ভাত আর শুঁটকো মাছ খেলেতে

পুৱে ওৱা এসেছে। অনেকেরই হাতে-মুখে উক্কি আঁকা, লহমী যখন আঁটোসাটো জামা আর পাজামা পরে হাতে ছাতা নিয়ে তারের ওপর দিয়ে হাঁটে, লহমী যখন এক চাকার সাইকেল চালায়, কাজলটানা দীঘল চোখে এদিক ওদিক দৃষ্টি হানে, হিন্দী ছবির গান গেয়ে কোমর নাচায়, নানারকম চণ্ডের আশ্রয় নেয়, চটুলতা আর চপলতাকে প্রাণয় দেয়, আর পুরুষগুলোর কথামত ছাগলটা যখন জ্বলন্ত লোহার রিং-এর ভেতর দিয়ে নিশ্চিন্ত মনে যাতায়াত করে, পদম্, পাশি, টাগিন্-ট্রাইবস-এর লোকগুলোর চোখে তখন রাজ্যের বিস্ময় নেমে আসে। তাদের আশ আর মেটে না। ছোট ছোট চোখ। চেপ্টা নাক। খোঁচা খোঁচা দাড়ি-গোঁফ। মুখে-হাতে উক্কি আঁকা। পোকায় খাওয়া আর পানে লাল হওয়া দাঁতগুলো বের করে তারা হাসে। তারা খুশিতে ভরে ওঠে। লহমী সুন্দরী। সত্যি সুন্দরী। এ কোন্ জগৎ। এ কোথাকার মেয়ে। কি সুন্দর এর সাজসজ্জা। অদ্ভুত এর চলাফেরা, চাউনি আর হাসি। নেফার অরণ্য থেকে এ জগৎ কতো স্বতন্ত্র। পাশিঘাটের গ্রাম্য সার্কাস ওদের মনে রামধনুকের রঙের পরশ বুলায়। চোখে নামিয়ে আনে স্বপ্নের মায়াজাল। নেফার অরণ্যে এ কোন্ জগতের এরা সৃষ্টি করলে।

নেপালী বস্ত্রীতে যাবার পথে জঙ্গলের পাশেই সার্কাসের লোকেরা থাকবার জেত্রে তাঁবু ফেলেছে। জায়গাটা কয়েকদিনের মধ্যেই তারা নোংরা আর অপরিষ্কার করে তুলেছে। হেঁড়া চট, হাঁড়িকুড়ি, টিনের ভাঙ্গা তোরঙ্গ। জলকাদায় চতুর্দিক থৈ-থৈ করছে। জলের রং কালো। তার ওপর পোকা উড়ছে। আশেপাশে কয়েকটা শুষোর ঘুরছে। ছোটো বাচ্চা নিয়ে মা একরাশ কাদার ভেতর পরম তৃপ্তিতে অবগাহন করছে। দিনের আলোতে লহমীকে চেনা যায় না। কোথায় অদৃশ্য হয়েছে রাতের কাজল, পাউডার আর স্নো। কালো মেয়েটা একটা হেঁড়া শাড়ি পরে একরাশ হাঁড়িকুড়ি নিয়ে মাজাঘষায় ব্যস্ত। লহমী মাজাঘষা করছে। জল তুলছে। বাটনা বাটছে। উনুন

ধরাচ্ছে। পুরুষগুলো বেশী রাত অবধি মদ খেয়েছে। গাঁজা টেনেছে। হাত-পা ছড়িয়ে তাঁবুর ভেতর অচৈতন্য অবস্থায় পড়ে আছে। তাঁবুর ভেতরটা কি অসম্ভব রকম মোংরা! মদের বোতল গড়াগড়ি যাচ্ছে। বিড়ি আর সস্তা সিগারেটের টুকরো রাশি রাশি ছড়িয়ে আছে। ছুটো জোয়ান ছোকরা, একজন প্রৌঢ়। একটি ছেলে আর প্রৌঢ় জাতিতে মুসলমান। লছমী আর অথ ছেলেটি হিন্দু। প্রৌঢ় ওদের সঙ্গে সুরাপান করেছে। পান করে বমি করেছে। বমির ওপর ভনভন্ করে মাছি উড়ছে। বমির আশেপাশে জমিটা লাল। গালভর্তি পান খেয়ে সারারাত পিক্ ফেলেছে ওরা। তবলা আর বাঁয়া মাটিতে গড়াগড়ি যাচ্ছে। হারমোনিয়ামটা তাঁবুর এক কোণে রয়েছে। জমির ওপর ঘুঙুরজোড়া পড়ে আছে। লছমী সারারাত গান করেছে আর নেচেছে। দিল্ দেওয়া-নেওয়ার গান। সার্কাসের কঠিন পরিশ্রমের পর ওরা গানবাজনা করে। মদ খায়। নাচে। ছোকরা, প্রৌঢ় সবাই লছমীর সঙ্গে প্রেম করে। এক নারী। তিনটি পুরুষ। শহরে অনেক রকম আকর্ষণ রয়েছে। কিন্তু এখানে নেকার এ অরণ্যে তারা কি করে সময় কাটাবে? এখানে সিনেমা নেই। থিয়েটার নেই। জঙ্গল আর জঙ্গল। সিয়াং, টিরাপ, সুবনসিরি আর লোহিত। জঙ্গলে জঙ্গলে ঘুরে ওরা ক্লান্ত হয়ে পড়েছে। জঙ্গলের পথে খচ্চরের পিঠে মাল চাপিয়ে আর নিজেরা পায়ে হেঁটে কাহাতক আর পাৰা যায়।

আজ সার্কাস-পার্টির ঐকতান বাদনে বিশেষত্ব রয়েছে। আজকের সুরটা সম্পূর্ণ নূতন। হ্যাজাকের আলো আজ অনেক জোরালো। বিকেল থেকেই সার্কাসের মানুষ আর জন্তুগুলোর মধ্যে যেন একটা সাড়া পড়ে গেছে। তাদের যতোগুলো খেলা দেখাবার কথা তার ভেতর শ্রেষ্ঠ খেলাগুলোর মহড়া বারে বারে হচ্ছে। সার্কাসের লোকগুলো সাজসজ্জায় নিজেদের অনেক বেশী চক্চকে আর ঝকঝকে করে তুলেছে। চলাফেরায় তারা যেন আজ অনেক ক্ষিপ্ত। অনেক নিপুণ। এসবের কারণ রয়েছে। আজ ডেপুটিকমিশনারের তাঁবুতে খেলা দেখতে

আসার কথা তার সঙ্গে এডুকেশন্, সি.পি. ডবলু ডি, পলিটিক্যাল-মেডিক্যাল অফিসের সমস্ত উচ্চপদস্থ কর্মচারীরা থাকবে। ডি.সি-র সঙ্গে থাকবে সহকিয়া আর চক্রবর্তী। মোট কথা সমস্ত পাশিঘাটের গণ্যমান্য ব্যক্তির দল আজ সার্কাস-পার্টির তাঁবুতে সার্কাস দেখতে জমায়েত হবে। ডি.সি. সার্কাসের খেলা দেখে খুশি হলে পাশিঘাটে আর মেবোঙে সার্কাস-পার্টির লোকদের থাকবার মেয়াদ বাড়িয়ে দিতে পারে। ডি.সি. চক্রবর্তীকে অর্ডার দেবে নূতন পাস ইস্যু করবার। সহকিয়াকে ডেকে বলে দেবে ওদের খেলার নূতন সাজসরঞ্জাম কিনে দেবার জন্তে। তার জন্তে সরকারী তহবিল থেকে কিছু গ্র্যাণ্টের বন্দোবস্ত হবে। চাই কি ওদের থাকবার জন্তে বাঁশের ঘরের বন্দোবস্তও হয়ে যেতে পারে। সব কিছু ডি.সি-র মর্জির ওপর নির্ভর করছে। অনেকটা তার খেয়াল-খুশির ওপর। আজ জীবনপণ করে খেলা দেখাতে হবে। সার্কাসের লোকগুলোর মনে আজ কতো আনন্দ। তাদের খেলা দেখতে সব বড়ো বড়ো আদমীরা আজ ভিড় জমাবে। তাদের বহু আর বিবি আসবে। আজ ঘামের বদখত্ গন্ধ নয়। ওরা পাউডার আর আতরের খুশ্‌বু ছড়াবে চারদিকে। তামাম পাশিঘাট জমায়েত হবে ওদের তাঁবুতে। খালি রঙ্‌ আর রোশনাই। দিলদরিয়া মানুষগুলোর দিল আর মেজাজ যদি খুশ্‌ থাকে, খুশ্‌ থাকে আশমানের চাঁদ আর সূর্য, খোদা যদি মেহরবানি করে, ছুটো মাস সময় যদি ওরা আরো বেশী পায়, তবে অগ্নি সার্কাস-পার্টি নেফাতে জমায়েত হবার আগেই ওরা তাগদ্‌ আর মেহনতের জোরে, বুকের খুন ঢেলে দিয়ে শুধে নেবে সারা পাশিঘাটের দৌলত। ছুটো মশাল জ্বালিয়ে লহমী নিজেদের থাকবার তাঁবুতে বসে তার প্রসাধনপর্ব শেষ করছে।

আজকে হুরী কিংবা অঙ্গরী সাজতে হবে। একটা ভাঙ্গা আয়না নিয়ে সে বসে গেছে। মুখখানার ওপর যতোরকম ভাবে কারুকার্য করা যায়, কিছুই সে অসম্পূর্ণ রাখবে না। মশালের আলোতে তাঁবুর ভেতর আর কতোটা আলোকিত হয়! বাইরে সম্পূর্ণ অন্ধকার।

দূরে সার্কাসের তাঁবুতে ঢোল, বাঁশী, করতাল বাজছে। লছমীর দেহে রয়েছে শুধু ব্রেসিয়ার। দেহ থেকে সমস্ত জামাকাপড় একে একে খুলে সে নিজেকে মুক্ত করেছে। বাকী ছিলো ওই ব্রেসিয়ার। এবার একটানে ব্রেসিয়ারটা খুলে সে দূরে ছুঁড়ে দেয়। বস্ত্রহীন ও তেলমাখানো দেহটা মশালের আলোতে ঝিলিক দিয়ে ওঠে। ঝজু, মশণ, কোমল, অপূর্ব সুষমামণ্ডিত দেহখানা আলো-অন্ধকারের ভেতর এক অদ্ভুত পরিবেশের সৃষ্টি করেছে। মনে হয় এক শিল্পী তাল তাল অন্ধকারের ভেতর থেকে কুঁদে এই মূর্তি বের করে এনেছে। আর তার সৃষ্টির ওপর এধার আর ওধার থেকে হেনেছে আলোর ছটা।

তাঁবুর ছেঁড়া অংশে চোখ লাগিয়ে আকণ্ঠ সুধাপান করে এক নারী। এ চোখের অধিকারিণী অণ্ড এক নারী। হোক সে নারী, তবুও ক্ষণকালের জগ্গ এ নারী দেখে অণ্ড নারীকে। পান করে অণ্ড এক নারীর রূপসুধা। যা সুন্দর তা সব সময়ই সুন্দর। সবাইকার কাছে সুন্দর। নেনী ময়াং ক্ষণকালের জগ্গে ভুলে যায় যে সে নারী। নেনী যে উদ্দেশ্যে আজ রাতে চুপিচুপি এখানে এসেছে তা বুঝি ক্ষণকালের জগ্গ সে ভুলে যায়। সে নিজে নারী। কিন্তু বস্ত্রহীন এ দেহের সঙ্গে তার দেহের কতো প্রভেদ। এ দেহ নয়। মেঘের কোলে বিজলী। এ কালনাগিনীর দেহ। কালনাগিনী যেমন পাক খেয়ে খেয়ে বৃক্ষশাখে ঊঠতে থাকে, এ দেহ তেমনি ভাবে পাক খেতে খেতে পুরুষের দেহ জড়িয়ে ধরবে। আর পুরুষ হয়ে যাবে অবশ আর বিহ্বল। নিজেকে মুক্ত করবার সমস্ত শক্তি সে হারিয়ে ফেলবে। লছমী সার্কাসের তাঁবুতে চলে গেলে এখানে কেউ থাকবে না। এ তাঁবু পড়ে থাকবে সম্পূর্ণ অরক্ষিত অবস্থায়। সার্কাসের লোকগুলো যখন খেলা দেখাবে, লছমী যখন তার কটাক্ষ আর দেহসৌন্দর্যে দর্শকদের ধমনীর রক্ত চঞ্চল করে তুলবে তখনই শুরু হবে নেনীর কাজ। এ তাঁবুতে ছড়ানো সায়া, শেমিজ, ব্লাউজ আর ওই বক্ষবন্ধনী তুলে নিয়ে নেনী পালাবে। ওই বক্ষবন্ধনীর ওপর তার প্রচণ্ড লোভ। ও

জিনিস শরীরে চাপিয়ে চলতে কেমন লাগবে কে জানে। সে দ্রুত হাঁটা-চলা কবতে পারবে তো? এর আগে অনেকদিন প্রচুর কৌতূহল নিয়ে সে লছমীকে লক্ষ্য করেছে। সার্কেল অফিসার খুশী হবে তো? সমস্ত কিছু যোগাড় করে সে সাজতে বসবে। ঠিক মেমন করে লছমী সাজে। কুমকুমের ফোঁটা, কাজল, পাউডার, স্নো, ক্রীম—কোন কিছুরই নাম সে জানে না। কিন্তু তাঁবুর ছেঁড়া অংশে চোখ লাগিয়ে দু-তিনদিন ধরে সে লছমীকে লক্ষ্য করেছে। লছমী ঠিক যেমন ভাবে সাজে ঠিক তেমনি ভাবে সে সাজবে। আজ রাতে নেনী ঠিক ওইকম ভাবেই সাজবে। লছমী আর একটি মুহূর্ত সময় নষ্ট কবে না। সার্কাসে খেলা দেখাবার সময় প্রায় হয়ে এসেছে। লছমীর সাজসজ্জাও শেষ। এবার সে বেরিয়ে পড়বে। মশাল ছুটো জ্বলুক। ছুটি রমণীব অন্তঃকরণও জ্বলছে। লছমী কি পারবে পাশিঘাটের ওপরমহলের কাউকে আজ রাত্রিতে ঘায়েল কবতে? নেনীর জন্তে অপেক্ষা করছে সার্কেল অফিসার। ডিব্রুগড় আর শিলং-এ নাকি অনেক কিছু দেখবাব রয়েছে। ওমি ময়াং রয়েছে সার্কাসের তাঁবুতে। আজ ওখানে ভালো ভালো খেলা দেখানো হবে।

নেনীর সাজসজ্জা দেখে সার্কেল অফিসার হতবাক! বিস্মিত! বিমূঢ়! নেনীকে ওরকম সাজসজ্জায় চেনা মুশকিল। সে পরী সেজে এসেছে। লছমীকে অনুকরণ করে সে নিজেকে সাজিয়েছে। সার্কেল অফিসারের চোখ দুটো জ্বলে ওঠে। সে সার্কাস দেখতে যায়নি। মদের বোতল নিয়ে নেনীর জন্তে অপেক্ষা করছিলো। নেনী এরকম ভাবে সেজে আসবে এ ছিলো তার কল্পনার বাইরে। দূরে ঢোল, করতাল, বাঁশী বাজছে। সার্কাসের খেলা চলছে। হাততালি পড়ছে ঘন ঘন। ওমি ময়াং একমনে সার্কাসের খেলা দেখছে।

হঠাৎ। হ্যাঁ, হঠাৎ। সিয়াং-এর ওপর যে পাহাড়টা ছমড়ি খেয়ে পড়ে একটা প্রকাণ্ড বাধার সৃষ্টি করেছিলো, সেই বাধাকে এক প্রবল জলোচ্ছ্বাস

এসে মুহূর্তে দূরে ঠেলে ফেলে দেয়। এক বিরাট জলস্রোত এসে সমস্ত বাধা-বিপত্তিকে ভাসিয়ে নিয়ে যায়। শাস্ত-নিস্তরক সিয়াং এক ভয়ঙ্কর চেহারা নিয়ে গর্জন করতে করতে ছুটে চলে। সামনে যা পায় ভাসিয়ে নিয়ে যায়। এতোদিনের সঞ্চিত চাপা আক্রোশ যেন গর্জে উঠেছে। সিয়াং কোনো বাধা, বন্ধন, বিধিনিষেধ মানবে না। প্রবল জলোচ্ছ্বাসে সিয়াং-এর তীরের বাংলোগুলো মুহূর্তে জলের তলায় তলিয়ে যায়। কাঠ, লোহা, পেরেক, টেবিল, চেয়ার, খাট আর অগ্ন্যস্ত্র জিনিষপত্র সিয়াং-এর জলে নিমেষে কোথায় অদৃশ্য হয়ে যায়। সিয়াং আর প্রৌঢ় নয়। সে আবার যুবতী হয়েছে। সে যৌবন ফিরে পেয়েছে। সে নাচছে, গর্জন করছে। ধ্বংসের খেলায় মেতেছে। বাংলার মানুষগুলো নিস্তার পায় না। জলের তোড়ে তারা কোথায় ভেসে যায়। হারিয়ে যায়। নেনী আর সার্কেল অফিসারকে এ জলস্রোত কোথায় ভাসিয়ে নিয়ে যায় তা কেউ জানে না। দ্রুত সিয়াং নেনী ময়াং আর সার্কেল অফিসারকে সঙ্গে করে নিয়ে যায়। এ অনাচার সে সহ্য করবে না। কোনোদিনই করেনি। সিয়াং শুধু নদী নয়। সিয়াং আদিদের দেবতা। আদিরা ওকে বড়ো শ্রদ্ধা-ভক্তি করে। পূজা দেয়। মানত করে। সিয়াং নদীর কথা না ভেবে নেফার কথা ভাবা যায় না। নেফা আর সিয়াং এক অচ্ছেদ্য বন্ধনে জড়িয়ে আছে। ওমি ময়াং সেদিনও মুরগী কেটে তার রক্ত সিয়াং-এর জলে ঢেলেছে। সিয়াং-এর আশীর্বাদ চেয়েছে। এই মুহূর্তে ওমি সার্কাসের তাঁবুতে বসে খেলা দেখছে। সিয়াং অনাচার, অত্যাচার সহ্য করে না।

বেশ কয়েক বছর হলো নেফা ছেড়ে চলে এসেছি। জানিনি আজ নেফার কতোটা পরিবর্তন হয়েছে। কতোটা সে বদলিয়েছে। আশা করছি নেফা দ্রুত উন্নতির পথে এগিয়ে চলেছে। নেফা আমার মনে স্থায়ী আসন পেতেছে।













